





41
9
15.

5. 7. 11.



CONSTITUTIONES
APOSTOLICÆ

ET

DECRETA
CONSISTORIALIA

Quæ jurantur,

AC

FORMULA JURAMENTI

PRÆSTARI SOLITA

A S.R.E. CARDINALIBUS

DUM

Ad Cardinalatum promoventur.

*J. Costa
apud Fontanello
de Alessandria
1741*



U R B I N I, MDCCXXVIII.

Ex TYPOGRAPHIA Venerabilis Cappellæ SANCTISSIMI SACRAMENTI
Apud Antonium Fantauzzi.

PRÆSIDUM PERMISSU.

THE
LIBRARY OF THE
MUSEUM OF
ART AND HISTORY
OF THE
CITY OF
NEW YORK



Handwritten text, possibly a signature or date, in the right margin.





FORMULA JURAMENTI A NOVIS CARDINALIBUS PRÆSTANDI.



GO N. Sanctæ Romanæ
Ecclesiæ Cardinalis N.
promitto, & juro, me
ab hac hora deinceps,
quandiu vixero, fide-
lem, & obedientem Beato Petro, San-
ctæque Apostolicæ Romanæ Ecclesiæ,
ac Sanctissimo D. N.

Papæ, ejusque Successoribus
canonicè, legitimèque electis futurum;
nullum consilium, aut consensum, vel
auxilium adversus Pontificiam Maje-
statem, aut Personam præstiturum,

confilia mihi ab eis per se , aut Nuncios , aut per literas credita , nemini unquam scientem , prudentemque in eorum damnum , vel dedecus enunciaturum : præsto item eis futurum , ut ipsi Papatum Romanum , & regalia Sancti Petri retineant , defendant , & recuperent , salvo meo ordine , adversus omnes , honorem , & statum eorum omni studio , & totis viribus propugnaturum . Legatos , & Nuncios Sedis Apostolicæ benignè , & honorificè in terris , & locis Ecclesiarum , Monasteriorum , & aliorum Beneficiorum mihi commissorum directurum , & defensurum , ipsisque securum iter curaturum , ac eosdem in eundo , morando , & redeundo honorificè tractaturum , & quibuscumque contra eos aliquid conantibus , usque ad sanguinem restitutum ; Jura , honores , privilegia , & auctoritatem Sanctæ Romanæ Ecclesiæ , Domini nostri Papæ , & Successorum prædicto-

dictorum conservare, augere, & promovere omnibus sensibus conaturum, Ubi verò contra illa aliquid præjudicii, quod à me impediri nequeat, machinandum intentetur, statim atque procurari, vel tractari noverim, eidem Domino nostro, vel Successoribus prædictis, aut alteri, per quem possit ad notitiam eorum perferri, significaturum; Sanctorum Patrum Regulas, Decreta, & Ordinationes, dispensationes, reservationes, provisiones, & mandata Apostolica, & Constitutiones felicitis recordationis Sixti Papæ Quinti de visitandis Liminibus Apostolorum, certis præscriptis temporibus, juxta illius tenorem nuper à me perlectum, observatum, & adimpletum, ab aliisque observari, & adimpleri procuraturum. Hæreticos, Schismaticos, & Rebelles eidem Domino nostro Papæ, vel Successoribus prædictis omni conatu persecuturum, & impugnaturum. Accersitum ab eodem Sanctissimo Domino nostro, & Successo-

ribus prædictis ex quacumque causa , ad eos profecturum, vel justo impedimento detentum, excusatorem missurum, eis-que reverentiam, & obedientiam debitas exhibiturum. Possessiones ad Mensam Ecclesiarum, Monasteriorum, & aliorum Beneficiorum mihi commissorum, seu ad illa quomodolibet pertinentes, nequaquam venditurum, neque donaturum, neque oppigneraturum, neque de novo infeudaturum, neque aliter alienaturum, inconsulto Romano Pontifice, etiam cum consensu Capitulorum, seu Conventuum, Ecclesiarum, Monasteriorum, vel Beneficiorum eorundem : & Constitutiones Beati Pii Quinti, quæ incipit *Admonet*, sub datum Romæ quarto Kalendas Aprilis anno Incarnationis Dominicæ millesimo quingentesimo sexagesimo septimo, Pontificatus sui anno secundo, unâ cum declarationibus Romanorum Pontificum Successorum, præfertim Innocentii Papæ Noni sub datum

Ro-

Romæ pridie Nonas Novembris anno Incarnationis Dominicæ millesimo quingentesimo nonagesimo primo, Pontificatus sui anno primo, & felicitis recordationis Clementis Octavi sub datum Romæ decimo sexto Kal. Martii anno millesimo quingentesimo nonagesimo secundo, Pontificatus sui anno primo, de Civitatibus, & Locis Sanctæ Romanæ Ecclesiæ non infeudandis, seu alienandis perpetuò observaturum; necnon perpetuò, & inviolabiliter observare promitto, atque juro, Decreta, & incorporationes facta, & factas per eundem Clementem Octavum sub diebus vigesima sexta Junii prædicti anni millesimi quingentesimi nonagesimi secundi, die secunda Novembris millesimi quingentesimi nonagesimi septimi: decima nona Januarii, & undecima Februarii millesimi quingentesimi nonagesimi octavi, de Civitate Ferrariæ, & toto ejus Ducatu, necnon de Civitatibus, & Locis quibuscumque per obitum
bonæ

bonæ memoriæ Alphonſi ultimi Ferrariæ Ducis, ſeu aliàs ad Sanctam Romanam Eccleſiam, & Sedem Apoſtolicam devolutis, ab eo recuperatis. Item Decreta, & incorporationes facta, & factas per recolendæ memoriæ Urbanum Octavum ſub die duodecima Maji milleſimi ſexcentiſimi trigeſimi primi, de Civitatibus Urbini, Eugubii, Callii, Foriſempronii, totoque Urbini Ducatu, necnon de Civitatibus Piſauri, Senogalliæ, Sancti Leonis, cum Statu Montis Feltrii, & Vicariatu Mondavii, aliisque Oppidis, & Locis quibuſcumque per obitum bonæ memoriæ Franciſci Mariæ ultimi Ducis, ſeu aliàs ad Sanctam Romanam Eccleſiam, & Sedem Apoſtolicam devolutis, & recuperatis. Item Decretum, & incorporationem per felicis recordationis Alexandrum Septimum die vigesima Decembris milleſimi ſexcentiſimi ſexageſimi, in Conſiſtorio factum, & factam de Ducatu Caſtri, Statuque Roncilionis, atque aliorum

Loco-

Locorum, Terrarum, seu bonorum, aliàs
per Raynutium Parmensium Ducem Ca-
meræ Apostolicæ venditorum, & Consti-
tutionem ejusdem felicitis recordationis
Alexandri Septimi ratione, & occasione
Decreti, & incorporationis hujusmodi,
die vigesima quarta Januarii millesimi
sexcentissimi sexagesimi primi publica-
tam, cum confirmatione, innovatione,
extensione, & declaratione aliorum De-
cretorum, & Constitutionum per Roma-
nos Pontifices de non infeudando edita-
rum, & contra ipsa, & ipsas quocumque
tempore, & quacumque causa, colore,
titulo, vel occasione, etiam evidentis ne-
cessitatis, & utilitatis, nullo modo dire-
ctè, vel indirectè venire, tractare, moliri,
aut machinare, aut auxilium, seu consi-
lium dare, & consensum præstare: quin-
imo cuicumque tractatui, & machina-
tioni semper, & perpetuò dissentire, op-
ponere, resistere, ac quascumque machi-
nationes, & tractatus, qui ad meam no-
ticiam

titiam pervenerint, per me ipsum, seu
meum Nuncium Sanctitati Suæ, & ejus
Successoribus legitimè intrantibus, sta-
tim revelare, tam sub pœnis in dictis
Constitutionibus contentis, quàm aliis
quibuscumq; gravioribus Sanctitati Suæ,
& ejus Successoribus prædictis bene visis.
Item Constitutionem prædicti Sixti Pa-
pæ Quinti de terdecies centenis millibus
nummorum aureorum in Arce Sancti
Angeli repositis; ac alteram felicitis re-
cordationis Innocentii Papæ Duodecimi
moderatoriam donationum, & distri-
butionis reddituum ecclesiasticorum in
Consanguineos, vel Affines Romani Pon-
tificis, sub datum Romæ apud S. Mariam
Majorem, anno Incarnationis Dominicæ
millesimo sexcentesimo nonagesimo se-
cundo decimo Kalendas Julii Pontifica-
tus sui anno primo. Et demum literas
memorati Urbani Papæ Octavi sub da-
tum Romæ apud Sanctum Petrum anno
Incarnationis Dominicæ millesimo sex-
cen-

centesimo vigesimo quinto, quinto Kal.
Februarii Pontificatus sui anno tertio,
confirmationis Bullæ recolendæ memo-
riæ Gregorii Papæ Decimi quinti de ele-
ctione Romani Pontificis juxta illarum
tenores à me perlectos, & plenè cognitos.
Item omnia, & singula, quæ per eundem
Urbanum, seu Sanctæ Romanæ Ecclesiæ
Cardinales, vel alios ab eo Deputatos,
vel à Sanctissimo Domino nostro, aut pro
tempore existente Romano Pontifice ad
hoc specialiter deputandos, & præcipuè
omnia, & singula Decreta à Sacra Cære-
moniali Congregatione hæcenus ema-
nata, & in posterum emanatura pro su-
blimi ejusdem Cardinalatus honore, &
dignitate conservanda, decerni, statui,
& ordinari contigerit, & signanter Mo-
tum proprium ejusdem Innocentii Papæ
Decimi, confirmationis Decreti ab ea-
dem Sacra Cæremoniali Congregatione
facti super æqualitate inter Sanctæ Ro-
manæ Ecclesiæ Cardinales servanda in

hono-

honorificis appellationibus, seu titulis eorum cuilibet attribuendis, & super expunctione Coronarum, aliarumque notarum secularium à gentilitiis eorundem Cardinalium insigniis, sigillis, seu armis, sub datum Romæ apud S. Petrum anno Incarnationis Dominicæ millesimo sexcentesimo quadragésimo quarto, decimo quarto Kal. Januarii, Pontificatus sui anno primo, juxta illius tenorem mihi plenè cognitum, me ad unguem observaturum, neque quidquam, quod ejusdem Cardinalatus honori, & dignitati quovis modo, & ex quavis causa repugnet, aut diminuat, acturum. Juraque Annuli Cardinalitii per eundem Gregorium Decimum quintum Congregationi de Propaganda Fide concessa, & applicata eidem Congregationi, juxta concessionis, & applicationis hujusmodi formam, & tenorem persoluturum, & super præmissis omnibus absolutionem non petiturum, & oblatam nullo modo recepturum.

Sic me Deus adjuvet, & hæc Sancta Dei Evangelia.

SANCTI PII QUINTI CONSTITUTIO.

*Prohibitio alienandi , & infeudandi Civitates ,
& loca S. R. E. vel de eorum alienationibus ,
& infeudationibus tractandi quovis
prætextu , etiam evidentis
utilitatis .*

PIUS EPISCOPUS
SERVUS SERVORUM DEI
Ad perpetuam rei memoriam .

ADMONET nos suscepti cura regiminis univer-
salis Ecclesiæ , cui auctore Domino præsi-
demus , ut Civitates , Terræ , Oppida ,
& Loca nobis , & Sedi Apostolicæ in tem-
poralibus mediatè , & immediatè subiecta perpetuò ,
in jure , dominio , & proprietate , ac possessione di-
ctæ Sedis conserventur .

A

Sanctè

Sanè licèt nonnulli Romani Pontifices Prædecessores nōstri per eōrum Constitutiones, rerum Ecclesiasticarum alienationes prohibuerint, & jam factas revocaverint, & annullaverint; nihilominus cū retroactis temporibus nonnulli nimium ambiciosi, & dominandi cupidi sub variis prætextibus, coloribus, & causis, sæpe etiam falsis (quod non finè maximo animi nostri mœrore referimus) aliquibus Romanis Pontificibus suggestionibus, & insinuationibus suis conati sint ostendere, & persuadere magis utile, & expediens S. R. E. & Sedi præfatæ fore, si aliquæ Civitates, Terræ, Oppida, Castra, Arces, & Loca ad jus, & proprietatem ejusdem Sedis pertinentia, in feudum, gubernium, vicariatum, ducatum, aut quemvis alium titulum perpetuum, vel ad tertiam generationem, seu ad vitam, aut aliàs ad longum tempus concederentur, vel etiam ex eo quod aliàs in feudum data, aut quovis alio titulo hujusmodi alienata fuerint, & propterea tamquam ad Sedem prædictam devoluta, vel devolvenda posse, & debere de jure iterum infeudari, & alienari, atque inde nonnullas alienationes, infeudationes, & concessiones à Sede Apostolica emanasse, ex quibus illa non mediocrem diminutionem non solum patrimonii, sed etiam æstimationis recepisse dignoscitur.

Hinc est quòd nos considerantes omnium Civitatum, & locorum prædictorum singularem fidem,
 & prom-

& promptam devotionem eidem Sedi exhibitam, omni tempore valde utilem, & salutarem fuisse, & esse; ac volentes non solum alienationes hujusmodi (quas tempore nostro omnino exulare intendimus) de medio tollere, & quod nobis licere non patimur, nostris Successoribus indicamus, quos non immemores fore speramus ante Domini nostri JESU CHRISTI in examine diei magni adventus Tribunal, villicationis nostræ rationem reddituros nos esse, sed ut omnis alienationum hujusmodi fiendarum occasio penitus aboleatur, quantum cum Deo possumus, per amplius providere, Constitutionibus Prædecessorum nostrorum hujusmodi etiam inhærendo, illasque innovando, motu proprio, & ex certa nostra scientia, non ad alicujus super hoc nobis oblata petitionis instantiam, sed ex mera animi nostri deliberatione, & de Apostolicæ potestatis plenitudine, habita etiam super his cum venerabilibus Fratribus nostris S. R. E. Cardinalibus in Consistorio nostro secreto consultatione matura, de eorum consilio, & unanimi assensu (qui etiam juraverunt præsentī Constitutioni non contravenire, nec Pontificibus alienationes contra tenorem præsentium attentantibus consentire, & absolutiones à juramento hujusmodi non petere, nec acceptare) hac nostra perpetuò valitura Constitutione decernimus, & declaramus Civitates, & loca prædicta etiam hætenus in feudum, aut quemvis alienationis titulum

dari solita, vel consueta, ad nos, & Sedem præfatam quomodolibet devoluta, & pro tempore devolvenda, absque alia ulteriori declaratione, & illorum possessionis apprehensione eo ipso Sedi, & Cameræ Apostolicæ incorporata, ac ad jus, & proprietatem, & dominium pristinum, ad possessionem rediisse censi, perinde ac si per quadraginta annos, & ultra Civitates, & loca præfata, à nobis, & Sede præfata immediatè possessa, & nunquam in feudum, aut alium titulum concessa fuissent.

Statuimusque, & decernimus, quod omnes, & singulæ tam Communitates, & Universitates, quàm Cives, & incolæ Civitatum, Terrarum, & locorum prædictorum, aliæque quæcumque personæ tam Ecclesiasticæ, quàm Seculares, cujuscvis dignitatis, & ordinis etiam Episcopalis, vel majoris existentes, ac S. R. E. Cardinales, tam publicè in Consiliis Civitatum, & locorum præfatorum, quàm privatim alibi in quibuscvis locis, etiam Civitatum, & Terrarum earundem Gubernatores, aut & Sedis Apostolicæ Legati, vel Pro-Legati existant, tractantes, consulentes, aut aliàs verba facientes de infeudationibus, aut alienationibus de Civitatibus, & locis præfatis immediatè ad nos, & præfatam Sedem spectantibus, & pertinentibus, etiam devolutis, etiam in feudum communiter, & pluries dari solitis, etiam ex causa permutationis, vel sub annuo censu, aut canone, aut aliàs quomodolibet, etiam

contemplatione meritorum erga Sedem præfatam, aut sub prætextu necessitatis, vel evidentia utilitatis, faciendis, seu de postulandis à nobis, & Sede præfata quibuscvis personis cujuscvis dignitatis, gradus, status, etiam nobis, & Successoribus nostris secundum carnem conjunctis, etiam S. R. E. Cardinalibus, aut quavis alia temporali, vel Ecclesiastica Dignitate fungentibus, in Duces, Vicarios, Gubernatores, seu quemvis alium titulum, ad vitam, vel in perpetuum, vel longum tempus, aut etiam Sedis Apostolicæ beneplacitum, Civitatum, & locorum præfatorum, ac propterea de eligendis Oratoribus ad nos, & Successores nostros super præmissis, vel illorum occasione mittendis proponentes, tam ipsi, quàm Oratores munus hujusmodi recipientes, aut alii quicunque alienationes hujusmodi Romano Pontifici pro tempore esistenti per se, vel alium, seu alios insinuantes, vel suadentes, eo ipso sententiam excommunicationis incurrant, à qua nisi ab ipso Pontifice, præterquam in mortis articulo, absolvi nequeant. Et insuper S. R. E., & Sedis Apostolicæ præfatæ rebelles, etiam in primo capite læsæ Majestatis, & proditores Civitatum, & locorum præfatorum, ac bona eorum Fisco, & Cameræ nostræ Apostolicæ ipso jure devoluta, & incorporata sint, & esse censeantur, omnibusque Ecclesiis, Monasteriis, & aliis per eos quomodolibet obtentis beneficiis Ecclesiasticis eo ipso privati existant,

neque

neque ad Civitates , & loca præfata ullo unquam tempore remitti possint . Etsi aliquando eos reintegrari contigerit , nihilominus infames remaneant , illisque bonorum , & dignitatum Portæ perpetuò claudantur .

Et quoniam intelleximus aliquos etiam Cardinales , Civitates , Terras , Oppida , Castra , Arces , & loca ad vitam , seu tertiam , vel aliam generationem , aut aliàs à dicta Sede etiam ex causa onerosa , obtinere , habere , & possidere , cum facultate faciendi in illis melioramenta , ita quòd ab eis amoveri non possint , nisi restitutis priùs pecuniis in melioramenta hujusmodi expositis , omnes , & singulas facultates faciendi melioramenta præfata quibuscvis Personis , etiam Cardinalibus per eosdem Prædecessores nostros , aut alios ad id facultatem habentes , quomodolibet concessas harum serie revocamus , & annullamus , & nemini deinceps suffragari posse , neque debere , ac cuicunque facultatem facienda melioramenta hujusmodi habenti , illa etiam pro munitione , & tuitione , nisi ex causa conservationis locorum eorundem facta fuerint , post publicationem præsentium facere omnino interdiciamus , ac prohibemus , etsi secus à quoquam factum , attentatumque fuerit , melioramenta quæcunque per eos contra tenorem præsentium facta locis ipsis cedere , & Cameram ad illorum satisfactionem minimè teneri , & obligatam esse volumus , & declaramus .

Decet.

Decernentes præsentēs literas sub quibusvis revocationibus , cassationibus , derogationibus , & aliis contrariis dispositionibus sub quibusvis tenoribus , & formis , ac cum quibusvis clausulis , & decretis pro tempore quomodolibet factis minimè comprehendendi , sed semper ab illis exceptas , & quoties illæ emanabunt toties in pristinum statum restitutas , & de novo concessas esse , & censi debere .

Irritum quoque , & inane si secus super his à quoquam quavis auctoritate scienter , vel ignoranter contigerit attentari .

Non obstantibus Constitutionibus , & Ordinationibus Apostolicis , ac Civitatum , & locorum prædictorum juramento , confirmatione Apostolica , vel quavis firmitate alia roboratis , statutis , consuetudinibus , cæterisque contrariis quibuscunque .

Sic igitur devotionis , & fidei constantia Civitatum , & locorum præfatorum erga nos , & Successores nostros , & eandem Romanam Ecclesiam perseveret , ut meritò integritatis virtus majora beneficia ab eadem Sede consequi mereatur .

Volumus autem , quod sicut omnes , & singuli Cardinales præsentēs Constitutionem hujusmodi , quantum in eis erit , observare , illique non contravenire , nec Pontificibus contrafacientibus consentire , aut absolutionem à juramento præstito non

peto-

petere, nec oblatam, aut concessam acceptare in Consistorio secreto nostro promiserunt, & jurarunt, idem per absentes Cardinales à Consistorio, in habitatione eorum, & à Romana Curia, ut quando-cunque ad eandem Curiam se contulerint, ac per futuros pro tempore Cardinales in assumptione Pilci promitti, & jurari debeat, ac promissionem, & juramentum hujusmodi in formula juramenti per eosdem Cardinales præstari soliti, adjungi, & inferi debere, ac contrafacientes poenam perjurii, & perpetuæ infamiæ juris, & facti, eo ipso incur-rere decernimus. Præterea quòd ipsi Cardinales, occurrente Apostolicæ Sedis vacatione, in Con-clavi quando de observandis literis Julii Papæ Se-cundi Prædecessoris nostri super electione Romani Pontificis, & aliis Constitutionibus juramentum præstare solent, etiam de inviolabiliter observanda præsentì Constitutione nostra per quemlibet eorum, qui in Romanum Pontificem electus fuerit, & post-modum idem ad Summi Pontificatus fastigium as-sumptus, post ejus assumptionem, hoc ipsum promit-tere, & deinde post coronationem suam, promissio-nem, & juramentum hujusmodi per literas suas speciales harum confirmatorias reiterare debeat. Quod si illud à Pontifice (quod credendum non est) re-cusabitur, aut differetur, tunc dicti Cardinales in primo Consistorio secreto, & præcipuè eorum De-canus, & Capita Ordinum apud eum omni cum
instan-

instantia, & instantissimè pro præsentium observatione petere, & rogare, ac obtestari non cessent, idque ut omnino efficiat, diligentissimè curare studeant, statuimus, & ordinamus.

Quodque præsentēs literæ in libellum redigantur, & post prædictas Julii literas, quæ in dicto Conclavi legi solent, inter alias Constitutiones nostras adjungantur, & etiam in quinterno Cancellariæ Apostolicæ cum aliis extravagantibus nostris describantur, ac ad valvas Basilicæ Beati Petri Principis Apostolorum, & in Cancellaria nostra Apostolica, ac acie Campi Floræ publicentur. Et quia difficile foret præsentēs ad singula quæque loca deferri, decernimus etiam, & declaramus, quod earum transumptis etiam impressis, manu alicujus Notarii subscriptis, & sigillo alicujus Prælati munitis eadem prorsus fides ubique, in judicio, & extra adhibeatur, quæ præsentibus adhiberetur, si forent exhibitæ, vel ostensæ.

Nulli ergo omnino hominū liceat hanc paginam nostræ declarationis, revocationis, Statuti, Decreti, & interdicti, prohibitionis, ordinationis, & voluntatis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Dat. Romæ apud Sanctum Petrum anno In-

B

carn-

carnationis Dominicæ millesimo quingentesimo sexagesimo septimo quarto Kalend. April. Pontificatus nostri anno secundo.

Ego PIUS Catholicæ Ecclesiæ Episcopus.

Ego F. Card. Pisanus Episcopus Ostien.

Ego Jo. Card. Moronus Episcopus Portuensis.

Ego Christophorus Card. Madrucius Episcopus Prænest.

Ego A. Card. Farnesius Episcopus Tuscul. Vice-Canc.

Ego Jo. Mi. Card. Saracenus.

Ego Ful. Card. Perus.

Jo. Card. Politianus.

Jo. Bapt. Cicada Card. S. Clementis.

B. Card. Tranen.

Scipio Card. Pifarum.

Jo. Card. Capisuccus.

Ego Clemens Card. Aræcæli.

Ego Ja. Card. Sabellus.

Ego Jo. Ant. Card. S. Georgii.

Aloysius Card. Cornelius.

Bern. Card. Salviatus.

Ego Phi. Card. à Burdesia.

Ego Lud. Card. Simoneta.

Ego Ant. Card. Granuelanus.

Ego F. Card. Paciecco.

Ego Marcus Antonius Card. Amulius.

Ego Hieronymus Card. de Corrigio.

Ego

Ego Jo. Franciscus Card. de Gambarà.

Ego N. Card. de Sermoneta.

Ego Hipp. Card. Ferrarien.

Ego Innicus Avalus Card. Arag.

Ego Marcus Antonius Card. Columna.

Ego Jo. Franciscus Card. Commendonus.

Ego Marcus Antonius Card. Bobbia.

Ego Hugo Boncompagnus Card. S. Sixti.

Ego Alexander Card. Sfortia.

Ego Alexander Card. Cribellus.

Ego Franc. Abundius Card. Castilion.

Ego Bened. Card. Lomellinus.

Ego Gulielmus Card. Sirletus.

Ego F. M. Card. Alexandrinus.

Ego Vitellotius Card. Vitellius S. R. E. Cam.

Ego Franciscus Card. Alciatus.

SIXTI QUINTI CONSTITUTIO

*De Visitandis certis hic statutis Temporibus ,
Sanctorum Petri , & Pauli de Urbe Limi-
nibus &c. ab Episcopis , Patriarchis ,
& aliis Ecclesiarum Primatibus .*

SIXTUS EPISCOPUS

SERVUS SERVORUM DEI

Ad perpetuam rei memoriam .

ROMANUS Pontifex , Beatissimi Petri Apo-
stolorum Principis Successor , in altissima
militantis Ecclesiæ specula , divina dispo-
sitione collocatus , ex credito sibi Aposto-
licæ servitutis officio omnium Ecclesiarum sollicitu-
dinem habere , totiusque Dominici Gregis , qui

unius Sanctæ Catholicæ ; & Apostolicæ Ecclesiæ per univĕrsū Orbem terrarū diffusæ , sacro ovili concluditur , curam gerere tenetur . Hujus verò tam gravis , & ingentis oneris , Angelicis plenè humeris formidandi , magnitudinem ut faciliùs ferre posset , Venerabiles Fratres suos Catholicos Episcopos in partem suæ sollicitudinis advocavit , qui tantquam Seniores in populo Dei , pleni sapientiæ spiritu , in sua quisque pastorali vigilia excubantes , illius supremi Pastoris in terris immensos labores sublevarent , in quo uno , Deo auctore , plenitudo residet potestatis . Nimirum , ut Episcoporum opere , & adjumento , ubique locorum gregis sibi commissi vultum agnosceret , & spiritualium ovium morbos intelligeret , curationesque adhiberet , atque ex sui muneris officio , perditâ requireret , abjecta reduceret , contracta alligarèt , infirma consolidaret , pingua , & fortia custodiret : denique assiduis Pastorum vocibus admonitus , de toto Ecclesiarum singularum statu certior redderetur , nec quisquam omnino illum lateret earum rerum , quas ad Dei Gloriam augendam , ad Christianam Religionem propagandam , ad animarum salutem procurandam necessariò eundem scire , atque intelligere oportet , ut omnibus cognitis , & examinatis , pro ea , quæ sibi à Christo Domino tributa est , summa potestate , alia in vinea Domini Sabaoth evellat , alia plantet , alia ædificet , alia destruat , quemadmodum ex
rerum,

rerum, & temporum conditione salubrius in Domino viderit expedire.

Ob quas sanè causas jure optimo, & Spiritus Sancti instinctu, à Sanctissimis Pontificibus Prædecessoribus nostris jam ab antiquissimis temporibus institutum est, & per multas ætates magno Ecclesiæ Dei commodo observatum, ut singuli Episcopi, Archiepiscopi, Primates, & Patriarchæ, cæteris præscriptis temporibus, per se ipsos, vel per certum eorum Nuncium, omni occasione seposita, Beatissimorum Apostolorum Petri, & Pauli, qui hanc Almam Urbem suo sanguine consecrarunt, Limina, tanquam fidei petram, & totius Sacerdotalis unitatis fontem jurejurando se visitaturos pollicerentur, atque ita S. R. E. Matris suæ complexu recreati, & paterno Summi Pontificis colloquio roborati, ad Ecclesias suas regendas, alacriores, & instructiores redirent.

Cæterum hæc tam salutaris, atque necessaria Constitutio, partim hominum negligentia, partim antiqui humani generis hostis astutia, variis etiam insurgentibus temporum calamitatibus, valde refriguit, aliis alia, atque alia impedimenta prætexentibus, in grave animarum suarum periculum, & quibus præsumunt, Ecclesiarum detrimentum. Nec verò dubitandum est, quod sine maximo animi mœrore commemorare non possumus, perniciosissimas hæreses, quibus multis jam annis, hominum peccatis

ita

ita promerentibus , Ecclesia vexatur , & Christi Domini vestis dilaceratur , ex hujusmodi saluberrimæ visitationis intermissione partim ortas esse , partim latenti progressionem magnum incrementum accepisse . Nam si celeriter in ipso nascentis mali initio , ab ipsis Episcopis pro rei gravitate ad Romanum Pontificem relatum esset , sanè illius providentia , & auctoritate , statim venenatæ stirpes ex agro Domini evulsæ essent , & Diabolici ignis scintillæ subito oppressæ , atque restinctæ , in tot flammæ , & luctuosa incendia non erupissent .

Hæc , atque alia gravissima incommoda , cùm primùm ad Summi Apostolatus apicem , meritis licet imparibus , Deo ita volente , vocati sumus , attentius considerantes , non solum ex intimis animi sensibus indoluimus , sed statim de adhibendo remedio , Divina gratia adjutrice , cogitare cœpimus . Urget enim nos Dei timor , & acres animo nostro stimulos , dies , noctesque subjicit , quemadmodum in tremendo illius judicio , administrationis nostræ rationem reddamus . Nam si huic tanto malo , quod magis quotidie ingravescit , non occurramus , non possumus nobis ipsis non valde timere , cùm crebrò in mentem veniant , & quasi aures nostras personent sacræ illæ voces comminationis , & terroris plenæ : *Fili hominis speculatorem dedi te domui Israel , & sanguinem ejus de manibus tuis requiram .* Et quod Petro à Domino dictum est : *Confirma*
Fra-

Fratres tuos . Et illud Apostoli Pauli , quod tantò magis ad nos pertinet , quantò maiorem præter cæteros , Pastoralis Officii curam fortiti sumus : *Attendite vobis , & Universo Gregi , in quo vos Spiritus Sanctus posuit Episcopos regere Ecclesiam Dei , quam acquisivit sanguine suo* . Quocirca eorundem Prædecessorum nostrorum vestigiis inhærentes , simulque modum , & temporum spatia Ecclesiarum earundem Præsulibus , pro cuiusque intervallo , & locorum distantia moderantes , hac perpetua Constitutione sancimus , decernimus , & mandamus , ut omnes Patriarchæ , Primate , Archiepiscopi , Episcopi per universum terrarum orbem constituti , à nobis deinceps ordinandi , etiam si Cardinalatus honore præfulgeant , antequam munus consecrationis suscipiant , seu eis consecratis Pallium de Beati Petri corpore sumptum tradatur , aut si ad aliam Ecclesiam transferantur , antequam illius regimini , & administrationi se immisceant , siquidem præsentibus in Curia fuerint , in manibus S. R. E. Diaconi Cardinalis ordine prioris , si verò absentes , in manibus Antistitis , qui ad impendendum munus prædictum , aut ad tradendum Pallium huiusmodi à Sede Apostolica delegabitur , juret juxta formulam in libro Cancellariæ Apostolicæ *Quinterno* appellato , nuper descriptam , se Beatissimorum Apostolorum Petri , & Pauli Limina , statutis in hac nostra Constitutione temporibus , personaliter , ac per se ipsos visitatu-

ros,

ros, ac nobis, & Successoribus nostris pro tempore existentibus Romanis Pontificibus rationem reddituros de toto eorum Pastoralis officio, deque rebus omnibus ad ipsarum, quibus præsunt, Ecclesiarum Statum, ad Cleri, & Populi disciplinam, animarum denique, quæ illorum fidei creditæ sunt, salutem quovis modo pertinentibus, & vicissim mandata Apostolica humiliter recepturos, & quàm diligentissimè executuros.

Quod si legitimo impedimento detenti fuerint, jurent se prædicta omnia adimpleturos per certum Nuncium ad id speciale mandatum habentem, de gremio suorum Capitulorum, aut alium in dignitate Ecclesiastica constitutum, seu alias Personatum habentem, aut si hujusmodi hominem Ecclesiastica dignitate, & Personatu præditum non habeant, per diocesenum Sacerdotem, & si Clero careant, omnino per aliquem alium Presbyterum secularem, vel regularem spectatæ probitatis, & religionis, de supradictis omnibus plenè instructum. De hujusmodi autem impedimento docere debeant per legitimas probationes, ad dictum primum Diaconum Cardinalem, per supradictum Nuncium transmittendas.

Quin etiam Principes temporales, si quid pro eorum pietate, & erga hanc Apostolicam Sedem observantia Romano Pontifici voluerint significare, eosdem, sive Episcopos, sive alios, qui ab eis mittentur, fidos habebunt Nuncios, ac Relatores,

C

quo-

quorum opera , ab eadem Sede pro illorum dominiis , ditionibus , & rebus firmandis , ac stabiliendis , & cum Dei , & sanctæ Religionis causa , sine qua tutò consistere haud possunt , conjungendis , opportuna sinceræ charitatis officia , consilia , atque subsidia expectare certò poterunt .

Ad hoc autem debitum visitationis officium commodè explendum supradicti Patriarchæ omnes , Prælati , Archiepiscopi , & Episcopi , Itali videlicet , vel ex Italicis Insulis , unde in Italiam commodius trajici potest , veluti Siculi , Sardi , Corfi , & alii adjacentium Provinciarum Italiæ , ac etiam Dalmatiæ , & Græcarum , quæ è regione ipsis Italiæ , & Sicilia oris sunt , tertio anno : Germani verò , Galli , Hispani , Belgæ , Bohemi , Ungari , Angli , Scoti , Iberni , & cæteri omnes , qui in Europa sunt citra mare Germanicum , & Balticum , ac omnium Insularum maris Mediterranei , quarto anno ; & qui intrà Europæ fines sunt , his Provinciis remotiores , ac etiam Africani littoribus nostris adversi , ac Insularum maris Oceani Septentrionalis , & Occidentalis Europæ , & Africæ citra continentem novi Orbis , tam qui nunc sunt , quàm qui ad Catholicam Fidem per misericordiam Dei aliquando redierint , quinto anno ; Asiatici verò , & qui extra Asiam , & in aliis novis Terris Orientalibus , Meridionalibus , Occidentalibus , & Septentrionalibus tam in Insulis , quàm in continentibus ; denique

in

in quibuslibet Mundi partibus decimo anno iter suscipiant , & Deo concedente perficiant . Idemque institutum tertio quoque , quarto , quinto , & decimo anno repetant , & observent . Hæc autem annorum spatia tempore suscepti muneris , consecrationis , vel Pallii traditionis , aut translationis , ut præfertur , incipiant . Quæ ne longiùs differatur , volumus , quod tempus quaecunque excursus alicui ex supradictis Præsulibus , qui sive morte præventus , sive alia quacunque de causa ob non finitum tempus ei præscriptum , dicta Limina non visitaverit , ita illius Successori effluxisse , & excurrisse intelligatur , ut termino ipso juxta Prædecessoris sui jusjurandum completo , debitam tunc visitationem conficere teneatur .

Hi verò ex supradictis Antistitibus , qui hæcenus ab hac Sancta Sede ordinati sunt , aut dictum Pallium ab ea susceperunt , aut ad aliam Ecclesiam translati sunt , prout cuique distantia locorum , & temporum intervalla præscripta sunt , ad supradicta omnia observanda à die publicationis præsentis constitutionis omnino teneantur . Jubemus igitur in virtute sanctæ obedientiæ supradictis omnibus Antistitibus præsentibus , & futuris , ut visitationem prædictam , sibi , suisque Ecclesiis adeo utilem , ac necessariam , juxta præscriptam formulam omnino conficiant .

Si verò , quod absit , non egerint , eos ab in-

gressu Ecclesiæ, ac etiam ab administratione tam spiritualium, quàm temporalium, necnon à perceptione fructuum suarum Ecclesiarum, à Capitulis eorum omni exceptione, & mora cessante, interim liberè exigendorum, & in opus Fabricæ, seu ornamentorum Ecclesiæ emptionem, prout major exegerit necessitas, infumendorum, ipso facto tam diu suspensos esse volumus, donec à contumacia resipiscentes, relaxationem suspensionis hujusmodi à Sede prædicta meruerint obtinere.

Non obstantibus Privilegiis, absolutionibus, Indulgentiis, & aliis concessionibus de non visitandis Liminibus ejusmodi quibuscunque Ecclesiarum Prælati, & per quoscunque Romanos Pontifices, ac etiam nos, & dictam Sedem ex quibuscunque causis perpetuò, vel ad tempus concessis, extensis, & innovatis, quæ omnia contra præmissa quicquam nolimus suffragari, aliisque contrariis quibuscunque. Cæterùm nos saluti, & conscientiæ securitati eorum Præfulum, qui ad hujusmodi visitationem obligati, eam contra jusjurandum hucusque distulerunt, consulere volentes, eos singulos à perjurii reatu, & à Canonicis, Apostolicisque omnibus sententiis, quas propterea incurrerunt, auctoritate præsentium absolvimus, quos tamen pro excessu hujusmodi elemosynam, quantam, & cui, vel quibus eorum Confessarius statuerit applicandam, volumus erogare.

Quia

Quia verò difficile nimis esset præsentēs litteras quocunque illi opus perferri, volumus quoque, ut earum exemplis etiam impressis, manu Notarii publici, & sigillo personæ in dignitate Ecclesiastica constitutæ obsignatis, eadem prorsus adhibeatur fides, quæ eisdem præsentibus, etiam in dicto Quinterno describendis haberetur, si essent exhibitæ, vel ostensæ. Nulli ergo, &c.

Datum Romæ apud Sanctum Petrum anno Incarnationis Dominicæ millesimo quingentesimo octuagesimo quinto, decimo tertio Kalendas Januarii, Pontificatus nostri anno primo.

CONSTITUTIO SIXTI QUINTI

*De decies centenis millibus nummum aureorum,
in Arce Sancti Angeli sepositis, & nullo
unquam tempore, nisi in præscriptis
casibus detrahendis.*

SIXTUS EPISCOPUS
SERVUS SERVORUM DEI
Ad perpetuam rei memoriam.

AD clavum Apostolicæ servitutis in puppi
militantis Ecclesiæ, non meritis nostris,
sed divinæ voluntatis dispositione, diffi-
cillimis his temporibus constituti, non so-
lùm præsentis fluctus, quibus Beati Petri Navicula
sæpius jactatur, mente pervigili circumspicimus, sed
pro-

procul etiam, atque à longè impendentes tempeſta-
tes, non ſine magna animi ſolicitudine proſpicimus,
eaſque conſilio, & vigilantia, quantum cum Domi-
no poſſumus, præcavere, ac vitare ſtudemus. Cir-
cumſtant nos undique multorum generum pericula,
mala inteſtina quotidie magis ingravescunt, bello ar-
dent Provinciæ, Hæretici implacabili odio inflam-
mati in nos rapiuntur, hoſtis teterrimus, & poten-
tiſſimus Turca, alter Affur virga furoris Domini
cervicibus noſtris ſemper imminet, quique commu-
nes ſunt Catholicæ Religionis, & Chriſtiani nomi-
nis inimici, iidem Romanam in primis Eccleſiam,
& Apoſtolicam hanc Sedem fidei petram, & Fide-
lium omnium Matrem acerbiffimè oderunt, ejuſque
auctoritatem, amplitudinem, ſtatum convellere, quod
Deus avertat, ac labefactare, vehementer atque avi-
dè concupiſcunt. Et nos quidem dubios rerum even-
tus, & occulta discrimina, quæ non ſine cauſa ti-
mere cogimur, sæpenumero expendentes, non in no-
bis ipsis ſpem collocamus, neque carnem ponimus
brachium noſtrum, ſed oculos in Cælum ſuſtollimus
ad Cuſtodem Iſrael, eumque ipſum, qui nunquam
dormit, neque dormitat, sæpè cum lacrymis exci-
tamus, ut aliquando è ſomno exurgens mari, &
ventis imperet, & tranquillitatem faciat. Sed ta-
men ab eodem, in quo ſpes omnes noſtræ reſident,
edocti ſumus noctu vigilandum eſſe Patrifamilias,
ne fures domum perfodiant, ſervumque ſupra ejus

Fami-

Familiam constitutum , non solum fidelem esse debere , sed prudentem , nec temerè tentandum Dominum , ut in iis , quæ consiliis nostris , & ratione gubernari possunt , non tam divinam opem , quæ semper expetenda est , quàm miracula requirere videamur . Quare ad humanæ prudentiæ subsidia ita confugimus , ut in Deo potissimum speremus , ad cuius gloriam , atque ad sanctæ Romanæ Ecclesiæ utilitatem , populorumque nostrorum quietem , & defensionem omnia dirigimus . Nam cum illius vicem in terris , licet immeriti , geramus , qui Rex pacificus , & Sacerdos est in æternum , utraque potestate Sacerdotali , & Regali eorum præcipue commodis , & incolumitati consulere debemus , qui sub peculiari tutela , & ditione hujus sanctæ Sedis sunt constituti , in quo quidem Pastoris etiam officium exercemus , ut præclare nos admonet Beatissimus Pontifex Gregorius , à quo Pastores objurgantur , qui de externa Gregis utilitate non sunt solliciti . *Pastores , inquit , sic erga interiora studia subditorum suorum ferveant , quatenus in eis exterioris quoque vitæ providentiam non relinquunt .*

Quod igitur à nobis Pastoralis Providentiæ debitum requirit providere cupientes , ne aliquando repentina aliqua , & improvisa vi , quod superiorum temporum luctuosa monent exempla , Nos , Successoresve nostri , & populi nobis subiecti opprimantur , neve ad dubios casus à pecunia omnino imparati
simus,

simus , quæ in ipso motu , & trepidatione difficulter admodum , non sine magno Civitatum , & Provinciarum incommodo conficitur , quibus parcere cupimus , & quod gravius est , jam fera , & inopportuna diligentia sæpius frustra , & inutiliter conficitur , quæque si in tempore curata , & præparata sit , ad copias , aliaque Præsidia comparanda , magno usui , & adjumento esse potest . Ob eas causas decrevimus certam pecuniæ summam , benedicente Domino , nullo nostrorum extraordinario onere congestam , sed præter alias rectæ colligendæ pecuniæ vias , nostra etiam parsimonia , frugalitateque Pontificia comparatam , hoc est ad decies centena milia aureorum nummum seponere , tanquam sacrum Ecclesiæ Romanæ Peculium , & præcipuum ærarium , quod bonorum immobilium instar sit , atque ad certos casus hac nostra ordinatione præscriptos erogandum , fideliter , integrèque reservatum , ac præclarè paratum ipsa Sedes Apostolica , Ecclesiæque Romana habeat . Etenim inter omnia præsidia , & firmamenta , quæ ad Reipublicæ defensionem , & conservationem necessaria Sapientum judicio putantur , magnam sapientissimus Salomon vim , & facultatem pecuniæ tribuit verbis illis : *Utilior est Sapientia cum divitiis , & magis prodest , sicut enim protegit sapientia , sic protegit pecunia* . Quod sanè divino consilio à veteris testamenti Patribus factum esse animadvertimus , cum in Dei etiam templo ,

magnam auri, argentique copiam, ingentemque thesaurum ad necessitates reservatum esse, sacris libris & Regum, & Machabæorum testatum sit: *Habuit etiam Christus Dominus loculos, & quæ à Fidelibus oblata erant, reservavit, ut Ecclesiæ necessitatibus subveniret, sicque formam instituit Ecclesiasticæ pecuniæ servandæ*, inquit Sanctus Augustinus. *Habet etiam Ecclesia aurum*, ait Beatus Ambrosius, *ut cum necesse est, illud tunc non servet, sed servatum erogat*; & ex eo tempore, quo prima Christianæ Religionis facta fuerunt fundamenta, Sanctus Sixtus Prædecessor noster, & Martyr, levitæ Laurentio, qui martyrio insignis fuit, Ecclesiæ thesauros tradiderat asservandos; quos idem Christi Athleta fortissimus, ex manibus Tyranni, qui præter Christianorum innocentem sanguinem & aurum Ecclesiæ sitiebat, in pauperes celeriter distribuendo eripuit.

His itaque rationibus, & causis, aliisque ad Dei gloriam, atque Ecclesiæ utilitatem spectantibus nos adducti, & ex certa nostra scientia, habita super hoc cum venerabilibus Fratribus nostris Sanctæ Romanæ Ecclesiæ Cardinalibus, in Consistorio nostro secreto matura consultatione de eorum consilio, & unanimi assensu, hac nostra perpetuò valitura Constitutione, atque ordinatione, supradictam à nobis simul congestam pecuniæ summam in Pontificia sancti Angeli Arce, certo sanctiori ærarii loco,

quem

quem eo nomine constituimus, in quibusdam certis designatis scriniis, collocamus, reponimus, asservamus, atque assignamus, eamque ita collocatam, & asservatam, Christo Domino, cujus in terris vices gerimus, Beatissimæ Virgini Dei Genitrici Mariæ, ac Sanctis Apostolis Petro, & Paulo ea lege offerimus, atque dicamus, ut inde, ne nobis quidem eam neque totam, nec verò partem aliquam etiam minimam promi unquam liceat, præterquam si pro recuperatione Terræ Sanctæ, & generali contra Turcas expeditione bellum aliquando suscipiendum erit. Tuncque etiam postquam Christianus exercitus comparatus erit, ac mare ad ipsorum Turcarum fines trajecerit. Si præterea tanta annonæ, & rei frumentariæ inopia sit, ut fames Populo interitum allatura videatur, aut si pestilentia lues grassetur. Si manifestum periculum imminet, ne aliqua ex Christianis Provinciis ab infidelibus, & Catholicæ Ecclesiæ hostibus occupetur, tuncque subsidii tantum ferendi causa. Si bellum contra statum Sanctæ Romanæ Ecclesiæ in Italia inferretur, tuncque dumtaxat, cum justus, & integer exercitus in ipsos etiam Ecclesiasticæ ditionis fines pervaserit, vel prope jam sit, ut qui loca finitima invaserunt, ad occupandum Civitates, & loca ditionis Ecclesiasticæ irrumpant. Si belli sumptus faciendus erit pro Civitatis, quæ temporali ditioni Sanctæ Romanæ Ecclesiæ subiecta, ab ipsius

obedientia (quod Deus avertat) defecerit , recuperatione , & conservatione , aut pro Civitate , ac ditione , quæ ad Sedem Apostolicam devolveretur , recuperanda , & conservanda . Si quando quis in eam se intruderet , seu occuparet , aut occupationis , & intrusionis periculum instaret , atque urgeret . In his autem omnibus casibus præscriptis , ac permissis , in quibus aliqua pecuniæ portio semel , aut sæpius sumi licebit , id semper moderatè fiat , eaque cautio , ratioque adhibeatur , ut omnino saltem integra medietas constitutæ hujus ærarii pecuniæ remaneat . Præterea consensum duarum saltem ex tribus partibus Cardinalium , qui Consistorio interfuerint , præstari , decretumque ipsum eorundem Cardinalium consentientium subscriptione roborari volumus .

Extra hos autem præscriptos casus , omnem hujus pecuniæ Deo , ut supra , dicatæ , vel omnino , vel aliqua ex parte amovendæ , aut erogandæ potestatem à nobis prorsus abdicamus , abdicatamque planè esse volumus . Statuentes , quemadmodum supradictum est , ut instar bonorum immobilium Ecclesiæ sit , & habeatur , eandemque sic asservatam , & repositam , ac Deo dicatam , nos integram conservaturos esse , ac perinde omnino atque res , & bona Ecclesiæ immobilia nos habituros esse promittimus , juramus , & vovemus . Cujus rei servandæ vinculo , sicut nos adstringimus , ita nostri Successores

res etiam se eodem devinctos esse norint. Tum boni publici causa, quod summo studio procurare debent, tum Pontificalis muneris religione, qua obstrictos non modò non rescindere, sed inviolatè observare oportet, quæ à Prædecessoribus nostris, sanctèque constituta esse vident. Tum denique divinæ Justitiæ Lege, ex qua intelligant se, prout divinæ literæ, exemplaue significant, ac Patrum documenta declarant, gravissimas pœnas duros esse, si rem Deo dicatam, aliter, ac præscriptum est, dispenfarint.

Cujus rei non minùs insigne, quàm tremendum exemplum in Máchabæorum historia traditum est de impio, atque audaci Heliodoro, qui cùm pecuniam à sacro Templi Dei ærario auferre moliretur, armato quodam equite, aspectu terribili subitò divinitus apparente, equi calcibus impetitus, à duobus quoque Juvenibus, Dei item jussu, apparentibus, flagellis verberatus, ac plagis gravissimis affectus est. At verò nos religiosa eorum conscientia, Pontificiaque charitate confisi, non modò non dubitamus, sed planè speramus fore, ut ærarium hoc nostrum, quod nostra solitudine partum, ac Deo dicatum ad necessarios præscriptos casus reservavimus, ita diligentissimè reservent, ut nos maximè facturos esse professi sumus, ac profiteamur.

Si verò alii casus aliquando inciderint, qui etiam majorem ex ærario promendæ pecuniæ ratio-

nem haberent, nolumus tamen, quod de his certis casibus constituimus, & præscripsimus, ullo unquam tempore, nec etiam dum Sêdes Apostolica per obitum Romani Pontificis vacaverit, ad illos, qui majoris rationis vim habere viderentur, extensionem fieri, aut ullo modo de illis interpretari licere. Sed nostram hanc ordinationem, constitutionemve ad literam intelligi debere decernimus. Nam Successoribus nostris, æquè, ac nobis etiam, si qui alii casus inciderint, in quibus magnæ etiam impensæ infumendæ aliquando erunt pecuniæ, opes aliundè non deerunt, quibus conservata hac in hoc à nobis constituto, & sancito ærario summa, occurri necessitatibus incidentibus poterit. Etenim si à nobis, qui in hoc ipso Pontificatus nostri ingressu multis difficultatibus oppressi, ad sublevandam annonæ inopiam, ad exules, facinorososque homines publicæ quietis perturbatores coercendos, atque ob Basilicas religiosissimas, & toto terrarum Orbe celeberrimas reficiendas, atque instaurandas, cultumque divinum in hac Alma Urbe, quæ Christianæ Religionis Sedes est, & Domicilium, novis etiam sacris ædificiis, atque ornamentis amplificandum, tum etiam ob salubris, & copiosæ aquæ ad loca Urbis acclivia, quæ illa maximè indigent, operosam deductionem, aliasque gravissimas ob causas, multiplices, & maximas impensas subire coacti sumus, ærarii hujus pecunia, nostra sedulitate, & diligen-
tia

tia reposita, & ad certos præscriptos casus reservata non esset, sed in varios alios usus à nobis pro justo arbitrato nostro erogaretur, nullus quidem locus justæ adversus nos querelæ Successoribus nostris relinqueretur, & nihilominus pro necessitatibus, etiam, quæ de repente inciderent, sumptus subire, & eis providere cogerentur. Propterea iis durum videri nullo modo debet, si conservata prædicti æarii summa, quæ faciliorem ad alios nummos sibi comparandos viam munit, aliunde pecuniam sumere debeant, quàm in sumptus pro temporum varietate necessarios erogent.

Immo verò illud rationi valde consentaneum est, ut quàm inde pecuniæ partem in præscriptis illis casibus sumperint, eam integram, cum primum sumptus in iis faciendi occasio cessaverit, planè in ipsum æarium, unde acceperunt, restituant, ac reponant.

Et verò, ut ob causas tantum supra planè præscriptas, ex eodem æario pecunia justè, legitimeque sumatur, ad illius custodiam sex claves adhiberi jubemus, quarum tres Cardinalibus item tribus, qui ordinum capita dicuntur, quique in Romana Curia præsentibus adsint, illis verò absentibus, tribus aliis, qui in eisdem ordinibus eis proximi erunt, eorumque locum eo tempore gesserint, sigillatim assignentur; quarta S. R. E. Camerario, quinta Decano Clericorum Cameræ Apostolicæ, à quo illam aliàs
tradi

tradi non liceat, nisi præsentibus, & consentientibus ejusdem Camera Apostolicæ Clericis duobus; sexta denique Thesaurario Generali. Claves verò duæ portarum ærarii hujus, sic à nobis constituti, altera Collegii Cardinalium Decano, eoque absente, antiquiori in ordine Cardinali in Urbe existenti; altera nostro, & pro tempore existenti Romani Pontificis Thesaurario secreto asservendæ tradantur, qui omnes jurabunt, se neque claves duros, neque extractioni præfatæ pecuniæ consensuros, nisi in casibus superscriptis, & tunc nisi consensu duarum partium Cardinalium, ut supra, interveniente.

Volumus insuper ejusdem Castri Sancti Angeli nunc, & pro tempore Præfecto juramentum deferri, atque ad illud præstandum in manibus Sanctæ Romanæ Ecclesiæ Camerarii teneri, se non permittiturum, quavis jussione, & quibusvis clausulis munita non obstante, ex ærario per nos constituto aliquam pecuniarum quantitatem auferri, nisi forma per nos tradita observata. Si verò contra hoc juramentum fecerint, pecuniæque ex ærario partem aliquam, vel minimam contra hujus ordinationis, constitutionisque nostræ præscriptum sumi, promi, detrahique permiserint, anathematis pœnam ipso facto subeant.

Id quoque statuimus, & sancimus, ut omnes, & singuli tam seculares quavis dignitate, etiam Ducali, & Regia fulgentes, quàm Ecclesiastici cujusvis ordinis, & dignitatis, etiam Episcopi, vel Archie-

pisco-

piscopi, vel Cardinales, qui de pecuniis ex eodem arario, præter casus, & formam supra præscriptos, sumendis, amovendisque tractarint, consuluerint; insinuarint, suaserint, aut suadere tentarint, eo ipso sententiam excommunicationis incurrant, à qua, nisi ab ipso Pontifice, præterquam in mortis articulo absolvi nequeant, ac præterea Sanctæ Romanæ Ecclesiæ, Sedisque Apostolicæ iidem rebelles, læsæque Majestatis Rei esse censeantur, omnibusque Ecclesiis, Monasteriis, & aliis per eos quomodolibet obtentis Ecclesiasticis Beneficiis, eo ipso privati, cum ad illa, tum ad alia in posterum obtinenda inhabiles existant. Quod si aliquando eos reintegrari contigerit, nihilominus infames etiam remaneant, neq. verò unquam iis ad honores, gradus, dignitatesque in posterum aditus pateat.

Volumus autem, quod sicut omnes, & singuli Cardinales præsentem Constitutionem hujusmodi, quantum in eis erit observare, illique non contravenire, nec Pontificibus contrafacientibus consentire, aut absolutionem à juramento præstito non petere, nec oblatam, aut concessam acceptare, in Consistorio nostro secreto promiserunt, & jurarunt idem per absentes Cardinales à Consistorio in habitatio-
ne eorum, & à Romana Curia, ut quandocunque ad eandem Curiam se contulerint, ac per futuros pro tempore Cardinales in assumptione Pilei promitti, & jurari debeat, ac promissionem, & juramen-

mentum hujusmodi in formula juramenti per eosdem Cardinales præstari soliti adjungi, & inscribi debere, ac contrafacientes pœnam perjurii, & perpetuæ infamiæ, juris, & facti eo ipso incurrere decernimus.

Præterea quòd ipsi Cardinales, occurrente Apostolicæ Sedis vacatione, in Conclavi, quando de observandis felicitis recordationis Prædecessorum nostrorum Julii Secundi literis super electione Romani Pontificis, & Pii Quinti: *Ne Civitates, & Loca Sanctæ Romanæ Ecclesiæ infeudentur*: & aliis Constitutionibus juramentum præstare solent, etiam de inviolabiliter præsentì Constitutione nostra, per quemlibet eorum, qui in Romanum Pontificem electus fuerit, & postmodum idem ad Summi Pontificatus fastigium assumptus, post ejus assumptionem, hoc ipsum promittere, ac jurare, & deinde post Coronationem suam promissionem, & juramentum hujusmodi per literas suas speciales, harum confirmatorias reiterari debeat. Quod si illud à Pontifice, quod credendum non est, recusabitur, aut differretur, tunc dicti Cardinales in primo Consistorio secreto, & præcipuè eorum Decanus, & Capita ordinum apud eum omni cum instantia, & instantissimè pro præsentium observatione petere, & rogare, ac obtestari non cessent. Quod si semel, atque iterum enixè rogatus, ejusmodi juramentum præstare diutius etiam distulerit, tunc demum omnes, sin-

gulosque Cardinales ea lege adstringimus, ut in singulos annos quinquies, in die scilicet Natali Domini, in Pascha Resurrectionis, in Festo solemni Sancti Petri, die præterea anniversario Creationis, & Coronationis ipsum Pontificem instanter, instantius, atque instantissimè rogent, orent, obsecrent, atque obtestentur, ut de sancito hoc ærario, quod Deo obtulimus, & dicavimus, ad præscriptum custodiendo, servandoque sanctè juret, idque ut omnino efficiat tamdiu, quoad plenè effecerit, diligentissimè curare studeant, statuimus, & ordinamus.

Has verò nostras literas in libellum redigi, & post prædictas Julii Secundi, & Pii Quinti literas, quæ in ipso Conclavi legi solent, aliisque Constitutionibus Apostolicis adjungi, & in Quinterno etiam Cancellariæ Apostolicæ unà cum aliis Constitutionibus nostris describi, & in valvis Basilicæ Beati Petri Principis Apostolorum, & in Cancellaria nostra Apostolica, ac in Acie Campi Floræ publicari.

Earumque transumptis, & exemplis etiam impressis, manu Notarii publici subscriptis, & sigillo alicujus Prælati, seu Personæ in dignitate Ecclesiastica constitutæ munitis, eandem fidem ubique haberi, in judicio, & extra, quæ præsentibus haberetur, volumus, & jubemus.

Si quis autem fortasse nostrorum Successorum, id quod minimè credimus, huic nostræ Constitutioni

ni omnino, aut aliqua ex parte derogare, aut contra statuere voluerit, aut depromptam pecuniam, ut supra sancitum est, in idem ærarium non restituerit, admonemus post derogantis, aut contra stuentis, contraque facientis obitum liberum esse Successoribus ea derogatione, & quibusvis aliis, quæ contra statuta sunt, non obstantibus, pro pecunia contra hujus Constitutionis præscriptum, sumpta, ac deprompta recuperanda adversus Pontificis derogantis, & contrafacientis, & Cardinalium idem consentientium posteros, seu conjunctos omnes, quibus ab ipso Pontifice, aut Cardinalibus bona quovis titulo, vel quavis ratione obvenerint agere, & possessionem bonorum, quæ ad ipsos posteros pervenerint, adipisci, retinerique, donec quicquid pecuniæ depromptum est, id omne in ærarium referatur, & restituatur, eaque ipsa bona, si quo modo, ut supradictum est, à forma per nos constituta recedi contigerit, hujusmodi obligationi, atque oneri obnoxia, & addicta esse volumus, singulis, quæ in nostris literis adversari possent, vel quoquo modo obesse penitus remotis, ac non obstantibus.

Nulli ergo omnino hominum liceat hanc paginam nostræ Constitutionis, collocationis, repositionis, asservationis, assignationis, oblationis, dicationis, abdicationis, promissionis, juramenti, voti, professionis, sanctionis, adstrictionum, decretorum, statutorum, ordinationis, jussionum, admonitionis,

& vo-

& voluntatum infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus, se noverit incursum.

Datum Romæ apud Sanctum Petrum anno Incarnationis Dominicæ millesimo quingentesimo octuagesimo sexto undecimo Kalendas Maji, Pontificatus nostri anno primo.

Ego SIXTUS Catholicæ Ecclesiæ Episcopus promitto, voveo, & juro.

Ego A. Card. Farnesius Episcopus Ostien. Vice-Cancell. promitto, voveo, & juro.

Ego Jacobus Cardinalis Sabellus Episcopus Portuen. promitto, voveo, & juro.

Ego Joannes Antonius Card. S. Georgii Episcopus Tusculanus promitto, voveo, & juro.

Ego Jo. Franciscus Card. de Gambara Episcopus Prænest. promitto, voveo, & juro.

Ego M. S. Card. ab Altemps promitto, voveo, & juro.

Ego Innocentius Avalus Card. de Aragonia promitto, voveo, & juro.

Ego Marcus Antonius Card. Columna promitto, jura, & voveo.

Ego P. Card. Sanctacrucius promitto, voveo, & juro.

Ego

Ego Fr. Michael Bonellus Card. Alexandrinus promitto, voveo, & juro.

Ego Ludovicus Madrucus Card. promitto, voveo, & juro.

Ego N. Card. Senonensis promitto, voveo, & juro.

Ego Julius Antonius Card. Sanctæ Severinæ promitto, voveo, & juro.

P. Card. Cæsius promitto, voveo, & juro.

Ego Hieronymus Card. Rusticuccijs promitto, voveo, & juro.

Ego Hieronymus Card. Albanus promitto, voveo, & juro.

Ego Philippus Boncompagnus Card. S. Sixti promitto, voveo, & juro.

Ego Hieronymus Card. Simoncellus promitto, juro, & voveo.

Ego P. Card. Deza promitto, voveo, & juro.

Ego Antonius Card. Caraffa promitto, voveo, & juro.

Ego Jo: Antonius Card. Sanctorum Quatuor promitto, voveo, & juro.

Ego Jo: Baptista Card. S. Marcelli promitto, voveo, & juro.

Ego Vincentius Card. Montis Regalis promitto, voveo, & juro.

Ego Scipio Card. Lancellottus promitto, voveo, & juro.

Ego Vincentius Cardinalis Gonzaga promitto, voveo, & juro.

Ego Henricus Card. Cajetanus promitto, voveo, & juro.

Ego Jo. Baptista Card. Castruccijs promitto, voveo, & juro.

Ego Federicus Cardinalis Cornelius promitto, voveo, & juro.

Ego Dominicus Card. Pinellus promitto, voveo, & juro.

Ego Hippolytus Card. Aldobrandinus promitto, voveo, & juro.

Ego Decius Cardinalis Azzolinus promitto, voveo, & juro.

Ego Ferdinandus Cardinalis de Medicis promitto, voveo, & juro.

Ego Philippus Card. Vostavillanus promitto, voveo, & juro.

Ego Franciscus Card. Sfortia promitto, voveo, & juro.

Ego Alexander Card. Montaltus promitto, juro, & voveo.

CONSTITUTIO SIXTI QUINTI

*De decies alteris centenis millibus nummum aureorum
in Arce S. Angeli depositis, nullo unquam tempore,
nisi in præscriptis casibus, certaue desuper
servata forma depromendis.*

SIXTUS EPISCOPUS
SERVUS SERVORUM DEI
Ad perpetuam rei memoriam.

ANNO superiore decies centena millia num-
mum aureorum in Pontificia S. Angeli Ar-
ce, & certo sanctiori ærario repositimus,
& collocavimus, ac de illis asservandis, ac
nunquam nisi certis præscriptis casibus promendis,
& erogandis, Constitutionem perpetuò valituram
edidimus.

Verum, cum ob culpas, peccataque nostra multiplicia, quibus divinam Majestatem in dies magis iracundiam provocamus, usque eò necessitates superiùs enarratæ multiplicentur, periculaque Gregi Dominico impendentia adaugeantur, ut illis, nec dum prioris pecuniæ collectione, satís provisum esse videatur. Nos quamvis in omnibus difficultatibus, curisque nostris, in Dei Omnipotentis auxilio spem nostram fixam habeamus, ad illiusque opem (qui nisi custodierit Civitatem, frustra vigilat, qui custodit eam) ex intimo cordis affectu confugiamus, tamen ab eo ipso Pastorum Principe Christo frequenter admoniti, ut pro ovibus nostræ fidei creditis, earumque salute, & utilitate, modis omnibus vigilemus, facere non possumus, pro nostro Pastoralis munere, in hac quoque parte obeundo, quin humanis etiam consiliis, ac viribus (pro eo ac nobis ab eodem clementissimo Domino elargitum est) ad tot mala, periculaque pulsanda, nova quotidie præsidia conaremur. Quamobrem alia decies centena millia aureorum nummum, non ad nostra, aut cujusque nostrorum privata commoda, sed ad publicum bonum, ad Sanctæ Romanæ Ecclesiæ, cui Deo auctore præsidemus, defensionem, ad Fidei Catholicæ conservationem, ac propagationem, nostra sedulitate, ac frugalitate collegimus, quæ eadem in Arce, ut priora altera decies centena millia reponi, asservari, nec inde amoveri, erogare,

F

nisi

nisi in supradictis expressis necessitatibus, eodem planè modo volumus. Motu proprio igitur, & ex certa nostra scientia, ac habita super hoc cum venerabilibus Fratribus nostris Sanctæ Romanæ Ecclesiæ Cardinalibus matura deliberatione, de eorum consilio, & unanimi consensu, hac præsentì nostra perpetuò valitura Constitutione, dicta alia decies centena millia aureorum nummùm in eadem Arce nostra Pontificia S. Angeli, & sanctiori ærario nunc recondimus, reponimus, & collocamus, ac Christo Domino nostro, Beatæ Mariæ semper Virgini, & Sanctis Apostolis Petro, & Paulo offerimus, & dicamus, iisdem omnino legibus, & conditionibus, quæ in nostra superiùs descripta Constitutione præscriptæ, ac præfinitæ sunt.

Declarantes nostræ voluntatis, mentisque esse, ut quod in ipsa Constitutione, de recuperatione Terræ Sanctæ, & de generali expeditione contra Turcas dictum fuit, idem etiam locum obtineat, quoad utramque Deo dicatam pecuniæ summam, in recuperatione Regnorum à quibuscunque Catholicæ Romanæ Ecclesiæ hostibus occupatorum, & in expeditione, quam contra eosdem decerni, ac fieri contigerit.

Ubi verò in præscriptis casibus, pecuniarum aliquid summi necessitas postulaverit, volumus, ut de tota summa, tam superiori anno, quàm etiam nunc reposita, hoc prorsus, & non alio modo pecuniz

cuniæ fumantur , & erogentur , nimirum ut in Consistorio secreto præscriptarum necessitatum qualitate , ac rerum , & temporum ratione diligenter perpenſa , atque ita cogente , non duarum ex tribus partibus Cardinalium , ſicuti in priori Conſtitutione noſtra ſancitum erat , ſed trium ſaltem ex quatuor partibus Cardinalium , qui in Conſiſtorio interfuerint , conſenſu , decreto , & ſubſcriptione adhibitis , ex binis decies centenis millibus aureorum nummum à nobis reſoſitis , non ultra quartam partem , ideſt , non ultra quingenta millia nummum promi liceat , & ea quidem quingentorum millium ſumma , non tota ſimul , ſed paulatim , moderatè , & ſucceſſivè depromatur per certas portiones , quæ in eodem Conſiſtorio , in quo de tota re deliberabitur à tribus partibus Cardinalium , ut dictum eſt , omnibus diligenter examinatis , decretæ , & præſinitæ fuerint. Quod ſi ipsis quingentis millibus erogatis , & conſumptis , præſcripti caſus , & neceſſitates novam impenſam requiſierint , tunc iterum propoſita , & adhibita in Conſiſtorio conſultatione , ſi conſenſus , decretum , & ſubſcriptio trium ex quatuor partibus Cardinalium , ut ſupra dictum eſt , acceſſerint , aliam ſummam , non tamen quingenta millia aureorum excedentem , illamque pariter non ſtatim totam , ſed moderatione ea ſervata , eoque , quem duximus modo limitatam , & præſinitam , ſumi poſſe permittimus .

Cæterùm statuimus , prout alia nostra Constitutione ordinatum est , ut partes , & portiones pecuniæ supradictæ , quæ in aliquo ex præmissis casibus sumptæ fuerint , cùm ejus impensæ faciendæ ratio cessaverit , omninò in ærarium , unde depromptæ fuerint , integrè restitui , ac reponi primo quoque tempore debeant .

Has autem Deo dicatas pecunias , nullo unquam tempore , nisi aliqua ex iis , quas duximus , necessitas urgeat , & requirat , neque in totum , neque ex aliqua parte amoveri , erogarive à nobis quovis modo posse volumus , eamque amovendi , & erogandi potestatem , & facultatem à nobis ipsis abdicamus ; idque Successores nostros Romanos Pontifices , proposito sibi tremendo judicio , in quo summo Patrifamilias de administrata villicatione exquisita reddetur ratio , eodem planè modo facturos esse confidimus , & speramus . Tandemque Deo per præsentem oblatam pecuniam , unà cum illa priori , nos integram , ut dictum est , conservaturos esse , ac perinde omnino ac res , & bona Ecclesiæ immobilia nos habituros promittimus , juramus , & vovemus , & sicuti omnes Cardinales præsentēs , & infrascripti voverunt , promiserunt , ac jurarunt , ita per alios Cardinales nunc , & pro tempore existentes , ac per Successores nostros , quando , & quoties superiùs ordinatum fuit , & juxta formam nunc traditam jurari , promitti , ac voveri debere decernimus ,

De-

Denique cætera omnia , & singula in eadem Constitutione suprascripta , quomodolibet expressa , constituta , & decreta , etiam in hac pecunia à nobis , ut præfertur , nunc collocata , & recondita , & quoad præsentēs nostras literas , in omnibus , & per omnia , penitus , omnino , & inviolabiliter observari , & locum habere volumus , præcipimus , & mandamus .

Si quis autem fortasse nostrorum Successorum , id quod minimè credimus , huic nostræ Constitutioni omnino , aut aliqua ex parte derogare , aut contra statuere voluerit , aut depromptam pecuniam , ut supra sancitum est , in idem ærarium non restituerit , admonemus , post derogantis , aut contra statuentis , contraque facientis obitum , liberum esse Successoribus ea derogatione , & quibuscvis aliis , quæ contra statuta sunt , non obstantibus , pro pecunia contra hujus Constitutionis præscriptum sumpta , ac deprompta recuperanda , tam adversus Pontificis derogantis , & contra facientis posteros , seu conjunctos omnes , quàm adversus Cardinales idem consentientes , aut quoscunque eorum hæredes , quibus ab ipso Pontifice , aut Cardinalibus bona quovis titulo , vel quavis ratione obvenierint , agere , & possessionem bonorum , quæ ad ipsos posteros pervenerint , adipisci , retinerique donec quicquid pecuniæ depromptum est , id omne in ærarium referatur , & restituatur , eaque ipsa bona , si quo modo , ut supra
dictum

dictum est, à forma per nos constituta recedi contigerit, hujusmodi obligationi, atque oneri obnoxia esse volumus, singulis, quæ in nostris literis adversari possent, vel quoquo modo obesse penitus remotis, ac non obstantibus.

Nulli ergo hominum liceat hanc paginam nostræ reconditionis, repositionis, collocationis, oblationis, dicationis, declarationis, permissionis, statuti, voluntatum, abdicationis, promissionis, jamenti, voti, decreti, præcepti, mandati, & admonitionis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctum Petrum anno Incarnationis Dominicæ millesimo quingentesimo octuagesimo septimo octavo Idus Novembris, Pontificatus nostri anno tertio.

Ego SIXTUS Catholicæ Ecclesiæ Episcopus.

Ego A. Card. Farnesius Vice-Canc. Episcopus Hostien.

Ego Jac. Card. Sabellus Episcopus Portuen.

Ego Jo: Ant. Episcopus Tuscul. Card. Sancti Georgii.

Ego Alph. Card. Gesualdus Episcopus Albanen.

Ego Inn. Avalus Card. de Arag. Episcopus Sabinen.

Ego Marcus Antonius Card. Columna Episc. Prænestinus.

Mar.

Marcus Syticus Card. ab Altemps tituli Sanctæ Mariæ Trans-Tiberim.

Ego Ptolomæus Card. Comensis tit. Sanctæ Mariæ de Populo.

Ego Prosper Card. Sanctacrucius tit. Sancti Clementis.

Ego Gabr. Card. Paleottus tit. S. Laurentii in Lucina.

Ego Fr. Michael Bonellus Card. Alexandrinus tit. Sanctæ Mariæ super Minervam.

Ego Ludovicus Card. tit. S. Anastasiæ Madrucius.

Ego Nic. de Sens tit. Sanctæ Praxedis.

Julius Ant. Card. Sanctæ Severinæ tit. S. Bartholomæi in Insula.

Ego Hieronymus Card. Rusticuccijs tit. S. Susannæ.

Ego Jo: Hieron. Card. Alban. tit. S. Joannis ante Portam Latinam.

Ego P. Card. Deza tit. S. Hieron. Illyricorum.

Ego Ant. tit. SS. Joannis, & Pauli Card. Caraffa.

Ego Jo: Ant. Card. SS. Quatuor.

Ego Jo: Baptista Card. tit. S. Marcelli.

Ego Franciscus Card. de Joyeuse tit. S. Silvestri.

Ego Ant. M. Card. Salviatus tit. S. Mariæ de Pace.

Ego Aug. Card. de Verona tit. S. Marci.

Ego Vincentius tit. S. Mariæ in Via Card. Montis Regalis.

Ego Philippus Card. Spinula tit. S. Sabine.

Ego Scipio Card. Lancellottus tit. Sancti Salvatoris in Lauro.

Ego

Ego Vincentius Card. Gonzaga tit. Sancti Alexii.

*Ego Henricus tit. S. Pudentianæ Card. Cajetanus
Camerarius.*

*Ego Jo. Bapt. Card. Castrucci tit. S. Mariæ in
Araceli.*

*Ego Federicus Card. Cornelius tit. S. Stephani in Mon-
te Cælio.*

Ego Dominicus tit. S. Laurentii Card. Pinellus.

*Ego Hippolytus Card. Aldobrandinus tit. S. Pancra-
tii Major Pœnitentiarius.*

Ego Hier. tit. S. Petri ad Vincula Card. de Ruvere.

*Ego Fr. Hier. Card. Ascul. tit. S. Thomæ in Pa-
rione.*

*Ego Fr. Constantius Card. Sarnanus tit. S. Petri
in Monte aureo.*

*Ego Gulielmus Alanus tit. S. Martini in Montibus
Card. Ang.*

Ego Alexander Card. Montaltus Diac. S. Eustachii.

*Ego Hieron. Card. Matthæus Diac. S. Mariæ in Cof-
medin.*

Ego Benedictus S. Agathæ Diac. Card. Justinianus.

*Ego Ascanius SS. Viti, & Modesti, & Crescent. Dia-
conus Card. Columna.*

CONSTITUTIO SIXTI QUINTI

*De tertiis decies centenis millibus nummum aureorum
in Arce S. Angeli repositis, inde nullo unquam
tempore, nisi in præscriptis casibus, certa-
que desuper servata forma depromendis.*

SIXTUS EPISCOPUS
SERVUS SERVORUM DEI
Ad perpetuam rei memoriam.

ETSI nos permultis superiorum temporum experimentis edocti, satis superque intelleximus, quot, quantisque casibus humana sit obnoxia conditio, mens tamen nostra divina quadam inspiratione à Patre luminum Deo est tandem admonita, ad ea pro viribus paranda præ-

G Gdia,

fidia, quibus Beati Petri Navis, cujus gubernacula nobis, licet immeritis, commissa sunt, inter varias miserabilis hujus vitæ procellas tuta, incolumisque servari posset. Proinde cum ad res difficiles explicandas, ac maxima pericula, gravissimaque discrimina evitanda, pecuniarum copiam quamplurimum conferre dignosceremus, primo nostri Pontificatus anno decies centena nummum aureorum millia; altero verò altera itidem decies centena millia, in certum, sanctiusque ærarium (quod in Pontificia S. Angeli Arce constitutum est) summa diligentia, industriaque retulimus; ac de utrisque decies centenis millibus nummum perpetuo asservandis, nec ullo inde unquam tempore, nisi ad præscriptos, maximèque necessarios usus depromendis, & erogandis binas Constitutiones edidimus, quarum tenores tametsi hic pro insertis, & expressis haberi volumus, illos nihilominus etiam de verbo ad verbum, quatenus opus sit, inseri mandamus.

Verumtamen cum adversus ejusdem Principis Apostolorum Navem novos quotidie concitari fluctus, ac Turcarum præcipue Tyrannum, atrocissimum Christiani nominis hostem, ab immanissimis Hæreticis, & Schismaticis (qui jam non amplius de fide, aut de religione contendunt; sed de Catholicorum pernicie, & interitu dies, noctesque cogitant) sollicitari audiamus, ut ingentem instruat Classem, totisque viribus in Christianorum exitium

infur-

insurgat, eosdemque Ecclesiæ Dei perduelles nihil in dies enixius moliri, quam ut inconfutilem Christi JESU Redemptoris Tunicam (hoc est Catholicam Ecclesiam) discindant, ac Regna, & Populos à Christianis Principibus teterrimo impietatis eorum schismate alienent; Quocirca ingentes, ac luctuosas turbas in florentissimo Galliæ Regno jamdiu excitatas quotidie magis alere, atque conflare non desistunt, atque adeo in variis Germaniæ locis equitum, pedumque collecta manu passim, ac impunè acerbiores injurias, gravioraque damna minitantur. Venerabiles Fratres nostri S. R. E. Cardinales, quibuscum à nobis hac de re sæpius actum est, animadvertentes, majoribus malis ingruentibus, majori etiam pecuniarum præsidio Apostolicæ Sedi opus esse, opere pretium duxerunt, ut à nobis alia decies centena nummum aureorum millia, præter bina superiora Pontificio in ærario collocarentur.

Nos verò, qui non ignoramus, & Præsidem Civitatis frustra vigilare, nisi eam Dominus custodiat, & ipsum Dominum tentari, nisi qui præest vires, nervosque omnes intendat, ut ea faciat, & præstet, quæ ad Civitatem tuendam, servandamque pertineant, eorundem Fratrum nostrorum consilium summopere probantes, clementissimi Dei benignitate freti, ad hujusmodi pecuniarum summam cogendam, eamque in idem Pontificium ærarium referendam, mentem omnem, animumque adjecimus.

Motu proprio igitur , & ex certa nostra scientia , ac habita super hoc cum eisdem Venerabilibus Fratribus nostris S. R. E. Cardinalibus in Consistorio nostro secreto matura deliberatione , de eorum consilio , & unanimi consensu , hac præsentì nostra perpetuò valitura Constitutione , dicta alia tertio loco decies centena millia nummum aureorum in eadem Arce nostra Pontificia S. Angeli , & sanctiori ærario nunc recondimus , reponimus , & collocamus , ac Christo Domino nostro , Beatæ Mariæ semper Virgini , & Sanctis Apostolis Petro , & Paulo offerimus , & dicamus , iisdem omnino legibus , & conditionibus , quæ in prioribus nostris superiùs descriptis Constitutionibus præscriptæ , & præfinitæ sunt . Declarantes nostræ voluntatis , mentisque esse , ut quod in ipsis prioribus Constitutionibus de recuperatione Terræ Sanctæ , & generali expeditione contra Turcas dictum fuit , iidem etiam locum obtineant , quoad omnes has Deo dicatas pecuniæ summas , in recuperatione Regnorum à quibuscumque Catholicæ Romanæ Ecclesiæ hostibus occupatorum , & in expeditione , quam contra eosdem decerni , ac fieri contigerit .

Ubi verò in præscriptis casibus pecuniarum aliquid sumi necessitas postulaverit , volumus , ut de tota summa tam superioribus annis , quàm etiam nunc repõsita , hoc prorsus , & non alio modo pecuniæ sumantur , & erogentur ; nimirum ut in Consistorio

secre-

secreto præscriptarum necessitatum qualitate, ac rerum, & temporum ratione diligenter perpensa, atque ita cogente, trium saltem ex quatuor partibus Cardinalium, qui Consistorio interfuerint, sicuti in præinserta Constitutione nostra sancitum est, consensu, decreto, & subscriptione adhibitis, externis decies centenis millibus aureorum nummum à nobis repositis, non ultra sextam partem, idest non ultra quingenta millia nummum promi liceat, & ea quidem quingentorum millium summa non tota simul, sed paulatim, moderatè, & successivè depromatur per certas portiones; quæ in eodem Consistorio, in quo de tota re deliberabitur à tribus partibus Cardinalium, ut dictum est, omnibus diligenter examinatis, decretæ, & præfinitæ fuerint. Quod si ipsis quingentis millibus erogatis, & consumptis, præscripti casus, & necessitates novam impenfam requisierint, tunc iterum proposita, & adhibita in Consistorio consultatione, si consensus, decretum, & subscriptio trium ex quatuor partibus Cardinalium, ut supra dictum est, accesserint, aliam summam, non tamen quingenta millia aureorum excedentem, illamque pariter non statim totam, sed moderatione ea servata, eoque, quem diximus, modo limitatam, & præfinitam, sumi posse permittimus. Cæterum statuimus, prout aliis prioribus nostris Constitutionibus ordinatum est, ut partes, & portiones pecuniæ supradictæ, quæ in aliquo ex præmissis ca-

sibus

sibus sumptæ fuerint , cùm ejus impensæ faciendæ ratio cessaverit , omnino in ærarium , unde depromptæ fuerunt , integrè restitui , ac reponi primo quoque tempore debeant .

Has autem Deo dicatas pecunias nullo unquam tempore , nisi aliqua ex iis , quas diximus , necessitas urgeat , & requirat , neque in totum , neque ex aliqua parte amoveri , erogarique quovis modo à nobis posse volumus , eamque amovendi , & erogandi potestatem , & facultatem à nobis ipsis abdicamus . Idque Successores nostros Romanos Pontifices , proposito sibi tremendo judicio , in quo summo Patrifamilias de administrata villicatione exquisita reddetur ratio , eodem planè modo facturos esse confidimus , & speramus . Tandemque Deo per præsentem oblatam pecuniam , unà cum illa priori , nos integram , ut dictum est , conservaturos esse , ac perinde omnino ac res , & bona Ecclesiæ immobilia nos habituros promittimus , juramus , & vovemus , & sicuti omnes Cardinales præsentés , & infra scripti voverunt , promiserunt , ac jurarunt , ita per alios Cardinales nunc , & pro tempore existentes , ac per Successores nostros , quando , & quoties superius ordinatum fuit , & juxta formam nunc traditam jurari , promitti , ac voveri debere decernimus .

Denique cætera omnia , & singula in eadem Constitutione superscripta quomodolibet expressa ,

con-

constituta, & decreta, etiam in hac pecunia à nobis, ut præfertur, nunc collocata, & recondita, & quoad præsentis nostras literas in omnibus, & per omnia, penitus, omnino, & inviolabiliter observari, & locum habere volumus, præcipimus, & mandamus.

Si quis autem fortasse nostrorum Successorum, id quod minime credimus, huic nostræ Constitutioni omnino, aut aliqua ex parte derogare, aut contra statuere voluerit, aut depromptam pecuniam, ut supra sancitum est, in idem ærarium non restituerit, admonemus post derogantis, aut contra statuentis, contraque facientis obitum, liberum esse Successoribus, ea derogatione, & quibusvis aliis, quæ contra statuta sunt, non obstantibus, pro pecunia contra hujus Constitutionis præscriptum sumpta, ac deprompta recuperanda, tam adversus Pontificis derogantis, & contra facientis posteros, seu conjunctos omnes, quàm adversus Cardinales idem consentientes, aut quoscumque eorum hæredes, quibus ab ipso Pontifice, aut Cardinalibus bona quovis titulo, vel quavis ratione obvenerint, agere, & possessionem bonorum, quæ ad ipsos posteros pervenerint, adipisci, retinerique, donec quicquid pecuniæ depromptum est, id omne in ærarium referatur, & restituatur, eaque ipsa bona, si quomodo, ut supra dictum est, à forma per nos constituta recedi contigerit, hujusmodi obligationi, atque oneri

obno.

obnoxia esse, & addicta volumus, singulis, quæ in nostris literis adversari possent, vel quoquo modo obesse, penitus remotis, ac non obstantibus.

Nulli ergo hominum omnino liceat hanc paginam nostræ reconditionis, repositionis, collocationis, oblationis, dicationis, declarationis, permissionis, statuti, voluntatis, abdicationis, promissionis, juramenti, voti, decreti, præcepti, mandati, & admonitionis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctum Petrum anno Incarnationis Dominicæ millesimo quingentesimo octuagesimo octavo quinto Kalendas Maji, Pontificatus nostri anno quinto.

*Ego SIXTUS Catholicæ Ecclesiæ Episcopus
promitto, voveo, & juro.*

*Ego A. Card. Farnesius Episcopus Ostien. Vice-Cancell.
promitto, voveo, & juro.*

*Ego Jo. Antonius Episc. Card. S. Georgii promitto,
voveo, & juro.*

*Ego Alphonsus Card. Gesualdus Episc. Tuscul. pro-
mitto, voveo, & juro.*

Eg.

Ego Innic. Avalus Card. de Aragonia Episc. Sabinen.
promitto, voveo, & juro.

Ego Ptolomæus Card. Comens. Episc. Albanen. pro-
mitto, voveo, & juro.

Ego Marcus Sytic. Card. ab Altemps tit. S. Mariæ
Trans-Tiber. promitto, voveo, & juro.

Ego P. Card. Sanctacrucius tit. S. Clementis promit-
to, voveo, & juro.

Fr. Michael Bonellus Card. Alexandrin. tit. S. Ma-
riæ super Minervam promitto, voveo, & juro.

Ego Ludovicus Card. Madrucus tit. S. Anast. pro-
mitto, voveo, & juro.

Ego Nic. Card. de Pelleve tit. S. Prax. promitto, vo-
veo, & juro.

Ego Julius Ant. tit. S. Bartholomæi in Insula Card.
S. Severinæ promitto, voveo, & juro.

Ego Hieronymus Card. Rusticuccius tit. S. Susannæ
promitto, voveo, & juro.

Ego Jo. Hieron. Card. Albanus tit. S. Joan. ante Port.
Lat. promitto, voveo, & juro.

Ego Hieron. Card. Simoncellus promitto, voveo, &
juro.

Ego Petrus Card. Deza promitto, voveo, & juro.

Ego Ant. tit. SS. Jo. & Pauli Card. Caraffa promit-
to, voveo, & juro.

Ego Jo. Antonius Card. Sanctorum Quatuor promit-
to, voveo, & juro.

Ego Jo. Bapt. Card. S. Marcelli prom. vov. & juro.
H Ego

Ego Franciscus Card. de Joyeuse tit. SS. Trinit. in Monte Pincio promitto, voveo, & juro.

Ego Julius Card. Cananius tit. S. Eusebii promitto, voveo, & juro.

Ego Nicolaus tit. S. Cæcilie Card. Cremonen. promitto, voveo, & juro.

Ego Ant. Maria Card. Salviatus tit. S. Mariæ de Pace promitto, voveo, & juro.

Ego Aug. Card. Veron. tit. S. Marci promitto, voveo, & juro.

Ego Vincent. tit. S. Mariæ in Via Card. Montis Regalis promitto, voveo, & juro.

Ego Scipio Card. Lancellottus tit. S. Salvat. in Lauro promitto, voveo, & juro.

Ego Henricus tit. S. Pudentianæ Card. Cajetanus S.R.E. Camerar. promitto, voveo, & juro.

Ego Jo. Bapt. tit. S. Mariæ in Araceli Card. Castrucius prom. vov. & juro.

Ego Dominicus tit. S. Laurentii Card. Pinellus promitto, voveo, & juro.

Ego Hippolyt. tit. S. Pancratii Card. Aldobr. Major Pænit. promitto, voveo, & juro.

Ego Hier. tit. S. Petri ad Vincula Card. de Ruvere prom. vov. & juro.

Ego Fr. Hieron. tit. S. Thomæ in Parione Card. Ascul. prom. vov. & juro.

Ego Ant. Maria tit. S. Agnetis in Agone Card. Perusin. prom. vov. & juro.

Ego

Ego Fr. Constan. Card. Sarnanus tit. S. Petri in Monte aureo prom. vov. & juro.

Ego G. Alanus tit. S. Martini Card. Anglican. prom. vov. & juro.

Ego Scipio tit. S. Mariæ de Populo Cardin. Gonzaga prom. vov. & juro.

Ego Ant. Card. Saulius tit. S. Vitalis promitto, voveo, & juro.

Ego Evang. Card. Cusentinus tit. S. Matthæi in Merul. prom. vov. & juro.

Ego Fr. Steph. tit. SS. Marcellin. & Petri Card. Aretinus prom. vov. & juro.

Ego Franc. Card. Sfortia Diac. S. Nicolai in Carcere prom. vov. & juro.

Ego A. Diaconus S. Eustachii Card. Montaltus prom. vov. & juro.

Ego Hieron. S. Mariæ in Cosmedin Diac. Card. Matthæjus prom. vov. & juro.

Ego Benediçt. S. Agathæ Diac. Card. Justinianus prom. vov. & juro.

Ego Ascanius SS. Viti, & Modesti, & Crescen. Diac. Card. Columna promitto, voveo, & juro.

Ego Federicus S. Mariæ in Domnica Card. Borromæus promitto, voveo, & juro.

CONSTITUTIO INNOCENTII NONI

*Confirmatio, & extensio Constitutionis S. Pii Quinti
à Gregorio XIII. Sixto V. & Gregorio XIV. com-
probata de non alienandis, & infeudandis
Civitatibus, & aliis Locis
Sedis Apostolicæ.*

INNOCENTIUS EPISCOPUS
SERVUS SERVORUM DEI
Ad perpetuam rei memoriam.

QUÆ ab hac Sancta Sede, cui licet indigni,
auctore Domino, præsidemus, piè, &
salubriter sancita, & ordinata noscuntur,
ea ut perpetuò firma, illibataque perma-
neant, non solum consensus, approbationis, & in-
novationis nostræ munimine roboranda, sed etiam
decla.

declarationis præsidio, quatenus expedire visum sit, fulcienda censemus; & præcipue muneris nostri esse ducimus ea, quæ à Prædecessoribus nostris Romanis Pontificibus, ad Patrimonii, dignitatis, & amplitudinis Sanctæ hujus Sedis conservationem, & incrementum laudabiliter disposita, & constituta sunt, in nobismetipsis servare, & aliis servanda tradere, & demonstrare.

Sanè fel. rec. Pius Papa Quintus Prædecessor noster de consilio, & assensu Venerabilium Fratrum suorum, tunc S. R. E. Cardinalium optimam, & saluberrimam Constitutionem edidit, & promulgavit.

Quam quidem Constitutionem piæ memoriæ Gregorius XIII. Sixtus V. & Gregorius XIV. Romani Pontifices pariter Prædecessores nostri, sicuti in ea cavetur, servare jurarunt, ac per eorum literas approbarunt, & confirmarunt, & innovarunt, prout in illis plenius continetur.

Nos itaque officii, & conscientiæ nostræ debito satisfacere cupientes, motu proprio, non ad alicujus supplicationem, vel super hoc oblata petitionis instantiam, sed ex certa scientia, meraque deliberatione nostra in hoc primo secreto Consistorio, quod cum Venerabilibus Fratribus nostris Sanctæ Romanæ Ecclesiæ Cardinalibus habemus, Constitutionem prædictam, & omnia in ea contenta auctoritate Apostolica, tenore præsentium confirmamus,

appro-

approbamus, & innovamus, eamque inviolabilis firmitatis robur obtinere, plenamque executionem, & effectum perpetuis futuris temporibus habere decernimus. Ac præterea eisdem motu proprio, scientia, deliberatione, & auctoritate assentientibus, & approbantibus eisdem S. R. E. Cardinalibus.

Declaramus eadem Constitutione prohibitam fuisse, ac prohiberi omnem, & quamcunque infeudationem, & alienationem Civitatum, Terrarum, Oppidorum, & Locorum prædictorum, eidem Sedi tam immediatè, quàm mediatè subjectorum, non solum ne fiat, neve attentetur post eorum devolutionem, sed etiam antequam devolvantur, ac omnem, & quamcunque in perpetuum, vel ad tempus prorogationem, & extensionem infeudationum, investiturarum, ac concessionum de dictis Civitatibus, Terris, & Locis, nondum finitarum, ipsorumque incorporationem, quoad effectum impediendæ alienationis, prorogationis, & extensionis huiusmodi, non à die eorum devolutionis, sed à die ipsius Constitutionis, & etiam antequam illa devolvantur, ipso jure cum omnibus clausulis, & decretis in prædicta Constitutione contentis, Camerae, & Sedi Apostolicæ factam censi.

Insuper volumus, & declaramus, ut promissio, & juramentum præstitum, & præstandum, de servanda eadem præfata Pii Prædecessoris nostri Constitutione per nos, & Romanos Pontifices Suc-

cess-

cessores nostros, ac Sanctæ Romanæ Ecclesiæ Cardinales intelligatur de ipsa Pii Prædecessoris Constitutione, ut supra per nos declarata, & secundum hanc nostram declarationem eandem Constitutionem ad unguem, & inviolatè observari oportere, ac debere, sicuti & nos observaturos esse promittimus, ac sanctè, & solemniter juramus.

Et ita per quoscunque Judices, ordinarios, & delegatos, quavis auctoritate fungentes, etiam Cameræ præfatæ Præsidentes, Clericos, Causarum Palatii Apostolici Auditores, ac Sanctæ Romanæ Ecclesiæ Cardinales, in quavis causa, & instantia sublata eis, & cuilibet eorum, quavis aliter judicandi, & interpretandi facultate, & auctoritate, judicari, declarari, & definiri debere, ac irritum, & inane, si secus super his per quoscunque, quavis auctoritate, scienter, vel ignoranter contigerit attentari.

Ac præsentibus nostras literas in libello, in quo ipsa Constitutio Pii Prædecessoris continetur, ac in libro *Quinterno* appellato, Cancellariæ Apostolicæ, describi mandamus.

Non obstantibus iis, quæ idem Pius Prædecessor voluit non ob stare, cæterisque in contrarium facientibus quibuscunque.

Nulli ergo hominum liceat hanc paginam nostræ approbationis, confirmationis, innovationis, declarationis, voluntatis, decreti, promissionis, juramen-

ramen-

ramenti, & mandati infringere, vel ei ausu temerario contraire. Si quis autem hoc attentare præsumperit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctum Petrum anno Incarnationis Dominicæ millesimo quingentesimo nonagesimo primo pridie Non. Novembris, Pontificatus nostri anno primo.

*Ego INNOCENTIUS Catholica Ecclesiæ
Episcopus.*

Ego Alphons. Episcopus Ostien. Card. Gesualdus.

Ego Innic. Avalus Episcopus Portuen. Card. de Aragonia.

Ego Marcus Antonius Episcopus Prænestinus Card. Columna.

Ego Ptol. Episcopus Tusculan. Card. Comen.

Ego Gabriel Episcopus Sabinen. Card. Paleottus.

Frater Michael Bonellus Episcopus Alban. Card. Alexandrin.

Marcus Syticus Card. ab Altemps.

Ludovicus tit. S. Laurentii in Lucina Presb. Card. Madrucius.

Nic. de Pelleve Card. Presb. tit. S. Praxedis, vulgò Sens.

Julius Antonius Sanctorius tit. S. Bartholomæi in Insula Presb. Card. S. Severinæ.

Hicron.

Hieron. Card. Rusticucci tit. S. Susannæ.

Hieron. Card. Simoncellus tit. S. Priscæ.

Petrus Card. Deza tit. S. Hieronymi.

Alex. Card. Floren. tit. SS. Joannis, & Pauli.

Julius Card. Canianus tit. S. Anastasæ.

Antonius Maria Card. Salviatus tit. S. Mariæ de Pace.

August. tit. S. Marci Card. de Verona.

Ego Vincentius tit. S. Clementis Card. Montis Regalis.

Ego Phil. Card. Spinula tit. S. Sabine.

Ego Georgius tit. S. Sixti Card. de Radziwil.

Ego Simeon Card. de Terranova tit. S. Mariæ Angelorum.

Ego Scipio tit. Sancti Salvatoris in Lauro Card. Lancellottus.

Ego Henricus tit. S. Pudentianæ Card. Cajetanus S. R. E. Camerarius.

Ego Jo. Bapt. Card. Cassruccius.

Ego Dominicus tit. S. Chrisogoni Card. Pinellus.

Ego Hyppol. tit. S. Pancratii Presb. Card. Aldobrandinus Major Pœnit.

Ego Hieronymus tit. S. Petri ad Vincula Card. de Ruvere.

Ego Frater Hieron. tit. S. Mariæ super Minervam Presb. Card. Ascul.

Ego Ant. Maria tit. S. Agnetis in Agone Card. Perus.

Ego Frater Constantius Card. Sarnanus tit. S. Petri in Monte aureo.

Ego Gulielmus Card. Alanus tit. Sancti Martini in Montibus.

Ego Scipio tit. Sanctæ Mariæ de Populo Card. Gonzaga.

Ego Antonius tit. S. Stephani Card. Saulius.

Ego Evang. tit. S. Matthæi in Merulan. Card. Cusentinus.

Ego Jo. Franc. tit. Sanctæ Mariæ in Via Card. Maurocenus.

Marianus tit. SS. Marcellini, & Petri Presb. Card. de Camerino.

Ego Fr. Gregorius à Montelparo Card. tit. S. Augustini.

Ego P. Card. Sfondratus tit. S. Cæcilie.

Ego Benedictus Card. Justinianus tit. S. Marcelli.

Ego Augustinus tit. S. Laurentii in Pane, & Perna Presb. Card. Cusanus.

Ego Franc. Maria Card. SS. Quirici, & Julitæ.

Ego Octavius Card. Sancti Joannis ante Portam Latinam.

Ego Franc. Card. Sfortia Diac. Sanctæ Mariæ in Via lata.

Ego A. S. Laurentii in Damaso Diaconus Card. Mortaltus S. R. E. Vice-Cancellarius.

Ego Hieronymus S. Eustachii Diaconus Card. Matthæjus.

Ego

*Ego Ascanius Sanctæ Mariæ in Cosmedin Diacon.
Card. Columna.*

*Ego Federicus Sancti Nicolai in Carcere Diac. Card.
Borromæus.*

*Ego Guido SS. Cosmæ, & Damiani Diac. Card.
Pepulus.*

Ego Odoardus S. Adriani Diac. Card. Farnesius.

*Ego Octavius Sancti Georgii in Velabro Diac. Card.
de Aquarova.*

Ego Flaminius S. Mariæ in Domnica.

CONSTITUTIO CLEMENTIS OCTAVI

*Comprobatio Constitutionis Pii V. ab Innocentio IX.
declaratæ, de non alienandis, & infeudandis
Locis, & Civitatibus Sanctæ Romanæ Ecclesiæ
cum alterius declarationis adjectione.*

CLEMENS EPISCOPUS
SERVUS SERVORUM DEI
Ad perpetuam rei memoriam.

AD Romani Pontificis curam, & sollicitudinem pertinet hoc quoque inter cætera non mediocri studio providere, ut quæ ad conservandam Sanctæ hujus Sedis temporalem ditionem bona, & jura, salubriter sancita fuerunt, ea & ab ipso, & ab aliis inviolata serventur.

Alias

Alias siquidem felicitis recordationis Pius Papa Quintus Prædecessor noster literas edidit in hæc verba

Quæ quidem Constitutio uti optima, & ad retinendam Sanctæ Romanæ Ecclesiæ dignitatem planè salutaris approbata, confirmata, & innovata fuit ab iis, qui sequuti sunt, Prædecessoribus nostris; piæ nimirum memoriæ Gregorio XIII. Sixto V. & Gregorio XIV.

Et novissimè ab Innocentio IX. qui etiam de Venerabilium Fratrum suorum, tunc Sanctæ Romanæ Ecclesiæ Cardinalium consilio, & assensu, de quorum numero nos quoque tunc eramus, declaravit eadem Constitutione prohibitam fuisse, & prohiberi omnem, & quamcunque infeudationem, & alienationem Civitatum, Terrarum, Oppidorum, & Locorum Sedi Apostolicæ tam mediatè, quàm immediate subjectorum, non solum ne fiat, neve attentetur post eorum devolutionem, sed etiam antequam devolvantur, ac omnem, & quamcunque in perpetuum, vel ad tempus prorogationem, ac extensionem infeudationum, investiturarum, & concessionum de dictis Civitatibus, Terris, Oppidis, & Locis nondum finitarum, ipsorumque incorporationem, quoad effectum impediendæ infeudationis, alienationis, prorogationis, & extensionis hujusmodi non à die eorum devolutionis, sed à die ipsius Constitu-

tionis,

tionis, etiam antequam illa devolvantur, ipso jure, cum omnibus clausulis, & decretis in prædicta Constitutione contentis, Camera, & Sedi Apostolicæ factam censi; adjecto etiam decreto, & declaratione, ut promissio, & juramentum præstitum, & præstandum de servanda eadem Pii Prædecessoris nostri Constitutione, per ipsum Innocentium, & Successores suos Romanos Pontifices, ac prædictos Sanctæ Romanæ Ecclesiæ Cardinales, intelligatur de ipsa Pii V. Prædecessoris Constitutione, per eum ut supra declarata, & secundum hujusmodi declarationem, eandem Constitutionem ad unguem, & inviolabiliter observari oportere, ac debere, sicuti etiam se servaturum esse promisit, ac sanctè, & solemni more juravit, prout in ejusdem Innocentii Prædecessoris, sub datum pridie Non. Novembris Pontificatus sui anno primo, expeditis literis clariùs continetur.

Quare nos cum primùm ad Apostolicæ dignitatis fastigium divina providentia vocati sumus, id ipsum ad exequendum nostri Pastoralis officii debitum præcipuè pertinere existimantes, præinfertas Pii Prædecessoris literas, ac omnia in eis contenta, etiam juxta declarationem prædictam, per ipsum Innocentium Prædecessorem factam, ac desuper confectarum literarum tenorem, quem pariter præsentibus haberi volumus pro expresso, ac ad verbum inserto, auctoritate Apostolica tenore præsentium

com-

comprobamus, confirmamus, & innovamus, easque firmiter, & inviolatè, ac juxta declarationem prædictam nos similiter servaturos esse promittimus, & juramus, atque per eos, ad quos spectat, pariter perpetuò observari præcipimus, & mandamus. Nulli ergo omnino, &c. Si quis, &c.

Datum Romæ apud Sanctum Petrum anno Incarnationis Dominicæ millesimo quingentesimo nonagesimo secundo decimo sexto Kalendas Martii, Pontificatus nostri anno primo.

Sanctissimus D. N. dixit post editam per sanctæ recordationis Pium Papam V. Sanctitatis Suae Prædecessorem de Fratrum consilio Constitutionem de non alienandis Civitatibus, Terris, Oppidis, & Locis sibi, & Apostolicæ Sedi in temporalibus mediâtè, & immediâtè subjectis, etiam ad illud usque tempus in feudum, aut quemvis alienationis titulum dari solitis, ad Sedem prædictam quomodolibet devolutis, & pro tempore devolvendis, gravissimis impositis pœnis contra personas tractantes, aut aliàs verba facientes de hujusmodi Civitatum, Terrarum, Oppidorum, & Locorum infeudationibus, etiam sub pretextu necessitatis, & evidentis utilitatis, sive illas insinuantes, & suadentes, prout in ipsa Constitutione sub dat. 4. Kalen. Aprilis Pontificatus sui anno secundo edita, sæpius postmodum per Prædecessores suos, ac novissimè per Sanctitatem Suam comprobata latius continetur.

Pia

Piæ memoriæ Gregorium XIV. itidem Prædecessorem suum in Consistorio secreto Romæ apud Sanctum Marcum die Veneris 13. Septembris 1591. habito, sententiis tamen S. R. E. Cardinalium, qui tunc aderant, ac de quorum numero etiam Sanctitas Sua erat, minimè requisitis, quin immo multis eorum expresse contradicentibus declarasse, & decrevisse, Pii Prædecessoris Constitutione prædicta non prohiberi feudum nondum devolutum, quando necessitas, & vera Ecclesiæ utilitas postulaverit, iterum infeudari. Nec juramentum in ea præstitum, similem casum comprehendere, ac neminem licite jurare posse, quod contra necessitatem, aut evidentem utilitatem Ecclesiæ sit; sicque prædictam Constitutionem intelligendam judicasse, ac definitivisse, itaut, ut nemini de ea postea aliter, quàm tunc ab ipso declaratum fuit; loqui, & scribere liceret, prout in eodem decreto, & declaratione plenius continetur.

Verum quia re ipsa compertum est, quod ferè omnes alienationes Terrarum, Civitatum, Oppidorum, & Locorum hujusmodi hæcenus factæ, ex quibus magna læsio, & imminutio patrimonii, ac estimationis S. R. E. sequuta est, etiam sub prætextu, & colore veræ, & evidentis necessitatis, vel utilitatis Prædecessoribus Sanctitatis Suæ insinuatæ fuerunt, cum tamen vix ulla necessitas excogitari possit, cui ex aliis bonis, aut redditibus, & pro-

ven-

ventibus, quàm Constitutione prædicta alienari prohibitis subveniri nequeat, vix etiam ulla dari possit utilitas, cui non præponderet recuperatio, & realis reintegratio in Patrimonium S. R. E. Civitatum earundem, & Locorum huc usque alienatorum; cùmque huiusmodi casus absolutæ necessitatis, aut veræ, & evidentis utilitatis facilius mente, atque animo concipi, & effingi, quàm usu venire possint, multò magis expedire omnem prorsus alienationum, & investiturarum, prorogationum, & aliarum concessionum quomodocunque, & quibuscunque causis, & prætextibus attentandi viam omnino præcludere, quàm ob rarissimos casus, qui vix unquam contingere possunt, apertam relinquere, cùmque lucrum in tempore negligere, maximum quandoque sit Ecclesiæ lucrum, utiliùs esse radices omnes, ex quibus huiusmodi alienationes provenire valeant, penitus evel-
lere, quàm ex eo, quod aliquando possit earum aliqua utilis esse, occasionem præbere, ut multæ præjudiciales, & damnosæ fiant, cui absurdo, atque incommodo, ipsum Pium Prædecessorem præfatum dicta Constitutione non immeritò occurrere voluisse, qui longè plures, & graviores jacturas ex multis perniciosis distractionibus sequi posse censuit, quàm utilitates ex paucissimis, si quæ unquam contingerent, fructuosæ. Proinde Sanctitas Sua habita super hoc cum Venerabilibus Fratribus S. R. E. Cardinalibus deliberatione matura, & singulorum auditis sententiis,

de eorum consilio , & unanimi assensu Decretum , & declarationem superiùs memoratam felicitis recordationis Gregorii XIV. tanquam destruens prædicti Pii Constitutionem , alienandique occasionem præbens , ac minimè necessariam , & desuper forsitan confectas literas , quarum omnium tenores haberi voluit pro expressis , ac ad verbum insertis , auctoritate Apostolica revocavit , abrogavit , cassavit , & annullavit , perinde si nunquam emanassent .

Declarans dicta Constitutione prohiberi Civitatum , Terrarum , Oppidorum , Feudorum , & Locorum in ea contentorum , tam quæ nunquam antea in feudum concessa , quàm quæ aliàs etiam sæpius alienata , vel infeudata , ac postmodum devoluta , aut etiam nondum devoluta fuerunt , alienationes , infeudationes , prorogationes , & extensiones investiturarum , feudorum , & concessionum etiam ex causa necessitatis , aut evidentis , & veræ utilitatis facta , & faciendas . Juramentum quoque super ejusdem Constitutionis observationem per Sanctitatem Suam , & Successores suos , ac Sanctæ Romanæ Ecclesiæ Cardinales præstitum , & præstandum , casum hunc necessitatis , etiam absolutæ , & evidentis , & veræ utilitatis omnino comprehendere ; nec propterea aliquid illicitum jurari , aut quod contra necessitatem , & utilitatem Ecclesiæ sit , sed quod rationi consonum , atque è re illius
est,

est, ac summopere conducit; prout eadem auctoritate declaravit, statuit, & decrevit cum clausulis, & derogationibus opportunis.

Actum Romæ in Monte Quirinali die vigesima sexta Junii millesimo quingentesimo nonagesimo secundo in Consistorio secreto.

CONSTITUTIO GREGORII XV.

*Pro applicatione emolumenti Annuli Cardinalitii
favore Sacræ Congregationis de Propa-
ganda Fide.*

GREGORIUS EPISCOPUS
SERVUS SERVORUM DEI
Ad perpetuam rei memoriam.

ROMANUM decet Pontificem ex Pastoralis officii debito ad ea, per quæ Congregationum quarumlibet, præsertim ad Fidei Catholicæ propagationem institutarum necessitatibus, & indigentis occurritur, libenter intendere, ac in his ejusdem officii sui partes favorabili-

ter interponere , prout conspicit in Domino salubriter expedire .

Aliàs siquidem nos certis rationabilibus de causis emolumenta ratione Annulorum Cardinalitiorum per hæredes Sanctæ Romanæ Ecclesiæ Cardinalium vita functorum Camera nostræ Apostolicæ solvi solita , Basilicæ Sancti Joannis Lateranensis de Urbe ad certum tunc expressum , & nondum elapsum tempus , Apostolica auctoritate concessimus , & elargiti sumus , prout in literis Apostolicis sub Annulo Piscatoris desuper confectis plenius continetur .

Nunc verò attendentes Congregationem Venerabilium Fratrum nostrorum ejusdem Sanctæ Romanæ Ecclesiæ Cardinalium , per nos hodie pro Fidei Catholicæ propagatione institutam , sufficientibus redditibus , & proventibus ad opus tam pium necessariis , & opportunis minimè suffultam reperiri : ac illi , ut onera hujusmodi faciliùs perferri valeant , de alicujus subventionis auxilio providere volentes ; necnon emolumentorum hujusmodi quantitates , ac valores etiam annuos , scripturarumquæ super præmissis confectarum veriores , ac totos tenores , ac datas præsentibus pro expressis habentes . Motu proprio , non ad alicujus instantiam , sed de certa scientia , & mera liberalitate , ac matura deliberatione nostris , & de Apostolicæ potestatis plenitudine omnes , & singulas donationes , elargitiones , applicationes , & concessionem , seu quasvis alias dispo-

fitio.

fitiones de dictis emolumentis , seu eorum juribus prædictæ , seu quibuscumque aliis Basilicis , vel aliis Locis piis quomodolibet qualificatis , & nuncupatis hætenus quomodolibet , & sub quorumvis verborum expressionibus , formis , & perpetuò , vel ad tempus , per nos , seu quoscunque Romanos Pontifices Prædecessores nostros , etiam motu simili , ac Consistorialiter factas , aliaque jura illis , seu etiam aliis Urbis Basilicis , vel Locis piis hujusmodi , ex prædicta donatione , vel alia etiam quantumvis iusta , & rationabili causa , vel occasione competentia , ac quascunque literas Apostolicas forsan desuper confectas , & in eis contenta quæcunque , quorum omnium tenores præsentibus pro expressis , & insertis haberi volumus , Apostolica auctoritate tenore præsentium perpetuò revocamus , cassamus , extinguimus , & annullamus , nulliusque roboris , vel momenti fore , & esse declaramus , necnon emolumenta Annulorum Cardinalitiorum hujusmodi , quæ Cameræ nostræ Apostolicæ , five iis , quibus applicata fuerant , ab hæredibus Cardinalium defunctorum debebantur , & solvebantur , prædictæ Congregationi cum omnibus , & singulis juribus , & actionibus in perpetuum donamus , concedimus , & applicamus ; itaut liceat Sanctæ Romanæ Ecclesiæ Cardinalibus nunc , & pro tempore existentibus Congregationis hujusmodi , seu ab illis deputatis , vel eorum Ministris præfata emolumenta propria auctoritate , etiam

per

per mandata ab antiquiore Congregationis hujusmodi Cardinali simpliciter, & de plano, ac sine strepitu, & figura Judicii, ac manu Regia, decernenda, & relaxanda, exigere, levare, ac illa penes Montem Pietatis deponere, seu in tot Locis Montium non vacabilium, aut aliàs quovis modo arbitrio dictæ Congregationis ad effectum illa in pios usus, & necessitates ipsius Congregationis similiter ejus arbitrio, & prout ipsis melius videbitur expendenda, & eroganda investire.

Insuper ut Venerabiles Fratres nostri Sanctæ Romanæ Ecclesiæ Cardinales, qui nunc vivunt, hoc pium, & laudabile opus adjuvare possint, volumus, & similiter Apostolica auctoritate decernimus, & declaramus, quod si aliqui ex dictis Cardinalibus in eorum vita emolumenta ratione sui Annuli Cardinalitii prædictæ Congregationi realiter, & cum effectum tradiderint, vel qui de cætero tradent, & assignabunt, hæredes Cardinalis ipsius vita functi, seu causam ab eo habentes, vel habituri, ad eorundem emolumentorum præstationem, vel solutionem minimè teneantur, nec ad id cogi, vel compelli possint, quinimmo pro majori illorum securitate, dilecti Filii Sanctæ Romanæ Ecclesiæ Thesaurarius, Camerarius, aut alii Officiales Cameræ Apostolicæ pro tempore existentes, ad quos spectabit, statim atque ipsis constiterit, Cardinales, seu hæredes hujusmodi emolumenta prædicta eidem Congregationi, ut præfertur, solvisse; eosdem Cardina-

les,

les, seu hæredes per cedulam publicam, etiam in amplissima forma ejusdem Camerae, etiam perinde ac si emolumenta hujusmodi sibi persoluta fuissent; de solutis quietare, & in eventum cujuscumque molestationis, eandem Cameraam ad pecuniarum eorundem emolumentorum ratione solutarum restitutionem obligare debeant: Nos enim eos ab alia emolumentorum hujusmodi assignatione, traditione, & effectuali consignatione absolvimus, & quietamus mandantes, & in virtute sanctæ Obedientiæ districtè præcipiendo inhibentes dilectis Filiis modernis, & pro tempore existentibus ejusdem Sanctæ Romanæ Ecclesiæ Camerario, Vice-Camerario, Thesaurario, ac Clericis Præsidentibus, necnon Camerae Apostolicæ Commissario, & Officialibus; ne ex emolumentis hujusmodi ullam pecuniarum quantitatem ad certam rationem pro quolibet centenario, & anno per eos forsan percipi solita, aut regalia, ut vocant; vel quicquam aliud quovis prætextu, colore, vel ingenio, etiam ratione stipendii, seu salarii prætere, habere, consequi, aut exigere possint; sed ut easdem præsentis literas firmiter, & inviolabiliter observent, ac ab omnibus inconcussè observari faciant, & procurent. Immo semper, & quodocunque illis constiterit prædictos Cardinales, seu ipsorum hæredes hujusmodi emolumenta Annuli prædictæ Congregationi solvisse; statim si petatur quietantia in amplissima forma, tanquam si eidem Camerae Apo-

sta.

stolicæ soluta essent, expedire debeant; & ipsa Camera in casu molestiæ, ut præfertur, ad restitutionem ipsis Cardinalibus, seu eorum hæredibus faciendam teneatur: Non permittentes, ipsam Congregationem, illiusque personas, & Ministros super dictorum emolumentorum consequutione à quoquam publicè, vel occultè, directè, vel indirectè, quovis quæsito colore, vel ingenio impediri, molestari, aut inquietari.

At decernentes præsentis literas, etiam ex eo, quod Capitulum, & Canonici dictæ Basilicæ Lateranensis, vel quicumque alii in præmissis, quomodolibet interesse habentes, seu habere prætendentes, vel alii, ad quos forsan spectat, & pertinet, aut pro tempore spectabit, & pertinebit, ad hoc vocati, & auditi non fuerint, neque præmissis consenserint, seu consentiant: immo forsan illis contradicaturi sint, seu quibusvis aliis, quantumvis justis, justissimis, & rationabilibus causis, de subreptionis, vel obreptionis, seu nullitatis vitio, aut intentionis nostræ, vel quopiam alio defectu cogitato, vel inexcogitato, notari, impugnari, retractari, annullari, in jus, vel controversiam revocari, aut adversus eas quodcunque juris, vel facti, aut gratiæ remedium impetrari, vel sub quibuscunque Constitutionibus, & literis Apostolicis in contrarium, etiam Motu pari, & Consistorialiter emanatis, & emanandis, vel quibusvis similibus, vel dissimilibus gra-

tiarum revocationibus , suspensionibus , limitationibus , aut aliis contrariis dispositionibus nullatenus unquam comprehendendi , sed semper ab illis exceptas , & quoties illæ emanabunt , toties in pristinum , & validissimum , ac eum , in quo ante præmissa quomodolibet erant , statutum restitutas , repositas , & plenariè reintegratas , ac de novo etiam sub quacunque posteriori data , per personas Congregationis hujusmodi pro tempore existentes , eligenda , concessas , semper , & perpetuò validas , & efficaces esse , & fore , suosque plenarios , & integros effectus fortiri , & obtinere , ac ab omnibus , ad quos nunc quomodolibet spectat , & pro tempore spectabit , firmiter , & inviolabiliter observari , & adimpleri debere ; sicque & non aliter per quoscunque Judices ordinarios , vel delegatos , etiam causarum Palatii Apostolici Auditores , ac ipsius S. R. E. Cardinales , etiam de latere Legatos , & Vice-Legatos , dictæque Sedis Nuncios , ac etiam Thesaurarium , Clericos , Præsidentes , ac Commissarios , aliquosque Cameræ hujusmodi Officiales , sublata eis , & eorum cuilibet quavis aliter judicandi , & interpretandi facultate , & auctoritate , in qualibet instantia judicari , & diffiniri debere , irritumque , & inane si secus super his à quoquam quavis auctoritate scienter , vel ignoranter contigerit attentari , auctoritate Apostolica decernimus .

Quo circa Venerabilibus Fratribus nostris Offien-

fi, & Portuensi Episcopis, ac dilecto Filio causarum Curiae Camerae praedictae Generali Auditori, per Apostolica scripta motu simili mandamus, quatenus ipsi, vel duo, aut unus eorum per se, vel alium, seu alios, quando, & quoties pro parte dictae Congregationis, seu pro ea Agentium requisiti fuerint, praesentes literas, & in ea contenta quaecunque, ubi, quando, & quoties opus fuerit, faciant integraliter observari: Non permittentes dictam Congregationem, seu pro ea Agentes huiusmodi desuper quomodolibet indebitè molestari, perturbari, aut inquietari, Contradictores, & rebelles quoslibet per censuras Ecclesiasticas, aliaque juris, & facti remedia compescendo: invocato etiam ad hoc, si opus fuerit, brachii secularis auxilio.

Non obstantibus felicitis recordationis Bonifacii Papae VIII. Praedecessoris nostri, quatenus opus sit, de una, ac Concilii Generalis de duabus dietis, dummodo aliquis extra suam Civitatem, & Dioecesem, ultra tres dictas ad iudicium non trahatur, nec non Simmachi, & Pauli II. ac aliorum quorumcunque Romanorum Pontificum Praedecessorum nostrorum, de rebus Ecclesiae non alienandis, ac Pii IV. de gratiis interesse Camerae Apostolicae quomodolibet concernentibus infra certum, tunc expressum tempus in eadem Camera registrandis, & in illius libris insinuandis: Ita quod Congregatio huiusmodi, aut alii ejus Ministri ad illas insinuand-

dum non teneantur, & nihilominus præsentēs literæ eandem firmitatem obtineant, ac si in dicta Camera infra tempus ad id præfixum insinuatae, & registratae fuissent. Nec non nostra, & Camerae Apostolicæ regula de jure quæsito non tollendo, aliisque Constitutionibus, & ordinationibus Apostolicis, nec non prædictæ Lateranensis; ac quarumvis aliarum Urbis Basilicarum, vel piorum locorum, etiam juramento, confirmatione Apostolica, vel quavis firmitate alia roboratis statutis, & consuetudinibus, etiam immemorabilibus, privilegiis quoque, indultis, & literis Apostolicis; illis, illarumque Capitulis, & Canonicis, ac aliis Superioribus, & personis, etiam Consistorialiter, ac cum quibuscvis derogatoriis derogatoriis, ac aliis efficacissimis, & insolitis clausulis, in contrarium forsan quomodolibet concessis, approbatis, & confirmatis, ac innovatis. Quibus omnibus etiam si de illis, eorumque totis tenoribus, specifica, & expressa, ac de verbo ad verbum; non autem per clausulas generales idem importantes, mentio, seu quævis alia expressio habenda, aut alia exquisita forma ad hoc servanda foret, latissimè hac vice harum serie derogamus, cæterisque contrariis quibuscunque.

Volumus autem, & Apostolica auctoritate decernimus, quod quicumque de cætero perpetuis futuris temporibus in Sacrum Collegium dictæ Sanctæ Romanæ Ecclesiæ Cardinalium per nos, &

Roma.

Romanos Pontifices Successores nostros cooptabuntur, si præsentes fuerint, statim, si verò à Curia absentes, post susceptionem Bireti rubei jura, quæ ratione Annuli Cardinalitii, post eorum obitum Camera Apostolicæ debebantur, prædictæ Congregationi, seu ab ea Deputatis realiter, & cum effectu persolvere teneantur.

Nulli ergo hominum liceat hanc paginam nostræ revocationis, cassationis, extinctionis, annulationis, donationis, concessionis, assignationis, declarationum, absolutionis, inhibitionis, decretorum, mandatorum, derogationis, & voluntatum infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctam Mariam Majorem, anno Incarnationis Dominicæ millesimo sexcentesimo vigesimo secundo decimo Kalendas Julii, Pontificatus nostri anno secundo.

CONSTITUTIO URBANI OCTAVI

*Confirmatio Bullæ Gregorii XV. de electione Romani
Pontificis, & Cæremonialis continentis
illius ritus.*

URBANUS EPISCOPUS
SERVUS SERVORUM DEI
Ad perpetuam rei memoriam.

AD Romani Pontificis providentiam spectare dignoscitur, ut ea, quæ salubriter à Prædecessoribus suis, præfertim Sedis Apostolicæ, & universalis Ecclesiæ decori, & utilitati conducentia statuta sunt, firma, & inconcussa, quantum ex alto conceditur, perseverent.

Cum

Cum igitur formam in ejusdem Pontificis electione servandam sacrorum Conciliorum Decretis, & variis Apostolicis Constitutionibus præscriptam felicitis recordationis Gregorius Papa XV. Prædecessor noster, Pastoralis sollicitudine permotus, ut res tanti ponderis postulabat, perfectiùs dirigendam duxerit Constitutione desuper edita, cujus tenor est talis.

Gregorius Episcopus Servus Servorum Dei ad perpetuam rei memoriam : Aeterni Patris Filius, Magister, & Legislator CHRISTUS Dominus, cujus omnis actio, nostra est instructio, licet portaret omnia verbo virtutis suæ, nec esset quicquam absconditum ab oculis ejus, tamen priusquam ad Apostolatus munus duodecim Apostolos eligeret, & nominaret, quod aliàs unquam fecisse in scripturis non legimus, pernoctare voluit in oratione Dei: & antequam Beato Petro ovium suarum curam committeret, tertium repetita interrogatione, trinam extare æterni amoris ejus professionem, nos scilicet erudiens quantà diligentia, cautione, & cura in omnium Pastorum electione adniti debeamus, ut boni eligantur, & fideles; præsertim verò in Beati Petri Successoris, qui orbis est lumen, Doctor Gentium, & Pastor Pastorum. Quapropter satìs etiam admonemur nihil eorum, quæ ad electionis Romani Pontificis negotium cautiùs, & meliùs transgendum conducunt, omitti debere: salus enim non unius membri, sed totius corporis agitur, cum de capite consulitur. Igitur etsi diversis felicitis recordationis Romanorum

Pontif.

Pontificum decretis salubriter provisum est, ut ejus electio, ritè, & rectè peragatur, & in ea non caro, & sanguis, aut humana sapientia, quæ stultitia est apud Deum, dominetur, sed Spiritus Sancti gratia omnia dirigantur, & gubernentur: nihilominus, ut dies diei eructat verbum, & nox nocti indicat scientiam, experientia compertum est salubriori remedio locum non deesse.

Nos igitur, quos posuit Dominus, licèt nullis suffragantibus meritis, regere Ecclesiam suam, ne in extremo die prætermissi officii in re tanti momenti à nobis ratio à districto Judice exigatur, quod multorum etiam votis, & postulationibus multùm expetitur, Sancti Spiritus adspirante gratia, faciendum decrevimus; matura itaque cum Venerabilibus Fratribus nostris Sanctæ Romanæ Ecclesiæ Cardinalibus deliberatione habita, de eorundem Fratrum consilio pariter, & assensu, ac nostra perpetuò valitura Constitutione statuimus, decernimus, & declaramus in posterum electionem Romani Pontificis fieri aliter non posse, quàm in Conclavi, & eo clauso, ac post celebratum in eo prima die Sacrosanctum Missæ Sacrificium, cui Cardinales interesse, & in eo communicare consueverunt, ac per secreta Schedularum suffragia duarum ex tribus partibus Cardinalium in Conclavi præsentium, præterquam si omnes, & singuli Cardinales in Conclavi præsentés, nemine dissentiente, aliquibus ex eorundem Collegio Cardinalium committerent eligendi potestatem, ut vice omnium Ecclesiæ Catholicæ providerent de Pastore: aut

nisi communiter ab omnibus, & singulis Cardinalibus, qui itidem in Conclavi præsentes erunt, nemine pariter dissentiente, quasi per inspirationem, nullo præcedente de persona speciali tractatu, per verbum Eligo; intelligibili voce prolatum, aut scripto, si voce fieri non potuerit, expressum, fuerit celebrata.

Numerum autem suffragiorum duarum ex tribus partibus Cardinalium in Conclavi præsentium, ut electio per viam Scrutinii, aut Scrutinii, & Accessus valida sit, decernimus, & declaramus ita esse censendum, ut in duabus tertiis partibus suffragium electi non numeretur, nec quisquam sive Scrutinii, sive Scrutinii, & Accessus, sive compromissi via procedatur, se ipsum eligere, seu suffragium sibi dare ullatenus possit: Electi tamen persona, si in Conclavi sit, debeat in numerum Cardinalium computari.

Rursus nemo per viam Scrutinii, seu Scrutinii, & Accessus habeatur pro electo, nisi publicatis omnibus suffragiis, & electi, si numerum tantummodo duorum ex tribus partibus habuisse compertum sit, etiam Schedulis apertis.

At si contingat plures in Schedulis nominatos, duas tertias partes suffragiorum tulisse, in suffragiorum paritate neuter sit electus, in imparitate verò, qui numero suffragiorum superior erit, dummodo duas tertias partes etiam in uno suffragio excedat, electus censeatur.

Insuper in unoquoque Scrutinio, antequam Sche-

M

dula

dula in Calicem mittatur, à quolibet Cardinale juramentum alta, & intelligibili voce fiat his verbis: TESTOR CHRISTUM DOMINUM, QUI ME JUDICATURUS EST, ME ELIGERE QUEM SECUNDUM DEUM JUDICO ELIGI DEBERE, QUOD IDEM IN ACCESSU PRÆSTABO. Et hoc juramentum à nullo omittatur.

Suffragiorum autem Schedulæ hujusmodi tam Scrutinii, quàm Accessus, ubi fieri potuerit, impressæ omnino esse debeant, ubi non potuerit, unius tantum manu scriptæ sint, ita videlicet, ut tam impressæ, quàm ita scriptæ, ea omnia, quæ in Schedulis hujusmodi exprimi solent, contineant, præter sola nomina, seu denominationes eligentis, & electi, & infra scripta signa, quæ manu ejusdem eligentis omnia scribantur: & nomen quidem eligentis in prima parte Schedulæ, electi verò in sequenti, & rursus electi, quantum fieri poterit, caractere alterato, ita ut cognosci non possit: eaque Schedulæ pars, in qua erit eligentis nomen, claudatur, ac sigillo ad hoc parato, ac secretè habito, non autem eo, quo quisque uti solet, obfignetur. Ut autem videri possit, ne qui alicui accessit, eidem in Scrutinio suffragium dederit, Schedulæ omnes duobus aliis signis in ultima parte signentur, numero nempe aliquo, & brevi dicto Sacræ Scripturæ, vel alio hujusmodi; quæ signa in utraque Scheda tam Scrutinii, quàm Accessus eadem sint.

Postea verò pars illa Schedulæ, ubi hæc signa erunt, etiam complicitur, & obfignetur, ne à Scruta-

toribus

toribus videri possit, nisi postquam fuerit per Scrutinium, & Accessum electio perfecta, quo casu Schedulæ Accessus à Scrutatoribus ea parte, ubi duo prædicta sunt signa, aperiantur, iisque inspectis, & earum sigillis, aliæ Schedulæ cum iisdem signis notatæ, & in Scrutinio datæ, reperiantur, ut videlicet an duobus signa, & sigillum eadem sint cognoscatur, & inde duo suffragia ab eodem Cardinali uni data non fuisse appareat.

At si inter Schedulas Scrutiniæ nulla reperietur iisdem signis notata, quibus Schedula Accessus signata erit, aut si quis eidem accesserit, quem in Scrutinio nominaverit, utroque casu suffragium Accessus nullum sit. Subscriptio autem, seu nomen eligentis resignari non possit, nisi contingat, ut sigillum, & alia duo prædicta signa sint eadem cum signis, & sigillo alterius Cardinalis, aut alia difficultate cogente.

Quod autem attinet ad nomen electi, illud eo modo à Cardinalibus scribatur, quomodo in folio impresso, ubi in Conclavi notari suffragia solent. Præterea ut Secreto cautius consulatur, Schedulæ suffragiorum conficiantur, una, seu pluribus in Mensis, in media Cappella constitutis, ita à Cardinalibus remotis, & circumseptis, ut quid scribatur ab aliis videri non possit. Si quis verò ad Mensam accedere impeditus valetudine non poterit, is suffragium suum in loco suo secretè conficere debeat, & ad illud accipien-

dum ultimus Scrutatorum accedat. Et ut Accessus secretè etiam peragatur, Scrutinio publicato, si electio per consensum duarum partium in eo non fuerit celebrata, statim antequam ad alios actus deveniatur, Cardinales Schedulam pro Accessu formatam prædictis in Mensis conficere, sicut in Scrutinio teneantur. Porro usus Scedularum pro Accessu talis erit. Qui accedere alicui ex nominatis in Scrutinio voluerit, ejus nomen scribet, qui verò noluerit, ac cognosci possit eum nulli accedere, in loco nominis scribat nemini.

Nulli autem tam in Scheda Scrutini, quàm Accessus plures nominare liceat, alioquin suffragium, in quo plures fuerint nominati, nullum sit: accedere tamen uni ex nominatis à se in dicta Scheda, vel alii, dummodo aliquod aliud suffragium in eodem Scrutinio tulerit, non prohibeatur, & in numerum Cardinalium in Conclavi præsentium numeretur.

Neque in quolibet Scrutinio, nisi semel accedere liceat, neque per Accessum ab alterius nominatione, in Scrutini Scheda facta, recedi, decernimus, & declaramus.

Insuper antequam Schedulæ, sive Scrutini, sive Accessus à Scrutatoribus aperiantur, omnes ab iis diligentissimè palam numerentur, & si plures repertæ fuerint, quàm sint Cardinales in Conclavi præsentés, omnes comburantur, & iterum ad suffragia statim deveniatur.

Si quis autem aliquid ex supra expressis non

servaverit, aut quomodocunque directè, vel indirectè in aliquo contraverit, sententiam excommunicationis ipso facto incurrat.

Præterea statuimus, & ordinamus, quod si aliquem infirmitas impediverit ad Scrutinium venire, ad eum adire debeant tres Cardinales sorte ante Scrutinium, ut infra, ad hanc rem ex omnibus Cardinalibus per ultimum Diaconum extracti, cum capsula perforata, sed inani, & palam à Scrutatoribus clausa, cujus clavis super Altare remaneat, & Schedulam impressam illi deferre, ipseque illam, sicut alii Cardinales, prævio juramento supra scripto, secretè conficere teneatur, deinde in capsulam conjiciat, eaque per eosdem Cardinales relata, & aperta, in Calicem Scedula mittatur; Publicato deinde Scrutinio, si Accessus agendus erit, ut etiam infirmi accedere possint, unum ex foliis, in quibus nomina Cardinalium, & suffragiorum numerus notatur, à tribus Cardinalibus prædictis sumatur, & palam recognito numero suffragiorum, quæ quisque in Scrutinio tulerit, ad infirmum unà cum alia impressa Scedula pro Accessu parata, & cum eadem capsula ab iis deferatur. Infirmus verò alicui accedere, vel nemini accedere debeat, omniaque, & singula servantur, quæ de Scrutini Scedula supra ordinata sunt, sub eadem excommunicationis latæ sententiæ pœna.

At si quis scribere valetudine impediatur, per alium prævio juramento ab eo, qui soribet, præstando,

de

de servando secreto, quod sub eadem excommunicationis pœna servari mandamus, scribere liberè possit.

Ad hæc Scrutatores, sicut & tres alii Cardinales, qui ad Infirmorum suffragia deferenda proficiantur, ex omnibus Cardinalibus presentibus in Conclavi, nulla ordinis servata distinctione, sorte immediatè ante quodlibet Scrutinium per ultimum Diaconum extrahantur, & qui semel extracti fuerint, in vas iterum conjiciantur; alioquin si quis contrafecerit, sicut si Scrutatores, vel Recognitores aliquid secreti in exercendo officio suo cognoverint, & illud revelaverint, eandem latæ sententiæ excommunicationem incurrant. Finito Scrutinio, & Accessu, sive electio sequuta sit, sive non sit, tres alii Cardinales, sorte pariter, ut suprà extrahendi, Schedulas omnes recognoscere debeant; sigillo tamen, & duobus aliis signis, si aperta non fuerint, intactis remanentibus. Quæ omnes, & singulæ Schedulæ, sive sequuta, sive non sequuta electione, postmodum statim palam comburantur.

Similiter ne electio protrahatur, statuimus, & ordinamus, ut sub simili excommunicationis pœna, eo ipso incurrenda, Scrutinium bis singulis diebus peragatur, ita ut etiam perficiatur, mane scilicet post solitam Missam, & prima quidem die tantum post Cardinalium Sacram peractam Communionem, & pomeridiano tempore hora opportuna, post Hymnum Veni Creator Spiritus, & Orationem de Spiritu Sancto: idemque, si compromissi via eligatur, observari debeat,

atque ad Scrutinium, cum tertium pulsata per loca solita Conclavis Campanula de more fuerit, omnes, & singuli Cardinales convenire debeant, valetudine non impediti, sub eadem excommunicationis latæ sententiæ pœna.

Cardinales præterea omnino abstineant ab omnibus pactiõibus, conventionibus, promissionibus, intendimentis, conditiis, fœderibus, aliisque quibuscunque obligationibus, minis, signis, contra signis suffragiorum, seu Scedularum, aut aliis tam verbo, quàm scripto, aut aliis quomodocunque dandis, aut petendis, tam respectu inclusionis, quàm exclusionis, tam unius Personæ, quàm plurium, aut certi generis, veluti creaturarum, aut hujusmodi, seu de suffragio dando, vel non dando, quæ omnia, & singula, si de facto inter venerint, etiam juramento adjecto, nulla, & irrita, neque ad eorum observantiam quemquam teneri, aut ex transgressione notam incurrere fidei non servatæ discernimus, & declaramus, contrasacientes, ex nunc excommunicationis pœna innodamus: Tractatus tamen pro electione habenda vetare non intelligimus.

Quod si electio hujusmodi alibi celebrata fuerit, quàm in Conclavi clauso, vel aliter, quàm per secreta Scedularum suffragia duarum ex tribus partibus Cardinalium in Conclavi præsentium in Scrutinio, seu Scrutinio, & Accessu, electi suffragio non computato, vel per viam compromissi, ab omnibus Cardinalibus similiter in Conclavi præsentibus, nemine dissentiente

initi, & ita ut nemo seipsum elegerit: vel quasi per inspirationem, nullo præcedente de persona speciali tractatu, omnium pariter Cardinalium præsentium in Concilio, communiter, nemine itidem dissentiente, per verbum Eligo intelligibili voce prolatum, aut scripto, si voce non potuerit, expressum, nulla sit, & invalida eo ipso, absque ulla declaratione, & ita electo nullum jus tribuat: quinimmo is non Apostolicus, sed Apostaticus sit, & babeatur, & tam ipse, quàm eligentes, ejusque fautores, & complices sententiam excommunicationis, & anathema, aliasque censuras, & pœnas invasoribus Sedis Apostolicæ à Sacris Canonibus, & Constitutionibus Apostolicis impositas, pariter ipso facto incurrant, à qua sicut ab alia quacunque in hac Constitutione imposita, & irrogata, seu infra imponenda, & irroganda pœna excommunicationis tam ipsi, quàm quilibet alius, sive Sanctæ Romanæ Ecclesiæ Cardinalis, sive alia persona cujuscunque gradus, conditionis, dignitatis, & præminentie, à nullo, neque etiam à Majori Pœnitentiaro, cujuscunque facultatis vigore, præterquam à Romano Pontifice, nisi in mortis articulo absolvi possit, & tam ipse, ejusque complices, & fautores, quàm alii quicunque, etiam Sanctæ Romanæ Ecclesiæ Cardinales hujus Constitutionis in aliquo transgressores aliis gravissimis pœnis teneantur, futuri Pontificis canonicè intrantis arbitrio irrogandis.

Postremò statuim⁹, & distictè præcipiendo mandamus, ut Sanctæ Romanæ Ecclesiæ Cardinales, quæ-

cunque

cunque Secretum violare quomodolibet poterunt, omnia evitare, & cavere omnino teneantur, cum intentio, & mens nostra sit electionis hujusmodi tam sanctum negotium si fiat per Scrutinium, seu Scrutinium, & Accessum, ut præfertur, secretissime transigatur, ac proinde iisdem omnibus, & singulis Sanctæ Romanæ Ecclesiæ Cardinalibus, & eorum Sacro Collegio inbibemus, ne contra hæc vel horum aliquod statuere dispo- nere, vel ordinare, seu in aliquo corrigere, alterare, mutare, seu aliquo modo facere, tractare, moliri, vel attentare præsumant quovis prætextu, causa, vel ex- quisito colore sub eadem excommunicationis pœna ipso facto incurrenda.

Ut autem hujusmodi nostra Constitutio inviolabi- lius observetur, tres Cardinales, qui singulis diebus Congregationibus agendis præpositi sunt, & cum iis S. R. E. Camerariis illam in omnibus, & per omnia observari procurent, & faciant.

Volumus etiam, & decernimus censurarum, & excommunicationum prædictarum, & aliarum quarum- cunque prætextu, & causa Cardinales à Summi Pon- tificis electione activæ, & passivæ excludi nullo modo posse, quas quidem censuras, & excommunicationes ad effectum hujusmodi electionis tantum, illis aliis in suo robore permanens, suspendimus; decernentes easdem excommunicationes, & censuras eos solum afficere, qui deliquerint, non autem alios, Conclavi durante, qui cum iis conversati fuerint.

Cæterum , etsi opus non esse in Domino confidimus , tamen pro officii nostri debito , & rei , de qua agitur , gravitate , admonemus , hortamur , & in Domino obsecramus Sanctæ Romanæ Ecclesiæ Cardinales , ut attentè considerent personæ , quæ sustinent officium , & dignitatem , quàm Sacrum præterea , & quanti momenti sit opus , quod tractant , & nihil , quod se non deceat , nihil à re alienum committant , sed cogitent , quàm perniciosum futurum sit universæ Ecclesiæ CHRISTI Sanguine acquisitæ , si malè administretur , ac proinde exuant omnes mundanas curas , & induant solum Dominum nostrum JESUM CHRISTUM , memores nihil prodesse homini si universum Mundum lucretur , animæ verò suæ detrimentum patiatur . Denique animum advertant se in Conclavi clausos editissima in specula constitutos esse , & factos spectaculum Deo , & hominibus à Domino , cujus negotium gerunt , supplicii , vel gloriæ sempiternæ retributionem citissimè laturos .

Non obstantibus , quatenus opus sit , felicitis recollectionis Alexandri Papæ III. Prædecessoris nostri in Concilio Lateranensi edita , quæ incipit : Licet de vitanda , & aliorum Romanorum Pontificum Prædecessorum nostrorum , & in Conciliis Generalibus promulgatis , Constitutionibus , & Ordinationibus Apostolicis , etiam in corpore juris clausis , quibus omnibus , & singulis , quatenus pariter opus sit , eorum omnium , & singulorum tenores , perinde , ac si ad verbum exprimerentur pro

expres-

expressis, & insertis habentes, pro hac vice dumtaxat, illis aliis in suo robore permansuris, specialiter, & expresse derogamus, cæterisque contrariis quibuscunque. Volumus quoque præsentis nostras coram omnibus in prima Congregatione post obitum Pontificis fieri solita, & deinde post Conclavis ingressum, & cum quis ad Cardinalatus honorem promotus fuerit, cum aliis similibus Constitutionibus legi, & juramentum super illius observatione præstari, & ita præcipimus, & mandamus.

Quibus Constitutionibus, & pœnis in eis contentis, nisi in superius expressis per hanc nostram derogare non intendimus, sed eas in sui roboris firmitate relinquere, sperantes etiam; Romanos Pontifices qui pro tempore eligentur canonicè, omni studio curaturos, ut quæ nostris hujusmodi, & in eis salubriter statuta sunt, inviolabiliter, ac etiam si opus fuerit per pœnarum ipsarum contra transgressores executionem observentur.

Denique volumus easdem præsentis in valvis Basilicarum Sancti Joannis Lateranensis, ac Principis Apostolorum de Urbe, ac Cancellariæ Apostolicæ, necnon in acie Campi Floræ per Cursores nostros affigi, & publicari, ac earum exempla ibidem affixa dimitti, & deinde omnes, & singulos Cardinales tam absentes, quàm præsentis, modernos, & qui pro tempore erunt, & alios quoscunque quorum interest, vel interesse poterit quomodolibet in futurum afficere, & li-

gare, nullamque harum ignorantiam prætere posse, ac si eis personaliter intimatæ forent præmissis, cæterisque contrariis quibuscunque non obstantibus.

Nulli ergo omnino hominum liceat hanc Paginam nostrorum Statutorum, Decretorum, declarationum, mandatorum, inmodationis, voluntatis, admonitionis, hortationis, obsecrationis, inhibitionis, derogationis, præcepti, & suspensionis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctum Petrum anno Incarnationis Dominicæ millesimo sexcentesimo vigesimo primo, decimo septimo Kalendas Decembris, Pontificatus nostri anno primo.

Et successive idem Gregorius Prædecessor Cærimoniale ritus dictæ electionis continens de ejus mandato compositum confirmaverit, cujus tenor sequitur.

Gregorius Episcopus Servus Servorum Dei ad perpetuam rei memoriam. Decet Romanum Pontificem, quæ ad Ecclesiæ Catholicæ felix regimen salubriter à se statuuntur, ut quàm facillimè observentur, Pastoralis sollicitudine providere, & ea, per quæ à se decreta debitum sortiuntur effectum, stabilire. Siquidem postquam novam Constitutionem de Romani Pontificis electione, ob causas in ea expressas, Divina adspi-

rante gratia, edidimus; nec ejus usus, & observantia, veteri Rituali Ecclesiæ Romanæ ferè inutili ob eandem Constitutionem reddito, proprii Cærimonialis directione destitueretur; novum; prout sequitur, confici mandavimus. Quod cum post nonnullorum Sanctæ Romanæ Ecclesiæ Cardinalium, quibus negotium commisimus, diligens, ut res postulabat, adhibitum examen, confectum fuerit, & à nobis approbatum; ut illud cum omnibus, & singulis in eo contentis, inviolabiliter observetur, ex nostri Pastoralis officii debito, providendum censuimus. Tenor autem illius est, qui sequitur.

Romano Pontifice vita functo, Cardinales præstito in prima Congregatione juramento de observanda Constitutione Gregorii Papæ XV. de reformatione Conciliorum, una cum aliis Constitutionibus, quæ legi, & jurari in ea hæcenus consueverunt, exequias pro ejus anima, juxta ritum hucusque observatum, per novem continuos dies facere debent, nisi fortè in illis novem diebus aliquod Festum ex præcipuis, & magnis incideret, propter cujus observantiam, exequias intermittere Cardinalibus videretur, hoc enim casu in numero quidem novem dierum, exequiarum intermissarum dies computentur: verum impensa, quæ in omisissis exequiis facienda esset, in pauperes Christi, juxta Pii IV. Constitutionem distribuenda est.

Qua etiam Constitutione, ut exequiarum impensis, quæ jam in immensum excreverant, modus, & finis

ali.

aliquis esset, cautum est, ne impensæ illorum novem dierum, decem ducatorum millium summam, computatis omnibus, præter regalia Populo Romano præstari solita, excederent, & ut earum impensarum distributio justè fieret, tribus ex antiquioribus Cardinalibus, uni scilicet ex quolibet ordine, ac Sanctæ Romanæ Ecclesiæ Camerario, commissa fuit.

Exequiis defuncti Pontificis completis, & interim Conclavi opportuno præparato, Cardinales in Basilica Sancti Petri, vel alibi pro temporis, & loci opportunitate conveniunt, ubi per Decanum Sacri Collegii, vel eo impedito, per alium ex antiquioribus Cardinalibus Missa de Spiritu Sancto celebratur, & in fine per aliquem Prælatum, aut alium Virum doctum habetur Oratio, in qua monentur, ut sepositis omnibus privatis affectibus, solum Deum præ oculis habentes, Sanctam Romanam, & Universalem Ecclesiam de Pastore sufficienti, & idoneo providere, omni qua possunt brevitate, & diligentia curent, ad Apostolicarum Constitutionum, & Sacrorum Conciliorum præscriptum.

Re divina peracta, Clericus Cæremoniarum capit Crucem Papalem, & procedit, quem Cardinales sequuntur, Episcopi primum, deinde Presbyteri, postremò Diaconi cum suis Cappis violaceis: Crucem præcedunt Familiares Cardinalium, & immediatè Cantores Hymnum Veni Creator Spiritus cantantes, post Cardinales sequuntur Prælati, atque ita processionaliter procedentes, Canclave ingrediuntur, & cum ad Cap-

pellam

pellam pervenerint , Cardinalium Decanus apud Altare dicit Orationem Deus , qui corda Fidelium , qua finita leguntur , & jurantur per Cardinales Constitutiones de Romani Pontificis electione , & unà cum eis Constitutio novissima Gregorii XV. Deinde Cardinales post sermonem habitum per Decanum , quos eos convenientibus verbis ad electionis negotium ritè , & rectè peragendum hortatur , ad cellas sorte inter eos juxta Constitutionem Pii IV. distributas , divertunt , & post prandium omnes rursus simul congregantur , & Officiales Conclavis , & alii præstant Sacro Collegio juramenta consueta .

Cardinales autem ingressi Conclave non exeant , vespere reversuri , sed in ipso omnino permaneant . Ipsumque Conclave , post ter jussu Cardinalis Decani personatam Campanulam , videlicet prima vice circa primam horam noctis , secunda circa secundam , & tertiam circa tertiam , exclusis omnibus , qui in Conclavi remanere non debent , intus , & extra claudatur ; & Claves Sanctæ Romanæ Ecclesiæ Camerario , ac Magistro Cæremoniarum , & Prælati Custodibus Conclavis juxta solitum assignentur .

Deinde accensis fanalibus tres Cardinales Capita Ordinum , & Camerarius , unà cum Magistro Cæremoniarum latebras , & angulos omnes Conclavis diligenter perquirunt , ne quis ex iis , qui esse in Conclavi prohibentur , intus remanserit . In Conclavi autem esse possant Familiares Cardinalium , & alii Officiales ,

Et Ministri Conclavis, qui in Constitutione Pii IV. recensentur, quibus adduntur duo alii, unus Famulus pro Magistris cæremoniæ, Et alius pro Secretariis Sacri Collegii, hac tamen conditione adjecta, ut Famulus Magistrorum cæremoniarum actu uni ex illis inserviat, Et per sex menses ante, fuerit ejus continuus comensalis, quæ conditio in famulo Secretarii similiter exigitur; omnium autem istorum Conclavistarum, post prandium diei sequentis, fit recognitio, ne quis inter illos fortè esset ex iis, qui in Conclavi esse non possunt, quæ recognitio ut certius fiat, jubentur Conclavistæ omnes intrare Cappellam, Et postea singillatim recensentur.

Clausæ Conclavi servari debent omnia, quæ de colloquiis, literis, Et cibis, Et quæ de non ingredientibus Cardinalibus, aut iisdem, aut eorum familiaribus, postquam ingressi sunt, exeuntibus, in Constitutionibus Pii IV. sancita sunt. Quo verò attinet ad vestes, non solum, cum ad electionem Cardinales procedunt, croceis uti debent, sed juxta vetus cæremoniale, cum aliquid collegialiter agendum est.

Porro capita, quæ ante electionem fieri solent à singulis Cardinalibus subscribenda, etiam ad favorem Conclavistarum fieri poterunt, vel ante ingressum Conclavis, vel post ingressum, dummodo per ea non retardetur, aut differatur ingressus, vel electio. Quoniam autem juxta Constitutionem Pii IV. Cardinales, qui saltem in Ordine Diaconatus constituti non sunt, ad
 ele.

electionem Romani Pontificis non admittuntur, inspicendum erit, antequam ad electionis negocium procedatur, an aliqui ex Cardinalibus presentibus ordine predicto careant, nam si careant, a suffragio ferendo excludendi erunt, nisi Privilegio Pontificio muniti sint. De Cardinali autem, cui ante mortem Pontificis os fuit clausum, aliquando dubitatum est, verum a Pio V. fuit hæc dubitatio sopita per ejus decretum editum die 26. Januarii 1571. quo declaravit, hujusmodi oris clausuram, ceremoniam quandam esse, ea de causa introductam, ut Cardinales, antequam in Consistoriis, & Congregationibus suffragium ferant, de modestia, quæ ab ipsis his, & aliis actibus adhiberi debet, quodammodo admoneantur, non autem pertinere ad præcipuam Cardinalium facultatem, quæ circa Summi Pontificis electionem versaretur, quæ declaratio Pii V. semper hucusque observata fuit.

Quoniam autem ex Gregorianis Constitutionibus ad actum electionis sub pœna nullitatis devenire non possunt Patres, nisi clauso Conclavi: tres Cardinales, & Camerarius ejusdem Constitutionis Executores deputati prævidebunt, ut statim post clausum Conclavæ, diligens per aliquos fiat inquisitio super ipsa clausura, eaque in effectum reperta, curabunt, ut de ea publicum fiat documentum per Magistrum ceremoniarum rogandum, & post hujusmodi documentum, etiam si Conclavæ in totum, vel pro parte de facto apertum fuisse reperiatur, semper tamen clausum, & pro clauso censexi, & haberi
debet

debet ad effectum validitatis electionis; donec de consensu duarum partium Cardinalium præsentium per secreta suffragia apertum esse declaratur. Hæc tamen declaratio, electioni, quæ ante ipsum facta fuerit, nullatenus præjudicare debet, neque ab ipsam declarationem, præcedens electio impugnari potest.

Mane sequenti post clausum præcedenti nocte Conclavæ, post solitum Campanulæ sonum, conveniunt Cardinales in eo præsentibus, qui infirmitate non sunt impediti; ad Cappellam Paulinam, & ibi celebrata consueta Missa, & facta Cardinalium Communione, statim ad negotium electionis procedere debent, quod quidem hodie ex Gregoriana Constitutione uno tantum ex tribus modis, sive formis peragendum est, alioquin electio nullitatis vitio subiaceat.

Primus modus est, qui quasi per inspirationem vocatur, quando scilicet Cardinales, quasi afflati Spiritu Sancto, aliquem unanimiter, & viva voce Summum Pontificem proclamant; circa quem modum, ex Constitutione Gregoriana, infra scripta notari possunt.

Primum, hæc forma electionis præficari potest solum in Conclavi, & eo clauso. Secundò, debet fieri electio secundum banc formam ab omnibus, & singulis Cardinalibus in Conclavi præsentibus. Tertio communiter, & nemine eorum dissentiente. Quartò, nullo præcedente de Persona speciali tractatu, & per verbum *Eligo* intelligibili voce prolatum, aut scripto
expres.

expressum, si voce non possit proferri; exemplum autem hujus potest esse hujusmodi. Si aliquis Patrum, clauso Conclavi, nullo, ut præfertur, præcedente speciali tractatu, diceret: Reverendissimi Domini, perspecta singulari virtute, & probitate Reverendissimi Domini Nostri, judicarem illum eligendum esse in Summum Pontificem, & ex nunc ego ipsum eligo in Papam. Deinde hoc audito, si cæteri Patres, nemine excepto, sequentes primi sententiam, eodem verbo Eligo intelligibili voce prolato, aut si non potest in scripto expresso, eundem N. de quo nullus specialis tractatus præcessit, communiter elegerint, ipse N. esset canonicè electus, & verus Papa, secundum hanc electionis formam, quæ dicitur per inspirationem, seu ut in Sacris Canonibus scriptum est, quasi per inspirationem.

Secundus modus est per compromissum, quando scilicet Cardinales ad electionem per hanc formam, seu viam procedere volentes, committerent aliquibus ex Patribus eligendi potestatem, ut vice omnium Ecclesiæ Catholicæ provideant de Pastore, cujus formæ Praxis potest esse hujusmodi.

Primo, omnes, & singuli Cardinales in Conclavi clauso præsentés, nemine eorum dissentiente, in aliquos ex Patribus compromissum faciunt, exempli gratia in hanc formam.

In Nomine Domini. Amen . Anno ab ejusdem , &c. mense , &c. die , &c. Nos Episcopi , Presbyteri , & Diaconi Sanctæ Romanæ Ecclesiæ Cardinales omnes , & singuli in Conclavi existentes , videlicet N. N. & *singillatim omnes nominentur Cardinales*, elegimus , & eligimus per viam procedere compromissi , & unanimiter , & concorditer , nemine discrepante , eligimus Compromissarios N. N. & N. Cardinales , &c. quibus damus plenariam facultatem , & potestatem providendi Sanctæ Romanæ Ecclesiæ de Pastore sub hac forma , videlicet : *Hic optimum erit , ut Cardinales compromittentes exprimant modum , & formam , secundum quam compromissarii debebunt eligere , & secundum quam electus debet censeri verus , & legitimus Papa , utpote si electi sint tres Compromissarii , declarandum est , an ad hoc , ut electio sit valida ; prius proponere debeant , Sacro Collegio Personam , vel Personas , ab ipsis nominandam , vel nominandas ad Pontificatum ; an verò absolute debeant electionem peragere ; an omnes tres debeant convenire in unam Personam , an verò sufficiat , quod duo in unam concordent , & an debeant nominare aliquem de Collegio , vel etiam aliquem extra Collegium , & alia his similia . His autem , vel aliis similibus expressis addi compromisso solet tempus , ad quod usque volunt Cardinales potestatem Compromissarios habere eligendi , & postea subjunguntur hæc verba : Et promittimus nos illum pro Romano*

Pon-

Pontifice habituros, quem DD. Compromissarii duxerint secundum formam prædictam eligendum, vel alia ad formam Compromissariis præscriptam accommodata. Secundò completo hujusmodi mandato Compromissarii ad partem in aliquo loco separato se conferunt, & de electione facienda tractant, & solet inter eos præmitti protestatio, quòd per quamcunque prolationem verborum, suum dare consensum non intelligunt, nisi in scriptis illum expressè ponant. Et hæc protestatio videtur necessaria inter Compromissarios, ut verbis humanis, & reverentialibus inter se, sine præjudicio uti possint. Tertiò, facta per Compromissarios electione, secundum formam eis præscriptam, & servatis iis, quæ Gregorius XV. in sua Constitutione jussit, electus per hujusmodi viam compromissi est canonicus, & verus Papa. Tertius modus, seu forma electionis Romani Pontificis, quæ vocatur per Scrutinium, vel per Scrutinium, & Accessum, cujus formæ ritus, secundum Gregorianam Constitutionem, quæ vult non solum Scrutinium fieri secretum, sed etiam Accessum, continet tres actiones, alteram, quæ ante Scrutinium, alteram, quæ Scrutinium; & tertiam, quæ post Scrutinium appellari potest.

Ante Scrutiniæ actus sunt quinque, videlicet præparatio Scedularum Scrutiniæ, & Accessus; Extractio Scrutatorum, & Deputatorum pro votis infirmorum per sortem; Scriptio Scedularum Scrutiniæ; Earum complicatio, & obfignatio.

Sche-

Schedularum præparatio ad Magistros cæremoniarum pertinet, qui eas expressas, ubi fieri poterit, alioquin unius manuscriptas secundum formam inferius describendam accipient, tam pro Scrutinio, quàm pro Accessu, & ponent in duobus discis, vulgò Bacili nuncupatis, quos in mensa ante Altare collocabunt, ut inde possint Cardinales, cùm opus fuerit, Schedulas sumere.

Forma autem Schedulæ Scrutini, quoad ejus figuram attinet, erit altera parte longior, hoc est plus longa, quàm lata, longitudo ejus erit fere palmi, latitudo autem dimidii palmi; quo verò ad contenta in ea, in anteriori ejus parte, quæ brevitate gratia facies nominari potest, tria continere debet.


Primò, in superiori parte, secundum ejus latitudinem duo hæc verba: Ego Card. cum tanta ad invicem distantia, ut inter ipsa nomen propriam Cardinalis eligentis scribi possit, & paulò inferius duos circulos parvos, ad loca singulorum indicanda.

Secundò, in medio continere debet hæc verba: Eligo in Summum Pontificem Reverendiss. Dominum meum, Dominum Cardinalem.

Tertiò, in parte inferiori, aliquos duos parvulos circulos ad loca Sigillorum similiter demonstranda. Forma verò Schedulæ Accessus eadem prorsus est, quæ Scrutini, nisi quòd in medio ejus loco ver-





borum;

borum : Eligo in Summum Pontificem Reverendissimum Dominum meum, Dominum Cardinalem, ponuntur hæc verba : Accedo Reverendissimo Domino meo, Domino Cardinali, verum facilius, quæ dicta sunt, præcipiuntur ex infrascriptis figuris, & exemplis.



EXEMPLUM





Schedulæ Scrutiniî scriptæ.

	Ego Card.	
		
Eligo in Summum Pontificem Reverendiss. D. meum D. Card.		
		
	18. Gloria in excelsis.	

EXEM.

EXEMPLUM FACIEI

Schedulæ Accessus.

	Ego Card.	
		
Accedo Reverendissimo D. meo D. Card.		
		


In exteriori autem parte Scedularum tam Scrutinii, quàm Accessus, quæ tergum nominari potest, duo sunt imprimendi limbi ex illis, quos ad ornatum librorum impressos adhibent, & vulgari vocabulo,

P

Fre.

Fregj, nuncupant, quorum primum circa sui medium continet hoc verbum, Nomen, impressum secundum longitudinem ipsius limbi; alterum verò continet hoc verbum, Signa, similiter impressum, ut præcedens; Hi autem limbi excogitari ad obscurandum diaphanum paginarum, ne scilicet ad lumen Nomina, & Signa eligentium conspici possint; ubi verò impressoris copia non fuerit, limborum defectus lineis suppleri poterit; sed hæc fient claviora per infrapositam figuram tergi Schedularum Scrutinii, & Accessus.

EXEMPLUM TERGI Schedularum Scrutinii, & Accessus.



Secum

Secundus actus antescrutinii est extractio Scrutatorum, & Deputatorum pro votis Infirmorum, quæ extractio antequam ad Scrutinium procedatur, sorte facienda est, hoc modo. In uno Sacculo, aut Vase, publicè ponantur tot Schedulæ, vel si magis placet, sphærulæ lignæ palam numeratæ, quot sunt Cardinales præsentés in Conclavi cum eorum manibus; deinde per ultimum Diaconum extrabantur primò Scrutatores tres, & postea tres Deputati pro votis Infirmorum, qui brevitate gratia Infirmarii appellari possunt, de quorum omnium officio inferius suo loco scribetur, quod si in extractione Scrutatorum, & Infirmariorum, ac etiam Recognitorum, de quibus suo loco dicitur, extracti fuerint Cardinales, qui ob infirmitatem, aliudve impedimentum muneribus prædictis satisfacere non possint, alii non impediti loco illorum extrabantur; peracta verò extractione, Schedulæ, seu Sphærulæ eorum, qui extracti fuerunt, in Sacculum, seu in Vas iterum conjiciantur.





Tertius actus antescrutinii est Scedularum Scrutini scriptio, quæ fiet hoc modo. Ad duas, vel plures parvas mensas, quæ erunt cum atramento, & calamis paratæ in loco Cappellæ apto, ut qui scribunt conspici possint, quid verò scribitur non possit, accedent Cardinales per ordinem, incipiendo à Decano, & ibi sedentes in Scabellis paratis, Scedulam quisque suam acceptam prius ex disco, scribet hoc modo. Primò, in prima parte in spatio inter verba Ego Card. scribet proprium Nomen; deinde in secunda parte Nomen illius, quem elegit, charactere

tamen, quantum fieri potest, alterato, ut manus scribentis cognosci non possit; & caveat ne plures in Scheda scribat, quia suffragium juxta Gregorianam Constitutionem esset nullum. In tertia verò parte Signa, hoc est numerum aliquem, & dictum aliquod Scripturæ, seu verbum, aut aliquid hujusmodi, ut in exemplo pro faciliori intelligentia oculis subjecto videre est.

EXEM.

E X E M P L U M

Schedulæ Scrutiniî scriptæ.

	Ego Bonifacius Card. Cajetanus	
		
Eligo in Summum Pontificem Reverendis. Dominum meum Dominum Card. Baronium.		
		
	18. Gloria in excelsis.	

Quar.

Quartus actus antescrutinii est Schedularum complicatio, quæ ut expeditius peragi à Cardinalibus valeat, poterit à Cæremoniæ Magistris, cum eas præparant, fieri in hunc, qui sequitur, modum. Binæ fient plicaturæ ex utraque parte cujusque Schedulæ, ita ut nomen eligentis, & Signa, cum fuerint scripta, maneant tecta ex utraque parte à limbis; deinde quod reliquum est, ita complicitur, ut Scheda ferè ad latitudinem pollicis redigatur, prout ex complicata Scheda, quæ hic exempli gratia ponitur, conspici potest.

Cæterum Magistri Cæremoniæ Schedulas non complicatas, ut supra, sed explicatas, & cum cera rubra in parvis circulis ponent in discis, & Cardinales postquam eas, ut supra, scripserint, eò usque solum plicabunt, quò Nomen, & Signa eligentis tegantur, reliquas autem plicaturas tunc facient, cum Schedulas, ut infra dicitur, obfignaverint.

Quintus, & postremus actus antescrutinii est Schedularum obfignatio, quæ ab unoquoque Cardinali facienda erit in tergo Schedularum, cum Sigillo ad hoc parato, in loco parvorum circularum, ubi cera fuit posita. Porro Sigillum non debet esse solitum Cardinalis, sed aliud, & secretè habitum, & ita simplex, ut facile notari possit, veluti si in Sigillo sculpantur; aut tres numeri, aut tres literæ, vel literæ, & numeri, vel una tantum imago, & hæc de antescrutinio sufficiant. Cæterum, quod attinet ad Cardinales infirmos, aut aliter impeditos inferius suo loco dicitur.

Sequi-

Sequitur secunda Actio, quæ nomine Scrutinii appellata fuit. Octo sunt hujus actionis actus, videlicet: Delatio Scedulæ, Juramenti præstatio, Positio Scedulæ in Calicem, Scedularum commixtio, earum numeratio, Scrutinii publicatio, Scedularum in filum insertio, earumque depositio seorsum.

Delatio Scedulæ, & duo sequentes actus, qui melius simul describuntur ob eorum connexitatem, hoc modo fient. Quilibet Cardinalis propriam Scedulam, postquam illam scripserit, obfirmaverit, & complicaverit, duobus primis digitis sumet; ac elevata manu palam deferet ad Altare; penes quod stant Scrutatores, & in quo est Calix magnus ad recipiendas Scedulas paratus, & patena coopertus, ibique genuflectens, aliquantulum orabit; deinde surgens, alta, & intelligibili voce jurabit in hæc formam, quæ in Tabella super Altari posita descripta habetur: Testor Christum Dominum, qui me judicaturus est, me eligere, quem secundum Deum judico eligi debere: & quod idem in Accessu præstabo. Post hæc Scedulam in Patenam ponet, & per Patenam mittet in Calicem, quo facto inclinabit se ad Altare, & ad suum locum revertetur. Et hæc servanda erunt, si Cardinalis ad Altare pergere possit; nam si ob infirmam valetudinem non possit, & præsens in Cappella sit, ultimus Scrutator discum cum Scedulis ad eum deferret, ex quo Cardinalis infirmus unam accipiens, eam in loco secreto, ut supra dictum est, conficiet; deinde

præ-

prævio juramento prædicto Schedulam obſignatam, & complicatam eidem Scrutatori tradet, qui eam palam deferet ad Altare, & ſine oratione, & juramento in Patenam ponet, & per eam in Calicem mittet; quæ omnia obſervanda erunt per ultimum Scrutatorem erga eos Cardinales, qui in Cappella præſentes, ob valetudinem ad Altare pergere non potuerunt. Si verò aliqui Cardinales infirmi ſint in ſuis Cellis, tres Cardinales Infirmarii, ut ſupra, extracti, ad eos accedent cum capsula altitudine unius palmi, in cujus ſuperiori parte ſit rima, ſeu foramen ejus magnitudinis, ut per illud Scheda complicata poſſit per ſuam latitudinem intus capsulam transmitti; quam capsulam antequam Scrutatores Infirmariis tradant, palam aperient, ut cæteri Cardinales poſſint eam inanem, & vacuam conſpicere, deinde claudent, & Clavem ponent ſuper Altare; deinde Infirmarii cum capsula clauſa, & cum parvo diſco tot Schedulas continente, quot ſunt infirmi Cardinales, ad unumquemque eorum accedent, & Infirmi acceptas ex diſco Schedulas, ſecretè ſcribent, obſignabunt, & complicabunt, & prævio jam dicto juramento, in capsulam per rimam mittent; quod ſi infirmi ſcribere non poſſint, alii eorum arbitrio deligendi, præſtito de ſecreto ſervando in manibus Infirmariorum juramento, prædicta facient, atque hi advertere debent, quod non ſolùm juramenti vinculo tenentur ſervare ſecretum, ſed etiam in excommunicationem latæ ſententiæ, ſi contraſecerint, incurrunt; His per-

aliis,

aëtis Infirmarii ad Cappellam revertentur cum capsula, quam Scrutatores aperient, & Schedulas in ea contentas palam numerabunt, & tot repertas, quot sunt Infirmi, ponent singillatim in Patenam, & per Patenam simul omnes in Calicem. Ne autem nimis in longum protrahatur Scrutiniî aëtio, Infirmarii poterunt proprias Schedulas post Decanum conficere, & in Calicem ponere: deinde dum cæteri Cardinales Scrutinium agunt; ad Infirmos pergere ad accipienda eorum suffragia eo modo, quo proximè ante dictum est.

Quartus aëtus Scrutiniî est Scedularum permixtio, quæ fiet per primum Scrutatorem, Calice, in quo ipsæ Scedulæ positæ fuerunt, Patena cooperto plurius agitato.

Quintus aëtus est numeratio Scedularum, quæ palam fiet per ultimum Scrutatorem, capiendò singillatim unamquamque Scedulam ex Calice, eamque ponendo in alium, qui ad hoc paratus sit, Calicem vacuum. Quòd si numerus Scedularum non respondeat numero Cardinalium, omnes comburendæ sunt: & iterum, idest secunda vice ad suffragia statim est deveniendum. Si verò numerus Scedularum numero Cardinalium respondeat, prosequendi sunt alii aëtus Scrutiniî.

Sextus aëtus est publicatio Scrutiniî, quæ per Scrutatores, qui sedent ad Mensam ante Altare positam, fiet hoc modo. Primus Scrutator accipiet unam Scedulam, eamque intactis Sigillis explicabit, & viso in ea Scedula Elekti nomine, eam tradet secundo Scr-

tatori, qui pariter, eodem Electi nomine perspecto, eandem tradet tertio, qui illam alta, & intelligibili voce perleget, ut omnes Cardinales præsentés notare possint suffragium in folio impresso, quod penes se habebunt cum nominibus omnium Cardinalium, notabit autem juxta nomen Cardinalis ex Scheda recitati: Idem faciendum erit de cæteris Schedulis in Calice posititis, usque ad ultimam; quòd si in Scrutinii publicatione, inveniant Scrutatores duas Schedulas ita complicatas, ut ab uno tantum datas fuisse appareat, siquidem unus, & idem in utraque electus fuerit, Schedulæ prædictæ habebuntur, & notabuntur pro uno suffragio; si verò diversis fuerint nominati, neutrum suffragium validum erit, prout in Bulla Gregoriana statuitur de illa Scheda; in qua plures nominati sunt; Scrutinium tamen neutro casu vitatur. Cæterum suffragia prædicta, finita Scrutinii publicatione, poterunt à Patribus, juxta nomina Cardinalium; qui ea obtinuerunt, in unam summam redigi, vel in separato folio notari, hoc modo. Reverendiss. D. Cardinalis A. habet suffragia 20. & Reverendiss. D. Card. B. habet suffragia 15. & sic de aliis, quod fit, ne Cardinales, cum opus est, cogantur semper numerare suffragia, quæ juxta nomina Cardinalium notarunt.

Septimus actus Scrutinii est Scedularum in filum Insertio, quæ, ut Schedulæ ipsæ cautius conservari possint, excogitata fuit. Hæc autem Insertio fiet per ultimum Scrutatorem, inferendo Schedulam unamquamque,

post.

postquam eam perlegerit, ac cum filo ad hunc effectum parato, in loco, ubi est verbum *Eligo*.

Oktavus, & postremus *Scrutini* actus est *Depositio Scedularum* seorsum, quæ similiter fiet per ultimum *Scrutatorem*, qui finita insertione omnium *Scedularum* in filum, capita fili nodo junget, & *Schedulas* omnes ita colligatas in alium *Calicem* vacuum, vel in *Mensam* seorsum ponet.

Sequitur *tertia*, & postrema actio, quæ *Postscrutinium* appellata fuit, cujus actus, si sequuta sit electio per *Scrutinium*, tres tantum sunt, videlicet: *Numeratio Scedularum*, *Recognitio suffragiorum*, & *Scedularum Combustio*, de quibus inferius suis locis dicetur. Si verò per *Scrutinium* non sit sequuta electio, actus sunt septem, videlicet: *Accessus*, *Sigillorum*, & *Signorum aperitio*, eorum *Annotatio*, *suffragiorum Examen*, *suffragiorum Scrutini*, vel *Scrutini*, & *Accessus numeratio*, eorum *Recognitio*, & *Scedularum Combustio*.

Primus itaque actus est *Accessus*, qui immediate post *Scrutinium*, hoc est, post depositas seorsum *Scrutini* *Schedulas* fiet, nisi fortè in *Scrutinio* fuerit creatus *Papa*, tunc enim nullus fieri debet *Accessus*; In quo quidem *Accessu* eadem omnia servanda sunt à *Cardinalibus*, quæ dicta sunt servari debere in *Scrutinio* peragendo, tam in *Scedularum* *scriptione*, *obsignatione*, *complicatione*, *delatione*, & *positione* in *Calicem*, quàm in earum *numeratione*, *publicatione*, *notatione*,

suffragiorum, ac insertione in filum, ac depositione seorsum, exceptis tamen infrascriptis. Primò quòd Cardinales Schedulas pro Accessu sumere debent ex disco Scedularum Accessus. Secundò in Scedularum Accessus scriptione si Cardinalis nemini velit accedere, debet in media Scedulæ parte, loco nominis Cardinalis, qui scribendus esset, si ad eum fieret Accessus, scribere: Nemini: Scedula autem Accessus scribi, & obsignari debet cum iisdem sigillis, & signis Scedulæ Scrutini, sub pœna nullitatis suffragii ipsius Accessus. Tertiò, quòd non potest Accessus fieri ad eum Cardinalem, qui in Scrutinio saltem unum suffragium non obtinuerit, neque ad eum, qui ab ipsomet Cardinali fuit in Scrutinio nominatus. Quartò, quamvis in Accessu non liceat plures nominare, sicut non licet in Scrutinio plures eligere, sub pœna nullitatis suffragii, tam in Accessu, quàm in Scrutinio; nihilominus licebit accedere uni ex pluribus nulliter à se nominatis in Scrutinio, dummodo ei ab alio aliquod suffragium, non tamen nulliter, ut præfertur, in ipso Scrutinio datum fuerit. Quintò, quòd in Accessu non præstatur juramentum, de quo supra, quia in Scrutinio fuit jam præstitum per illa verba: Et quod idem in Accessu præstabo. Sextò denique Infirmarii deferre debent ad Infirmos Schedulas Accessus, & simul etiam unum folium impressum, in quo sit notatus suffragiorum numerus palam recognitus, quæ quisque Cardinalis in Scrutinio nominatus obtinuerit.

Secundus, tertius, & quartus actus postscrutinii sunt sigillorum, & signorum aperitio, eorum annotatio, suffragiorum examen, qui tunc solum locum habere possunt, quando sequuta est electio per Scrutinium, & Accessum: fieri autem debent hoc modo.

Primus Scrutator Schedulas Accessuum, quos obtinuit Electus, in ea parte solum, quæ signa continet, aperiet, & inspectis diligenter earum sigillis, & signis, apertas, ac in filo, ut erant, insertas tradet secundo Scrutatori, & secundus eadem inspectione facta porriget tertio, qui alta, & intelligibili voce sigilla, & signa prædictarum Schedularum enunciabit, & annotabit in latere sinistro folii impressi, ad hunc effectum parati, sub verbis (sigilla, & signa Accessuum) quam etiam annotationem facient cæteri Cardinales, si voluerint, in simili folio impresso.

Deinde primus Scrutator, reliquis Scrutatoribus insipientibus, pro Accessuum prædictorum examine capiet Schedulas Scrutinii, & incipiens ab uno capite fili, in quo insertæ sunt, sigillum primæ ejus Schemæ quæret in sigillis Accessuum notatis, ut supra, in folio impresso, & si illud in eo non invenerit, omissa prima Scrutinii Schemata, capiet secundam, ejusque sigillum similiter quæret; quod si etiam non invenerit, capiet tertiam, & deinde sequentes singillatim, donec sigillum alicujus earum inveniat; eoque invento, Scrutinii Schemata in ea parte, ubi signa sunt, aperiet, & si non invenerit signa hujus
Sche.

Schedulæ concordare cum signis Accessus, Schedulam illam omittet, & aliam capiet, sicut paulo ante de Schedulis non concordantibus in sigillo dictum est; si vero invenerit Signa concordare, ostendet illa secundo, & tertio Scrutatoribus, qui una cum ipsis, post diligens examen super identitate sigillorum, & signorum ambarum Scedularum, Scrutinii scilicet, & Accessus, inspiciet, an idem, vel diversi in utraque Scheda sint nominati, & si idem nominatus sit, suffragium Accessus nullum censebitur; si verò diversi nominati sint, suffragium Accessus pro valido habebitur, & hoc casu tertius Scrutator sigillum, & signa Schedulæ Scrutinii, ac etiam nomen electi, qui in ea continetur alta, & intelligibili voce enuntiabit, & annotabit in latere dextero prædicti folii impressi, sub verbis (sigilla, & signa Scrutinii respondentia Accessibus) notabit autem ea ex adverso Accessus concordantis in sigillo, & signis, quam annotationem cæteri quoque Cardinales, si voluerint, in simili folio impresso facient.

Sed hujusmodi actus, qui explicatione difficiliore sunt, quàm operatione, exemplo meliùs percipientur.

E X E M P L U M

FOLII IMPRESSI,

In quo Accessus, & Scrutini Sigilla,
ac Signa concordantia annotantur.

<i>Sigilla, & Signa Accessuum.</i>	<i>Sigilla, & Signa Scrutini Accessi- bus respondentia.</i>	<i>Cardinales nominati in Scrutinio.</i>
A.C.D.43.Deus. B.R.F.32.Bonitas. R.G.I.50.Beatitudo. N.S.P.26.Gloria.	B.R.F.32.Bonitas. R.G.I.50.Beatitudo.	Card.S.Eusebii. Card.S.Sixti.

*Quòd si fortasse in ista inquisitione contingat duas,
vel plures Schedulas Scrutini reperiri cum eisdem Si-
gillis, & Signis alicujus Schedulæ Accessus, tunc si in
earum aliqua, Electus nominatus fuerit, in alia verò
alius,*

alius, primus Scrutator, reliquis Scrutatoribus similiter inspicientibus, Scrutini Schedulas hujusmodi, & Schedulam Accessus, in ea etiam parte, in qua est Nomen eligentis, & accedentis, aperiet, ut constare possit, secundum Gregorianam Constitutionem de validitate, & invaliditate Accessus; si verò in aliqua hujusmodi Scedularum Scrutini, & Accessus concordantium, non sit nominatus electus, debent eæ Schedulæ omitti, & ad subsequentes procedendum erit.

Quintus actus postscrutini est numeratio suffragiorum, vel Scrutini solius, vel Scrutini, & Accessus, quæ fiet per Scrutatores semper, sive sequuta sit electio, sive non, & si quidem sequuta non sit electio, ut sciatur, quod in eo Scrutinio, vel in Scrutinio, & Accessu non habetur Papa, si verò sequuta sit, ut constet de canonica Pontificis electione. Fiet autem hæc numeratio suffragiorum hoc modo. Scrutatores in unam summam redigent suffragia, quæ quilibet nominatus in Pontificem obtinuit, sive in Scrutinio solo, sive in Scrutinio, & Accessu simul; & si invenerint nullum ex nominatis ad duas tertias partes suffragiorum pervenisse, non habetur Papa in illo Scrutinio, sive Scrutinio, & Accessu; si verò invenerint aliquem ex nominatis, duas tantum partes suffragiorum obtinuisse, aperient Electi Schedulam, etiam in ea parte, in qua est Nomen eligentis; & si quidem ex ea apparuerit, electum aliis suffragatum fuisse, electio ejus erit canonica; si verò consti-

terit sibi suffragium dedisse, ejus electio, ex dispositione Gregorianæ Constitutionis, nulla erit ob defectum unius suffragii. Si denique plures invenerint duas tertias partes suffragiorum obtinuisse, vel etiam ultra duas tertias, tunc in suffragiorum paritate nullus erit Electus; in imparitate verò, ille est canonicus Papa, qui superat alium etiam in suffragio.

Sextus actus postscrutini est Recognitio, quæ per Recognitores, sive sequuta sit electio, sive non, fiet; inspiciendo tam Schedulas Scrutini, & Accessus, quam suffragiorum annotationes factas per Scrutatores, ut per hujusmodi recognitionem constare possit, an Scrutatores sincerè, & fideliter muneri suo satisfecerint: Recognitores autem extrahentur sorte, ut Scrutatores, & Infirmarii, statim quidem post Scrutinium, si sequuta sit in eo electio; si verò non sit sequuta, post Scrutinium, & Accessum, cum scilicet Scrutatores suum impleverint munus per numerationem suffragiorum, & hæc electio fiet, sive sequuta sit electio in Scrutinio, & Accessu, sive non.

Septimus, & postremus actus postscrutini est combustio omnium Scedularum, quæ semper, & palam per Scrutatores fiet, ac statim post recognitionem, sive electio sit sequuta, sive non. Et hæc omnia, quæ de Scrutini ritibus sunt exposita, servanda erunt à Cardinalibus diligenter in omnibus Scrutiniis, sive fiant manè post Missam, sive vespere post Hymnum Veni Creator Spiritus. Atque hi sunt Ritus ex præscripto

Constitutionis Gregorii Papæ XV, in electione Romani Pontificis observandi.

Motu itaque proprio, & ex certa scientia nostra, ac de Apostolicæ potestatis plenitudine omnia, & singula in prædicto Cæremoniali ordinata, & quomodolibet contenta, tenore præsentium perpetuò approbamus, & confirmamus, illisque omnibus, & singulis perpetuæ, & inviolabilis Apostolicæ firmitatis robur adjicimus, eaque à Venerabilibus Fratribus nostris Sanctæ Romanæ Ecclesiæ Cardinalibus, omnibusque, & singulis aliis, ad quos spectat, & spectare quomodolibet poterit in futurum, omnino observari præcipimus, & mandamus, ac Cæremoniale hujusmodi in totum, vel in parte mutari, vel ei aliquid addi prohibemus.

Decernentes sic, & non aliter per quoscunque, ac eosdem Sanctæ Romanæ Ecclesiæ Cardinales, sublata eis, & eorum cuilibet quavis aliter judicandi, & interpretandi facultate, & auctoritate, ubique judicari, & diffiniri debere. Non obstantibus omnibus illis, quæ in primodicta Constitutione volumus non ob stare, cæterisque contrariis quibuscunque.

Nulli ergo omninò hominum liceat hanc paginam nostræ approbationis, confirmationis, adjectionis, præcepti, mandati, prohibitionis, & decreti infringere, vel ausu temerario contraire. Si quis autem hoc attentare præsumserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum

Datum Romæ apud Sanctum Petrum anno Incarnationis Dominicæ millesimo sexcentesimo vigesimo primo quarto, Idus Martii Pontificatus nostri, anno secundo.

Nos, qui, ut rei tam arduæ negotium rite procederet, & absolveretur, intentis studiis desideravimus, cum primum (nullis licet suffragantibus meritis) ad Summi Apostolatus apicem assumpti fuimus, animo revolventes, quantum in omnium animis Constitutionis exequutio, & Cæremonialis prædictorum usus approbationem excitarit, ut Constitutio, & Cæremoniale prædicta nostra etiam confirmatione roborata, inviolabiliter semper observentur providere cupientes, ex mera animi nostri deliberatione, & de Apostolicæ potestatis plenitudine, ac de Venerabilium Fratrum nostrorum Sanctæ Romanæ Ecclesiæ Cardinalium consilio, & assensu, Constitutionem, & Cæremoniale prædicta, cum omnibus, & singulis in eis, & eorum quolibet contentis clausulis, & decretis, hac nostra perpetuò valitura Constitutione, Apostolica auctoritate perpetuò confirmamus, & approbamus, eaque etiam perpetuò in omnibus futuris Romani Pontificis electionibus firmiter, & inviolabiliter observari præcipimus, & mandamus, ac derogationem in eadem Constitutione dicti Gregorii Prædecessoris insertam semper vigere, suamque vim perpetuis futuris temporibus obtinere decernimus.

Non obstantibus, quatenus opus sit, ea in parte, qua præsentibus adversentur recolendæ memoriæ Alexandri Papæ III. similiter Prædecessoris nostri in Lateranensi, quæ incipit *Licet de vitanda*, & quibuscunque aliis etiam in Universalibus Conciliis editis Constitutionibus, & Ordinationibus Apostolicis, & Consuetudinibus etiam immemorabilibus, ac omnibus illis, quæ dictus Gregorius Prædecessor in Constitutione, & Cæremonialis confirmatione prædictis voluit non obstare; quibus omnibus, etiam si de illis, eorumque totis tenoribus specialis, specifica, & expressa, non autem per clausulas generales idem importantes, mentio, seu alia quævis expressio ad hoc servanda foret, omnium, & singulorum tenores, ac si de verbo ad verbum exprimerentur, & infererentur, præsentibus pro sufficienter expressis, & insertis habentes, illis quoad reliqua omnia, quæ Constitutioni dicti Gregorii, & Cæremoniali prædictis, & huic nostro præcepto, mandato, & decreto non sunt repugnantia, in suo robore permansuris harum serie de simili plenitudine potestatis derogamus, & derogatum esse volumus, & hanc nostram derogationem suam pariter effectum perpetuò consequi jubemus, cæterisque contrariis quibuscunque.

Nulli ergo omnino hominum liceat hanc paginam nostræ confirmationis, approbationis, præcepti, mandati, decreti, & derogationis, voluntatis, & jussionis infringere, vel eis ausu temerario con-

traire.

traire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctum Petrum, anno Incarnationis Dominicæ millesimo sexcentesimo vigesimoquinto, quinto Kalendas Februarii, Pontificatus nostri anno tertio.

Ego URBANUS Catholicæ Ecclesiæ Episc.

Ego Franciscus Maria Episcopus Ostien. S. R. E. Card. à Monte promitto, voveo, & juro.

Ego Octavius Episcopus Portuen. S. R. E. Card. Bandinus promitto, voveo, & juro.

Ego Jo. Baptista Episcopus Albanen. S. R. E. Card. Detus promitto, voveo, & juro.

Ego B. Episcopus Sabinen. Card. Bevilacqua promitto, voveo, & juro.

Ego A. Episcopus Prænestinus Card. Perettus promitto, voveo, & juro.

Ego Dominicus Card. Gymnasius tit. S. Laurentii in Lucina promitto, voveo, & juro.

Ego C. Card. Madrucus tit. S. Cæsarei promitto, voveo, & juro.

Ego Scipio tit. S. Chrysogoni Card. Burgbesius Major Pœnitentiarius promitto, voveo, & juro.

Ego Jo. Garzia tit. SS. Quatuor Coronatorum Card. Millinus promitto, voveo, & juro.

Ego

- Ego Marcellus tit. SS. Quirici, & Julitæ Card. Lantes
promitto, voveo, & juro.
- Ego Jo. Bapt. tit. Sanctæ Cæcilie Card. Lenius pro-
mitto, voveo, & juro.
- Ego D. tit. S. Martini in Montibus Card. Rivarola
promitto, voveo, & juro.
- Ego Fr. Augustinus S. R. E. Card. tit. S. Mariæ in
Araceli promitto, voveo, & juro.
- Ego Gaspar tit. S. Crucis in Jerusalem Card. Borgia
promitto, voveo, & juro.
- Ego Fr. Felix tit. S. Anastasiæ Card. Asculanus
promitto, voveo, & juro.
- Ego Gabriel tit. S. Bartholomæi in Insula Card. de
Trejo promitto, voveo, & juro.
- Ego Jac. tit. Sanctæ Sabinæ Card. Sabellus promitto
voveo, & juro.
- Ego M. tit. S. Mariæ de Pace Card. Klefelius pro-
mitto, voveo, & juro.
- Ego S. Card. S. Susannæ S. R. E. Bibliotecarius pro-
mitto, voveo, & juro,
- Ego Guido tit. S. Mariæ de Populo Card. Bentivolus
promitto, voveo, & juro.
- Ego F. Desiderius tit. SS. Duodecim Apostolorum Card.
de Cremona promitto, voveo, & juro.
- Ego L. tit. S. Laurentii in Damaso Card. Ludovif. S. R. E.
Vice-Cancell. & SS. D. N. Summator prom. vov. & juro.
- Ego Cosmus tit. S. Pancratii Card. de Torres pro-
mitto, voveo, & juro.

Ego

Ego F. A. Card. S. Honuphrii promitto, voveo, & juro,

Ego Laurentius tit. S. Mariæ in Aquiro S. R. E. Card.

Magalottus promitto, voveo, & juro.

Ego Aloysius tit. S. Pudentianæ S. R. E. Card. Cajetanus
promitto, voveo, & juro.

Ego Dionysius tit. SS. Trinitatis in Monte Pincio Card.
de Marquemont prom. voveo, & juro.

Ego Laudruvius Card. S. Sixti prom. voveo, & juro.

Ego Jr. Dominicus Spinula Card. S. Clementis prom.
voveo, & juro.

Ego Jacobus Cavalerius S. R. E. Card. S. Eusebii prom.
voveo, & juro.

Ego C. S. Mariæ in Via lata Diaconus Card. Pius prom.
voveo, & juro.

Ego M. S. Eustachii Diaconus Card. de Sabaudia prom.
voveo, & juro.

Ego Alexander S. Mariæ in Cosmedin Diac. Card. Urfi-
nus prom. voveo, & juro.

Ego Franciscus S. Angeli in Foro Piscium Diac. Card.
Boncompagnus prom. voveo, & juro.

Ego Hippolytus S. Mariæ Novæ Diac. Card. Aldobran-
dinus S. R. E. Camerarius prom. voveo, & juro.

Ego P. Maria Burgbesius Diac. Card. S. Georgii prom.
voveo, & juro.

Ego L. SS. Viti, & Modesti Diac. Card. Biscia prom.
voveo, & juro.

CONSTITUTIO INNOCENTII X.

*Constitutio super Titulo, & Insignibus Sanctæ Romanæ
Ecclesiæ Cardinalium.*

INNOCENTIUS EPISCOPUS
SERVUS SERVORUM DEI
Ad perpetuam rei memoriam.

MILITANTIS Ecclesiæ regimini, meritis licet imparibus, per abundantiam Divinæ Gratiæ præpositi, inter gravissimas, multiplicesque Apostolicæ servitutis curas, quibus assidue premimur, in eam peculiari studio incumbimus, ut inter Sanctæ Romanæ Ecclesiæ

Car.

Cardinales; quos tamquam Reipublicæ Christianæ cardines, & clarissima Catholicæ Ecclesiæ lumina omnium virtutum splendore cæteris prælucere decet, fraterna fervetur æqualitas, unde sincerae charitatis affectu sese invicem prosequantur, & dimissa omnium seclarium rerum cura, nonnisi pro communi ejusdem Ecclesiæ bono, ac Omnipotentis Dei gloria, vigeat inter eos laudabilis æmulatio.

Hodie siquidem in Consistorio nostro secreto dilectus Filius Noster Aloysius tit. S. Laurentii in Lucina Presbyter Cardinalis Capponius nuncupatus, Decretum per Venerabiles Fratres Nostros ejusdem Sanctæ Romanæ Ecclesiæ Cardinales Congregationis Cæremoniarum præpositos emanatum, nobis retulit tenoris subsequenti, videlicet: *Sacra Congregatio Cæremoniarum Sanctæ Romanæ Ecclesiæ Cardinalium, in qua interfuerunt Reverendissimi Domini Aloysius tituli Sancti Laurentii in Lucina Presbyter Cardinalis Capponius, Franciscus tituli Sancti Laurentii in Damaso Presbyter Cardinalis Barberinus, Bernardinus tituli Sancti Petri ad Vincula Presbyter Cardinalis Spada, Federicus tituli S. Marci Presbyter Cardinalis Cornelius, Jo. Dominicus tituli Sanctæ Cæcilie Presbyter Cardinalis Spinula, Franciscus Mariæ Sanctorum Duodecim Apostolorum Presbyter Cardinalis Brancatius, Franciscus tituli Sancti Hieronymi Illyricorum Presbyter Cardinalis Montaltus, Carolus Sancti Nicolai in Carcere Diaconus Cardinalis Medices,*

Hieronymus S. Eustachii Diaconus Cardinalis Columna, Raynaldus S. Mariæ novæ Diaconus Cardinalis Estensis, censuit enixè Sanctissimo Domino Nostro supplicandum tamquam pro re maxima congrua, ut directè præcipiat Sanctæ Romanæ Ecclesiæ Cardinalibus, etiam quacunque Natalium, seu præcellentium aliarum dignitatum prærogativa insignitis, quod solo nomine Cardinalis, absque ullo secularis dignitatis additamento contenti, non aliis Titulis nancupentur, nec uti inter eos possint, quàm Eminentiissimi, & Reverendissimi, necnon Eminentie Reverendissimæ, non obstantibus quibuscunque in contrarium facientibus. Insuper, ut Sanctissimus Dominus Noster dignetur mandare, ut omnes Sanctæ Romanæ Ecclesiæ Cardinales supra recensiti, ad unitatem ordinis conservandam, jubeant è propriis Sigillis, & Insignibus quibuscunque, vulgo Armis nuncupatis, amoveri Coronas, Signa, ac omnes notas seculares, præter eas, quibus intra Scutum Armorum eorum Familiæ, tamquam de essentia, & integritate eorundem Armorum utuntur; & ut in posterum ab illorum usu abstineant, solo pileo de pretioso Christi Sanguine rubente, insigniti, ac decorati; ac ulterius Sanctissimus Dominus Noster inhibeat sub excommunicationis latæ sententiæ, ac aliis arbitrii sui pænis Sculptoribus, Pictoribus, ac aliis quibuscunque, ne prædictas notas seculares in Sigillis, & Armis, aliisque Insignibus Sanctæ Romanæ Ecclesiæ Cardinalium

scilicet

*sculpere, ac pingere, aut sculpi, vel pingi mandare
nudeant.*

Quod quidem Decretum prædictus Aloysius Cardinalis retulit supradictam Congregationem censuisse, etiam nomine totius Sacri Collegii in præsentis Consistorio nostro referri, ut non solum illud comprobare, verum etiam pro ipsius usu, & observantia inviolabili literas Apostolicas sub plumbo expediri jubere dignaretur, quas postea Cardinales jam promoti, qui in Urbe sunt, infra decem dies; qui extra illam, & in Italia degunt, infra mensem; qui ultra montes, infra quatuor menses proximos jurare teneantur. Qui verò imposterum promovebantur, si præsentis fuerint, in ipsa Pilci rubei receptione, si absentes, in ipsa Bireti impositione ad Bullæ istius usum, prout de aliis jam emanatis fieri solet, juramento se adstringat. Qua relatione nobis facta omnes Venerabiles Fratres nostri Sanctæ Romanæ Ecclesiæ Cardinales, in prædicto Consistorio præsentis præviis singulorum suffragiis, unanimes, uno ore, & nemine prorsus discrepante, nobis humiliter supplicarunt, ut Decretum prædictum, & omnia quæcunque superius relata, Apostolica auctoritate confirmare vellemus, literasque sub plumbo desuper expediri mandamus.

Nos igitur eorundem Venerabilium Fratrum nostrorum, quorum ope, prudentia, & consilio in rebus gerendis, gravibusque injunctis nobis desuper

Pastoralis officii oneribus indefinenter sublevamur, petitionem hujusmodi æquam, & rationi consentaneam, ac Sacro eorundem Cardinalium Collegio decoram censes, motu proprio, & ex certa scientia, & matura deliberatione nostris, deque Apostolicæ Potestatis plenitudine, de unanimi eorundem Fratrum Consilio pariter, & assensu Decretum præinsertum cum omnibus, & singulis, ut supra, relatis, tenore præsentium perpetuò confirmamus, & approbamus, ac illis inviolabilis Apostolicæ firmitatis vim, & robur adjicimus, omnesque, & singulos tam juris, quàm facti defectus, si qui desuper quomodolibet intervenerint, aut intervenisse dici, vel censi possint, plenissimè supplemus, ac illa à prædictis Cardinalibus nunc, & pro tempore existentibus, aliisque prædictis, & cæteris, ad quos spectat, & spectabit quomodolibet in futurum sub pœnis in eodem Decreto contentis inviolabiliter observari præcipimus, & mandamus. Propterea decernimus de cætero in quibuscunque literis Apostolicis, concessionibus, indultis, & gratiis etiam motu, scientia, deliberatione, & Potestatis plenitudine paribus, etiam cum clausula; *quorum tenores*, ac cum quibuscunque aliis clausulis, etiam derogatoriis derogatoriis, ac etiam per viam legis, aut indulti generalis, etiam consistorialiter, & alias quomodolibet, sub quibuscunque tenoribus, & formis, per nos, & Romanos Pontifices Successores nostros

con-

concedendis, vel à nobis, aut illis emanandis, nunquam censeri præsentis Constitutioni derogatum, nec illi in aliquo præjudicatum, nisi fuerit expresse, & dispositivè illi, toto ejus tenore relato, derogatum.

Decernentes præsentis literas nullo unquam tempore de subreptionis, aut obreptionis, vel nullitatis vitio, seu intentionis nostræ, aut alio quopiam, quantumvis substantiali defectu notari, impugnari, seu redargui, vel adversus illas apertitionis, reductionis ad viam, & terminos juris, aut aliud quodvis juris, facti, seu gratiæ remedium impetrari, seu etiam, motu simili concesso, quempiam in judicio, vel extra illud uti posse, sed easdem præsentis semper validas, firmas, & efficaces existere, & fore, suosque plenarios, & integros effectus fortiri, & obtinere.

Sicque & non aliter in præmissis omnibus, & singulis per quoscunque Judices ordinarios, & delegatos, etiam Causarum Palatii Apostolici Auditores, ac Sanctæ Romanæ Ecclesiæ Cardinales, etiam de latere Legatos; & quosvis alios quavis auctoritate fungentes, nunc, & pro tempore existentes, sublata eis, & eorum cuilibet aliter judicandi facultate, & auctoritate judicari, & definiri debere, irritumque, & inane quidquid contra præmissa, eorumque singula à quoquam scienter, vel ignoranter contigerit attentari.

Non obstantibus Constitutionibus, & Ordinationibus Apostolicis, etiam in Conciliis generalibus
editis.

editis, Cancellariæ Apostolicæ regulis, & præsertim, quatenus opus foret, illa de non tollendo jure quaesito, privilegiis quoque, & indultis etiam Apostolicis cuicunque concessis, & innovatis, ac executioni demandandis, Statutisque etiam juratis tam ejusdem Sanctæ Romanæ Ecclesiæ Cardinalium Collegii, quàm cujuscunque Regni, Provinciæ, & Nationis, ac etiam consuetudinibus, usibus, & styli, quantumlibet inveteratis, & longævis, etiam immemorabilibus, cæterisque in contrarium quomodolibet facientibus; Quibus omnibus, & singulis illorum tenores, etiam majores, & veriores hinc pro expressis, & de verbo ad verbum insertis habentes, harum serie expressè, & plenissimè derogamus.

Nulli ergo omnino hominũ liceat hanc paginam nostræ confirmationis, approbationis, adjectionis, supplicationis, præcepti, mandati, decreti, & derogationis infringere, vel eis ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursurum.

Datum Romæ apud Sanctum Petrum, anno Incarnationis Dominicæ millesimo sexcentesimo quadragesimo quarto, quattodecimo Kalendas Januarii, Pontificatus nostri anno primo.

*Ego INNOCENTIUS Catholica Ecclesiæ
Episcopus.*

Ego Marcell. Episc. Ostien. Card. Lantes.

Ego Francisc. Card. S. Marcelli Episc. Sabinen.

Ego Julius Episc. Tuscul. Card. Roma.

Ego Episcopus Prænest. Card. della Cueva.

Ego Carolus Cardinalis Medices.

Ego A. Card. Capponus.

Ego F. Card. Barberinus tit. Sancti Laurentii in Damaso.

*Fr. Antonius Card. S. Honuphrii tit. S. Mariæ Trans-
tyberim.*

Ego B. tit. S. Petri ad Vincula Card. Spada.

Ego Federicus tit. S. Marci Card. Cornelius.

Ego Julius tit. S. Susannæ Card. Sacchetti.

Ego Dominicus tit. S. Cæcilie Card. S. Cæcilie.

Ego M. Card. Ginnettus tit. S. Mariæ Angelorum.

Ego Aug. Card. Albornotius tit. S. P. Montis Aurci.

Ego Cyriacus tit. S. Salvatoris in Lauro Card. Roccius.

*Ego Jo. B. Card. Pallottus tit. S. Silvestri in Ca-
pite.*

Ego Alexander Card. Bichius tit. S. Sabine.

Ego Ildericus tit. S. Anastasie Card. Carpineus.

Ego M. Ant. Card. Franciottus tit. S. Mariæ de Pace.

*Ego F. Maria Card. Maccbiavellus tit. SS. Joannis
& Pauli.*

Ego P. D. tit. S. Marcelli Card. Cæsius.

Ego F. Vincentius Card. S. Clementis.

*Ego Franciscus Perettus tit. S. Hieronymi Illyrico-
rum Card. Montaltus.*

Ego

Ego Jo. Jacobus tit. S. Stephani in Monte Cælio Card.
Panzirolus.

Ego Gaspar tit. S. Pancratii Card. Matthæus.

Ego Hieronymus tit. S. Eusebii Card. Grimaldus.

Ego M. tit. S. Alexii Card. Theodolus.

Ego F. tit. S. Mariæ in Via Card. Rapacciolus.

Ego A. tit. SS. Quirici, & Julitæ Card. Giorius.

Ego Joannes tit. S. Balbinæ Card. de Lugo.

Ego Antonius S. Mariæ in Via lata Diaconus Card.
Barberinus.

Ego Hieronymus S. Eustachii Diaconus Card. Columna.

Ego Theodorus S. Angeli Diaconus Card. Trivultius.

Ego Virginus S. M. in Cosmedin Diaconus Card.
Ursinus.

Ego Rainaldus Diaconus S. Nicolai in Carcere Card.
Eftensis.

Ego Vincentius Diaconus S. Mariæ in Porticu Card.
Costagutus.

Ego Paulus Æmilius Diac. S. Mariæ in Aquiro Card.
Rondininus.

Ego Joannes Carolus Cardinalis Medices.

Ego Camillus Diac. S. Mariæ in Domnica Card.
Pampbilius.

CONSTITUTIO ALEXANDRI VII.

De Bonis Ecclesiæ non alienandis.

ALEXANDER EPISCOPUS
SERVUS SERVORUM DEI

Ad perpetuam rei memoriam.

INter cæteras animi sollicitudines, quibus in administratione Pastoralis officii nobis Divina Providentia commissi assidue premimur, ea vehementer urget, quæ Sedis Apostolicæ dignitatem, ejusque Status, etiam temporalis, conservationem concernit. Hac ideo ratione, licet plurimum Sum-
T
morum

morum Pontificum Prædecessorum nostrorum decreta, & literæ providè, ac sanctè conditæ fuerint, præsertim recolendæ memoriæ Pii V. sub datum quarto Kalendas Aprilis anno millesimo quingentesimo sexagesimo septimo, ejus Pontificatus secundo, videlicet:

Pius Episcopus Servus Servorum Dei ad perpetuam rei memoriam. Admonet nos suscepti cura regiminis Universalis Ecclesiæ, cui Auctore Domino præsidemus, ut Civitates, Terra, Oppida, & Loca, nobis, & Sedi Apostolicæ in temporalibus mediâtè, & immédiâtè subjeçta, perpetuò in jure, dominio, & proprietate, ac possessione dictæ Sedis conserventur.

Sanè licèt nonnulli Romani Pontifices Prædecessores nostri per eorum Constitutiones rerum Ecclesiasticarum alienationem probibuerint, & jam factas revocaverint, & annullaverint, nihilominus cùm retroactis temporibus nonnulli nimium ambitiosi, & dominandi cupidi sub variis prætextibus, coloribus, & causis, sæpe etiam falsis, quod non sinè maximo animi nostri mœnore referimus, aliquibus Romanis Pontificibus suggestionibus, & insinuationibus suis conati sint ostendere, & persuadere magis utile, & expediens Sanctæ Romanæ Ecclesiæ, & Sedi prædictæ fore, si aliquæ Civitates, Terræ, Oppida, Castra, Arces, & Loca ad jus, & proprietatem ejusdem Sedis pertinentia, in Feudum, Gubernium, Vicariatum, Ducatum, aut quemvis alium titulum perpetuum, vel ad tertiam generationem,

seu

seu ad vitam, aut aliàs in longum tempus concederentur, vel etiam ex eo, quod in Feudum data, aut quovis alio titulo hujusmodi alienata fuerint, & propterea tamquam ad Sedem prædictam devoluta, vel devolvenda posse, & debere de jure iterum infeudari, & alienari, atque inde nonnullas alienationes, infeudationes, & concessiones à Sede Apostolica emanasse, ex quibus illa non mediocrem diminutionem non solum Patrimonii, sed etiam æstimationis recepisse dignoscitur.

Hinc est, quod nos considerantes omnium Civitatum, & Locorum prædictorum singularem Fidem, & promptam devotionem eidem Sedi exhibitam omni tempore valde utilem, & salutarem fuisse, & esse, ac volentes non solum alienationis hujusmodi, quas tempore nostro omnino exulare intendimus, de medio tollere, & quod nobis licere non patimur, nostris Successoribus indicamus, quas non immemores fore speramus ante Domini Nostri JESU CHRISTI in examine diei magni adventus Tribunal, villicationis nostræ rationem reddituros Nos esse; sed ut omnis alienationum hujusmodi fiendarum occasio penitus aboleatur, quantum cum Deo possumus, per amplius providere, Constitutionibus Prædecessorum nostrorum hujusmodi etiam inbærendo, illasque innovando, Motu proprio, & ex certa nostra scientia non ad alicujus super hoc oblatæ petitionis instantiam; sed ex mera animi nostri deliberatione, & de Apostolicæ Potestatis plenitudine, habita etiam super bis cum Venerabilibus Fratribus nostris S. R. E. Car-

dinalibus in Consistorio Secreto consultatione matura, de eorum consilio, & unanimi consensu, qui etiam iuraverunt præsentì Constitutioni non contravenire, nec Pontificibus alienationes contra tenorem præsentium attentantibus consentire, & absolutiones à juramento hujusmodi non petere, nec acceptare, hac nostra perpetuò valitura Constitutione, decernimus, & declaramus Civitates, & Loca prædicta, etiam hætenus in Feudum, aut quemvis alienationis titulum dari solita, vel consueta, ad Nos, & Sedem prædictam quomodolibet devoluta, & pro tempore devolvenda absque alia ulteriori declaratione, & illorum possessionis apprehensione, eo ipso Sedi, & Cameræ Apostolicæ incorporata, ac ad jus, & proprietatem, & dominium pristinum, ad possessionem rediisse censi, perinde ac si per quadraginta annos, & ultra Civitates, & Loca prædicta à Nobis, & Sede prædicta immediatè possessa, & nunquam in Feudum, aut alium titulum concessa fuissent, statuimusque, & decernimus, quod omnes, & singulæ tam Communitates, & Universitates, quàm Cives, & incolæ Civitatum, Terrarum, & Locorum prædictorum, aliæque quæcunque Personæ tam Ecclesiasticæ, quàm Seculares cujuscvis dignitatis, & ordinis, etiam Episcopalis, vel majoris existentes, ac Sanctæ Romanæ Ecclesiæ Cardinales, tam publicè in consiliis Civitatum, & Locorum prædictorum, quàm privatim alibi in quibuscvis Locis, etiam Civitatum, & Terrarum earundem Gubernatores, aut Sedis Apo-

stolicæ Legati, vel Pro-Legati existant, tractantes, consulentes, aut aliàs verba facientes de infeudationibus, aut alienationibus de Civitatibus, & Locis prædictis, immediatè ad Nos, & Sedem prædictam spectantibus, & pertinentibus, etiam devolutis, etiam in Feudum communiter dari solitis, etiam ex causa permutacionis; vel sub annuo censu, vel canone, aut aliàs quomodolibet etiam contemplatione meritorum erga Sedem prædictam, aut sub prætextu necessitatis, vel evidentis utilitatis faciendis, seu de postulandis à Nobis, & Sede prædicta quibuscumque personis cujuscumque dignitatis, status, gradus, etiam Nobis, & Successoribus nostris secundum carnem conjunctis, etiam Sanctæ Romanæ Ecclesiæ Cardinalibus, aut quavis alia temporali, vel Ecclesiastica dignitate fungentibus, in Duces, Vicarios, Gubernatores, seu quemvis alium titulum ad vitam, vel in perpetuum, vel longum tempus, etiam Sedis Apostolicæ beneplacitum Civitatum, & Locorum prædictorum, ac propterea de eligendis Oratoribus ad Nos, & Successores nostros super præmissis, vel illorum occasione mittendis, proponentes tam ipsi, quàm Oratores munus hujusmodi recipientes, aut alii quascunque alienationes hujusmodi Romano Pontifici pro tempore existenti per Se, vel alium, seu alios insinuantes, & suadentes, eo ipso sententiam excommunicationis incurrant, à qua, nisi ab ipso Pontifice, præterquam in mortis articulo absolvi nequeant, & insuper Sanctæ Romanæ Ecclesiæ Sedis Apostolicæ prædictæ rebelles etiam

in pri-

in primo capite læsæ Majestatis, & Proditores Civitatum, & Locorum prædictorum, ac bona eorum Fisco Camera nostræ Apostolicæ ipso jure devoluta, & incorporata sint, & esse censeantur, omnibusque Ecclesiis, Monasteriis, & aliis per eos quomodolibet obtentis Beneficiis Ecclesiasticis, eo ipso privati existant, neque ad Civitates, & Loca prædicta ullo unquam tempore remitti possint, & si aliquando eos reintegrare contigerit, nihilominus infames remaneant, illisque bonorum, & dignitatum portæ perpetuò claudantur: & quoniam intelleximus aliquos etiam Cardinales, Civitates, Terras, Oppida, Castra, Arces, & Loca ad vitam, seu tertiam, vel aliam generationem, aut aliàs à dicta Sede, etiam ex causa onerosa obtinere, habere, & possidere, cum facultate faciendi in illis melioramenta, ita quòd ab eis amoveri non possint, nisi restitutis sibi priùs pecuniis in melioramento hujusmodi expositis, omnes, & singulas facultates faciendi melioramenta prædicta quibusvis Personis, etiam Cardinalibus per eosdem Prædecessores nostros, aut alios ad id facultatem habentes quomodolibet concessas harum serie revocamus, & annullamus, & nemini deinceps suffragari posse, neque debere: ac cuicumque facultatem faciendi hujusmodi melioramenta habenti illa etiam pro munitione, & tuitione; nisi ex causa necessariæ conservationis Locorum eorundem facta fuerint, post publicationem præsentium facere omnino interdicimus, & prohibemus, & si secus à quoquam factum, attentatumve fuerit

fuerit melioramenta quæcunque per eos contra tenorem præsentium facta Locis ipsis cedere, & Cameram ad illorum satisfactionem minimè teneri, & obligatam esse volumus, & declaramus; Decernentes præsentis litteras sub quibusvis revocationibus, cessationibus, derogationibus, & aliis contrariis dispositionibus, sub quibusvis tenoribus, & formis, ac cum quibusvis Clausulis, & Decretis pro tempore quomodolibet factis minimè comprehendendi, sed semper ab illis exceptas, & quoties illæ emanabunt, toties in pristinum statum restitutas, & denuò concessas esse, & censeri debere, irritum quoque, & inane si secus super his à quoquam, quavis auctoritate scienter, vel ignoranter contigerit attentari.

Non obstantibus Constitutionibus, & Ordinationibus Apostolicis, ac Civitatum, & Locorum prædictorum etiam juramento, confirmatione Apostolica, vel quavis firmitate alia roboratis Statutis, & consuetudinibus, cæterisque contrariis quibuscunque.

Sic igitur devotionis, ac fidei constantia Civitatum, & Locorum prædictorum erga Nos, & Successores nostros, & eamdem Romanam Ecclesiam perseveret, ut meritò integritatis Virtus majora Beneficia ab eadem Sede consequi mereatur.

Volumus autem, quod sicuti omnes, & singuli Cardinales præsentem Constitutionem hujusmodi, quantum in eis erit, observare, illique non contravenire, nec Pontificibus contra facientibus consentire, aut ab-

solv.

solutionem à juramento prædicto non petere, nec oblatam, aut concessam acceptare in Consistorio nostro secreto promiserunt, & jurarunt, idem per absentes Cardinales à Consistorio in habitatione, & à Romana Curia, ut quandocunque ad eandem Curiam se contulerint, ac per futuros pro tempore Cardinales promitti in assumptione Pilei, & jurari debeat, ac promissionem, & juramentum hujusmodi in formula juramenti per eosdem Cardinales præstari soliti adjungi, & inseri debere, ac contrasacientes pœnam perjurii, & perpetuæ infamiæ juris, & facti eo ipso incurrere decernimus. Præterea, quod ipsi Cardinales, occurrente Apostolicæ Sedis vacatione in Conclavi, quando de observandis literis Julii Secundi Prædecessoris nostri super electione Romani Pontificis, & aliis Constitutionibus juramentum præstare solent, etiam de inviolabiliter observanda præsentì Constitutione nostra per quemlibet eorum, qui in Romanum Pontificem electus fuerit, & postmodum idem ad Summi Pontificatus fastigium assumptus, post ejus assumptionem hoc ipsum promittere, & jurare, & deinde post Coronationem suam promissionem, & juramentum hujusmodi per literas suas speciales harum confirmatorias reiterare debeat, quod si illud à Pontifice, quod credendum non est, recusabitur, aut differretur, tam dicti Cardinales in primo Consistorio secreto, & præcipuè eorum Decanus, & Capita Ordinum apud eum omni cum instantia, & instantissimè pro præsentium observatione petere, & ro-
gare,

gare, & obtestari non cessent, idque ut omnino efficiat, diligentissime curare studeant, statuimus, & ordinamus; Quodque præsentis literæ in libellum redigantur, & post prædicti Julii literas, quæ in dicto Conclavi legi solent, inter alias Constitutiones nostras adjungantur, & etiam in Quinterno Cancellariæ Apostolicæ cum aliis extravagantibus nostris describantur, & ad valvas Basilicæ Beati Petri Principis Apostolorum, & in Cancellaria nostra Apostolica, ac Acie Campi Floræ publicentur: Et quia difficile foret præsentis ad singula quæque loca deferri, decernimus etiam, & declaramus, quod earum transumptis etiam impressis, manu alicujus Notarii subscriptis, & Sigillo alicujus Prælati munitis, eadem prorsus fides in judicio, & extra adhibeatur, quæ præsentibus adhiberetur, si forent exhibitæ, vel offensæ.

Nulli ergo omnino hominum liceat hanc paginam nostræ declarationis, revocationis, decreti, statuti, & interdicti, prohibitionis, ordinationis, & voluntatis infringere, eique ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursum.

Datum Romæ apud Sanctum Petrum, anno Incarnationis Dominicæ millesimo quingentesimo sexagesimo septimo, quarto Kalendas Aprilis Pontificatus nostri anno secundo.

Quæ ab ejus etiam Successoribus Romanis Pontifici-

tificibus fuerunt approbata, & confirmata, & præsertim ab Innocentio Nono felic. recordationis cum declaratione, & extensione in ejus literis, pridie nonas Novembris, millesimo quingentesimo nonagesimo primo, Pontificatus anno primo, inserta sequentis tenoris, videlicet:

INNOCENTIUS Episcopus Servus Servorum Dei ad perpetuam rei memoriam. Quæ ab hac Sancta Sede, &c.

Nihilominus, quia nonnullæ pro varietate casuum contingentium successivis temporibus excitatæ fuerunt dubitationes, ac improprie forsân subsequutæ interpretationes, propterea, ut hæ quoque cessent, & removeantur, congruum fore duximus easdem literas in præsentia comprobare, innovare, & confirmare, ac verum illarum sensum exponere, & quatenus opus sit, de novo decernere.

Hæc igitur nostra perpetuò valitura Constitutione, motu proprio, non ad alicujus supplicationem, vel super hoc oblata nobis petitionis instantiam, sed ex mera deliberatione, & ex certa Scientia nostra, easdem Prædecessorum, & specialiter præinfertas Pii V. & Innocentii IX. ac omnia in eis contenta, auctoritate Apostolica tenore præsentium comprobamus, confirmamus, & innovamus, easque inconcussæ, & validissimæ firmitatis robur, plenamque executionem, & effectum perpetuis etiam futuris temporibus obtinere, & ab omnibus inviolabiliter

servar.

servari decernimus, præcipimus, & mandamus. Præterea, ne in posterum germanus earundem litterarum sensus in dubium revocari, & à conditoris mente recedi contingat, motu, scientia, & deliberatione paribus, & de potestatis Apostolicæ plenitudine habita super hoc cum Venerabilibus Fratribus nostris Sanctæ Romanæ Ecclesiæ Cardinalibus consultatione matura, & singulorum auditis sententiis in nostro Consistorio Secreto, ac etiam extrâ, oretenus, & in scriptis de eorum consilio, & assensu declaramus prædictas Pii V. literas comprehendere non solum Principatus, Ducatus, Civitates, Castra, Oppida, Terras, Arces, Dominia, & Loca, jurisdictionales, & jurisdictionalia Sanctæ Romanæ Ecclesiæ, & Sedis Apostolicæ in Feudum, Vicariatum, vel alium Titulum tunc concessas, & concessa, ac etiam alias aliquando; & pluries concedi solitas, & solita quocunque tempore ad Cameram Apostolicam devoluta; verum illas quoque, & illa, quæ nunquam antea in feudum, vel alium titulum concessa, sed per Cameram, & Sedem Apostolicam immediatè possessa fuerunt, vel tunc possidebantur, prout etiam felicitis recordationis Clemens Octavus Prædecessor noster, suo Consistoriali decreto, die vigesima sexta Junii anno millesimo quingentesimo nonagesimo secundo Pontificatus illius primo declaravit, cujus sequitur tenor:

CLEMENS OCTAVUS Sanctissimus Dominus noster dixit post editam per sanctæ recordationis Pium Papam Quintum Sanctitatis Suæ Prædecessorem de Fratrum consilio Constitutionem de non alienandis Civitatibus, Terris, Oppidis, & Locis sibi, & Apostolicæ Sedi in temporalibus mediâtè, & immediâtè subiectis, etiam ad illud usque tempus in Feudum, atque quemvis alienationis titulum dari solitis, ad Sedem prædictam quomodolibet devolutis, & pro tempore devolvendis, gravissimis impositis pœnis contra personas tractantes, consulentes, aut aliàs verba facientes de hujusmodi Civitatum, Terrarum, Oppidorum, & Locorum infeudationibus, etiam sub prætextu necessitatis, evidentisque utilitatis, sive illas insinuant, & suadentes, prout in ipsa Constitutione sub datum quarto Kalendas Aprilis Pontificatus sui anno secundo edita, sæpius postmodum per Prædecessores suos, ac novissimè per Sanctitatem Suam comprobata latius continetur piæ memoriæ Gregorium Decimumquintum itidem Prædecessorem suum in Consistorio secreto Romæ apud Sanctum Marcum die Veneris decima tertia Septembris millesimo quingentesimo nonagesimo primo habito, sententiis tamen Sanctæ Romanæ Ecclesiæ Cardinalium, qui tunc aderant, & de quorum numero etiam Sanctitas Sua erat, minimè requisitis, quinimo, multis eorum expressè contradicentibus declarasse, & decrevisse Pii Prædecessoris Constitutione prædicta non prohiberi Feudum nondum devolutum, quando necessitas, aut evidens,

&c.

Et vera Ecclesiæ utilitas postulaverit iterum infeudari,
 nec juramentum in ea præstitum similem casum com-
 prebendere, ac neminem licitè jurare posse, quod con-
 tra necessitatem, aut evidentem utilitatem Ecclesiæ sit,
 sique prædictam Constitutionem intelligendam judicas-
 se, Et desinuisse, ita ut nemini postea de ea aliter,
 quàm tunc ab ipso declaratum fuit loqui, Et scribere
 liceret, prout in eodem decreto, Et declaratione ple-
 niùs continetur. Verùm, quia re ipsa compertum est,
 quod ferè omnes alienationes Terrarum, Civitatum,
 Oppidorum, Locorum hujusmodi hætenus factæ, ex
 quibus magna læsio, Et imminutio Patrimonii, ac ex-
 stimationis Sanctæ Romanæ Ecclesiæ sequuta est, etiam
 sub prætextu, Et colore veræ, Et evidentis necessitatis,
 vel utilitatis Prædecessoribus Sanctitatis Sæ insinua-
 tæ fuerunt, cùm tamen vix ulla necessitas excogitari
 possit, cùm ex aliis bonis, aut redditibus, Et proven-
 tibus, quàm Constitutione prædicta alienari prohibitis
 subveniri nequeant, vix etiam ulla dari posset utili-
 tas, cui non præponderet recuperatio, Et realis rein-
 tegratio in Patrimonium Sanctæ Romanæ Ecclesiæ ea-
 rumdem Civitatum, Et Locorum hac usque alienato-
 rum, cùmque hujusmodi casus absolutæ necessitatis, aut
 veræ, Et evidentis utilitatis faciliùs mente, atque
 animo concipi, Et effingi, quàm usu venire possint,
 multò magis expedire omnium prorsus alienationum,
 Et investiturarum, prorogationum, Et aliarum conces-
 sionum quomodocunque, Et sub quibuscunque causis,

Et prætextibus attentandi viam omnino præcludere, quam ob rarissimos casus, qui vix unquam contingere possint, apertam relinquere, cumque lucrum in tempore negligere, quandoque maximum sit Ecclesiæ lucrum, utilius esse radices omnes, ex quibus huiusmodi alienationes provenire valeant penitus evellere, quam ex eo quod aliquando possit earum aliqua utilis esse, occasionem præbere, ut multæ præjudiciales, et damnosæ fiant, cui absurdo, atque incommodo ipsum Pium Prædecessorem prædictum dicta Constitutione, non immerito occurrere voluisse, qui longè plures, et graviores jacturas ex multis perniciosis distractionibus sequi posse censuit, quam utilitates ex paucissimis, si quæ unquam contingerent, fructuosæ. Proinde Sanctitas Sua habita super hoc cum Venerabilibus Fratribus Sanctæ Romanæ Ecclesiæ Cardinalibus deliberatione matura, et singulorum auditis sententiis, de eorum consilio, et unanimi assensu decretum, et declarationem superius memoratam felicitis recordationis Gregorii Decimiquarti tanquam destruens prædicti Pii Constitutionem, alienandique occasionem præbens, ac minimè necessariam, et desuper forsan confectas literas, quarum omnium tenores haberi voluit pro expressis, ac ad verbum insertis, Auctoritate Apostolica revocavit, abrogavit, cassavit, et annullavit, perinde ac si nunquam emanassent, declarans dicta Constitutione prohiberi Civitatum, Terrarum, Oppidorum, Feudorum, et Locorum in ea contentorum, tam quæ nunquam antea in Feudum concessa,

cessa, quàm quæ aliàs sæpius etiam in Feudum alienata, ac postmodum devoluta, aut etiam nondum devoluta fuerunt, alienationes, infeudationes, & prorationes, & extensiones investiturarum, feudorum, & concessionum, etiam ex causa necessitatis, aut evidentis, & veræ utilitatis factas, & faciendas, jurementum quoque super ejusdem Constitutionis observatione per Sanctitatem Suam, & Successores Suos, ac Sanctæ Romanæ Ecclesiæ Cardinales præstitum, præstandum casum hunc necessitatis etiam absolutæ, & evidentis, & veræ utilitatis omnino comprehendere, nec propterea aliquid illicitum jurari, aut quod contra necessitatem, & utilitatem Ecclesiæ sit, sed quod rationi consonum, atque & re illius est, ac summopere conducit, prout eadem auctoritate declaravit, statuit, & decrevit cum clausulis, & derogationibus opportunis. Actum Romæ in Monte Quirinali die vigesima sexta Junii millesimo quingentesimo nonagesimo secundo in Consistorio secreto.

Pariterque declaramus sub eadem Constitutione comprehensa fuisse, & comprehendere Principatus, Ducatus, Civitates, Castra, Oppida, Terras, Arces, Dominia, & Loca, jurisdictionales, & jurisdictionalia, non tantum ad Sanctam Romanam Ecclesiam, & Sedem, & Cameram Apostolicam eo tempore devoluta, aut alio quocunque Titulo quomodolibet acquisita, sed quæ post eam usque in præsentia, & in futurum successivis temporibus in per-

petuum

petuum five devolutionis, five alio quovis titulo quomolibet acquisita fuerant, acquirentur, salvis tamen Constitutionibus editis pro bonis confiscatis à felicis recordationis Gregorio XIII. quinto Idus Julii anno 1580. sui Pontificatus nono, & Sixti V. Kalendas Julii anno 1585. ejus Pontificatus primo, quibus cautum fuit Ducatus, Dominia, Vicariatus, Gubernia, Feuda, aliaque bona ad prædictam Sedem, & Cameram Apostolicam ratione delictorum, & confiscationum in casibus in eis statutis delata, sub eadem Pii V. Constitutione super hujusmodi dominiis, & jurisdictionibus in feudum, aut aliàs non concedendis, nec alienandis edita, minimè comprehendi, declarantes tamen illas intelligendas esse, prout intelligi decernimus, & mandamus, ut Principatus, Ducatus, Civitates, Castra, Oppida, Terræ, Arces, Loca, Dominia, Vicariatus, Gubernia, Feuda, & Loca jurisdictionalia in illis comprehensa, & ex earum dispositione confiscata, & confiscanda non subjiciant, neque subiacere debeant prædictis literis Pii V. pro eo tempore solum, quo delinquens, seu delinquentes vixerint, & investituræ, si quæ antea concessæ fuerunt, durabunt, ac personæ, seu lineæ in illis comprehensæ supererunt, & salvis etiã pactis in ipsis investituris contentis. Insuper eisdem motu, scientia, deliberatione, ac potestate declaramus dispositionem prædicti recolendæ memoriæ Clementis Octavi in iisdem literis septimo Kalendas Julii an-

no 1596. ejus Pontificatus quinto, in quibus decrevit Civitates, Terras, Castra, & Loca jurisdictionalia per Camera Apostolicam in vim ejusdem Constitutionis emenda, & acquirenda in dicta præcedenti Constitutione Pii V. per triennium à die illarum venditionis computandum, minimè comprehendi debere, ita intelligendam esse, ut statim finito dicto triennio, quatenus eo durante non fuerit deventum ad illorum veram, propriam, & effectivalem alienationem, Civitates, Castra, Terræ, & Loca prædicta ipso jure, & facto censeantur unita, & incorporata eidem Sedi, & Camera Apostolicæ, atque subjecta, & comprehensa in prædictis Pii V. literis, etiam nulla alia facta declaratione, acceptatione, seu decreto, ita ut dictus terminus trium annorum nullo pacto suspendi, prorogari, vel aliter impediri possit cursus illius, neque incorporatio, comprehensio, & subjectio prædicta, & ita esse servandum decernimus, & mandamus. Postremò statuimus, ut sicut nos præinsertas Pii V. ac Innocentii IX. & Clementis VIII. literas, seu decretum sub die vigesima sexta Junii 1592. & omnes, & singulas Constitutiones, & Decreta, tam ejusdem Clementis, quàm aliorum Pontificum Prædecessorum nostrorum, quibus Civitates, Castra, Oppida, & alia Loca, & bona hujusmodi jurisdictionalia Sedi, & Camera Apostolicæ quocunque tempore unita, & incorporata, ac prædictis literis Pii V. subjecta fuerunt,

& specialiter Decretum à nobis die vigesima Decembris proximè præteriti in nostro Consistorio secreto, assentientibus pariter, & approbantibus Venerabilibus Fratribus Nostri Sanctæ Romanæ Ecclesiæ Cardinalibus, factum super incorporatione, ac subjectione Ducatus Castri, & Oppidorum Roncilionis, Valerani, & aliorum omnium Locorum, & bonorum jurisdictionalium, quæ à recolendæ memoriæ Innocentio V. Prædecessore nostro, sibi, & eidem Camera Apostolicæ acquisita, ex Instrumentis respectivè rogatis per acta Bartholomæi Brunori die 7. Octobris 1649. & Francisci Lucarelli Camera Apostolicæ, & Caroli Viperæ Capitoli Notariorum die XIX. Decembris ejusdem anni, ac præsentem nostram Constitutionem inviolatè servaturos promittimus, & sanctè ac solemni more juramus, & Cardinales omnes, & singuli præsentés in Consistorio nostro hodierna die, ut moris est, habito pariter jurejurando promiserunt juxta formam, & tenorem juramenti pro observatione prædicta Pii V. per eos antea præstiti, & ita absentes à Consistorio in eorum habitationibus, & à Curia, quandocunque ad eam se contulerint, ac futuri pro tempore Cardinales in sumptione Pilei, & deinde in Conclavi, ac etiam post assumptionem ad Pontificatum in manibus Cardinalis Vice-Cancellarii pariformiter promittere, & jurare debeant easdem omnes, & singulas Constitutiones, & hanc nostram, quantum in eis erit,

obser.

observare, illisque non contravenire, nec Pontificibus contrafacientibus consentire, & absolutionem à juramento præstito non petere, nec oblatam, aut concessam acceptare, ac jusjurandum hujusmodi in formula juramenti per eosdem Cardinales præstari soliti, adjungi, & inferi debere, ac contrafacientes pœnam perjurii, ac perpetuæ infamiæ juris, & facti eo ipso incurrere decernimus. Præterea quod ipsi Cardinales, occurrente Sedis Apostolicæ vacatione in Conclavi, quando de observandis literis recolendæ memoriæ Julii Papæ II. Prædecessoris nostri super electione Romani Pontificis, & aliis Constitutionibus juramentum præstare solent, etiam de inviolabiliter observandis prædictis, ac præsentì Constitutione nostra per quemlibet eorum, qui in Romanum Pontificem electus fuerit, & postmodum idem ad Summi Pontificatus fastigium assumptus, post ejus assumptionem, hoc ipsum ad majorem cautelam promittere, ac jurare, & deinde post Coronationem suam promissionem, & juramentum hujusmodi per literas suas speciales harum confirmatorias reiterare debeat, quod si illud à Pontifice, quod credendum non est, recusabitur, aut differetur, tunc dicti Cardinales in primo Consistorio secreto, & præcipuè eorum Decanus, & capita Ordinum apud eum omni cum constantia, & instantissimè pro præsentium observatione petere, & rogare, ac obtestari non cessent, idque ut omnino efficiat diligentissimè

curare studeant , statuimus , & ordinamus . Decernentes præsentēs literas sub quibuscumque revocationibus , cassationibus , derogationibus , ac aliis contrariis depositionibus , sub quibuscumque tenoribus , & formis , ac cum quibuscumque clausulis , & decretis pro tempore quomodolibet factis , & faciendis , minimè comprehendendi , sed semper ab illis exceptas , & quoties illæ emanabunt , toties in pristinum statum restitutas , & de novo concessas esse , & censeri : & ita per quoscunque Judices Ordinarios , & Delegatos , quavis auctoritate fungentes , etiam Cameræ prædictæ Præfidentes , & Clericos , causarum Palatii Apostolici Auditores , ac Sanctæ Romanæ Ecclesiæ Cardinales in quavis causa , & instantia ; sublata eis , & eorum cuilibet quavis aliter judicandi , & interpretandi facultate , & auctoritate , judicari , & definiri debere , ac irritum , & inane , si secus super his per quoscunque quavis auctoritate scienter , vel ignoranter contigerit attentari . Ac præsentēs nostras literas in libello , quo ipsa Constitutio Pii V. Prædecessoris continetur , ac in libro *Quinterno* appellato Cancellariæ Apostolicæ describi mandamus . Non obstantibus Constitutionibus , ordinationibus Apostolicis , ac Civitatum , & Locorum prædictorum etiam juramento , confirmatione Apostolica , vel quavis firmitate alia roboratis Statutis , & consuetudinibus , & aliis , quæ idem Pius Prædecessor voluit non obistere , cæterisque in contrarium facientibus quibuscunque ,

Nulli

Nulli ergo hominum omnino liceat hanc paginam nostræ approbationis, confirmationis, innovationis, declarationis, voluntatis, decreti, promissionis, ac juramenti, & mandati infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus, se noverit incursum.

Datum Romæ apud Sanctam Mariam Majorem anno Incarnationis Dominicæ millesimo sexcentesimo sexagesimo, nono Kalendas Novembris, Pontificatus nostri anno sexto.

*Ego ALEXANDER Catholica Ecclesiæ
Episcopus promitto, voveo, & juro.*

Ego Franciscus Episcopus Portuensis Card. Barberinus promitto, voveo, & juro.

Ego Bernardinus Episcopus Prænестinus Card. Spada promitto, voveo, & juro.

Ego J. Episcopus Sabinen. Card. Sacchetti promitto, voveo, & juro.

Ego M. Episcopus Albanen. Card. Ginnettus promitto, voveo, & juro.

Ego Hieronymus tit. S. Laurentii in Lucina Presb. Card. Columna promitto, voveo, & juro.

Ego Jo. Baptista tit. S. Mariæ Trans-Tyberim Card. Pallottus promitto, voveo, & juro.

Ego

*Ego Uldericus tit. S. Petri ad Vincula Card. Carpi-
neus promitto, voveo, & juro.*

*Ego M. Antonius tit. S. Mariæ de Pace Card. Fran-
ciottus promitto, voveo, & juro.*

*Ego Steph. tit. S. Laurentii in Pane, & Perna Card.
Duratius promitto, voveo, & juro.*

*Ego F. Vincentius Maculanus tit. S. Clementis Card.
S. Clementis promitto, voveo, & juro.*

*Ego Hieronymus tit. Sanctissimæ Trinitatis in Monte
Pincio Card. Grimaldus promitto, voveo, & juro.*

*Ego Angelus tit. SS. Quirici, & Julitæ Card. Giorius
promitto, voveo, & juro.*

*Ego N. Card. Ludovisus Major Pænitentiarius pro-
mitto, voveo, & juro.*

*Ego Federicus S. Anastasiæ Presb. Card. Sfortia pro-
mitto, voveo, & juro.*

*Ego Benedictus tit. S. Honuphrii Card. Odescalcus
promitto, voveo, & juro.*

*Ego Camillus tit. S. Petri in Monte Aureo Card.
Astallius promitto, voveo, & juro.*

*Ego Aloysius tit. S. Alexii Card. Homodeus promit-
to, voveo, & juro.*

*Ego Jacobus tit. S. Mariæ Transpuntinæ Presb. Card.
Corradus promitto, voveo, & juro.*

*Ego Laurentius tit. S. Chrysogoni Card. Imperialis
promitto, voveo, & juro.*

*Ego Gibertus tit. SS. Joannis, & Pauli Card. Borro-
mæus promitto, voveo, & juro.*

Ego

- Ego Marcellus tit. S. Stephani in Monte Caelio Card. Sanctacrucius promitto, voveo, & juro.*
Ego Baccius tit. SS. Nerei, & Achillei Card. Aldobrandinus promitto, voveo, & juro.
Ego Jo. Baptista Spada tit. S. Marcelli Card. S. Suzzannæ promitto, voveo, & juro.
Ego Franciscus tit. S. Mariæ in Via Card. Albicius promitto, voveo, & juro.
Ego Octavius tit. S. Cæcilie Card. de Aquaviva promitto, voveo, & juro.
Ego Flavius tit. S. Mariæ de Populo Card. Cbifus promitto, voveo, & juro.
Ego Julius tit. Sancti Xisti Presb. Card. Rospigliosus promitto, voveo, & juro.
Ego Nicolaus tit. S. Eusebii Presb. Card. à Balneo promitto, voveo, & juro.
Ego F. tit. S. Joannis ante Portam Latinam Presb. Card. Paulutius promitto, voveo, & juro.
Ego Sfortia Presb. Card. Pallavicinus tit. S. Salvatoris de Lauro promitto, voveo, & juro.
Ego Virginus S. Mariæ in Via Lata Diaconus Card. Ursinus promitto, voveo, & juro.
Ego R. Card. Diaconus S. Nicolai in Carcere Tulliano promitto, voveo, & juro.
Ego Paulus Anilius S. Mariæ in Cosmedin Diaconus Card. Rondininus promitto, voveo, & juro.
Ego Laurentius S. Eustachii Diaconus Card. Raggius promitto, voveo, & juro.

Ego

*Ego Carolus S. Angeli in Foro Piscium Diac. Card.
Barberinus promitto, voveo, & juro.*

*Ego Carolus S. Mariæ in Domnica Diac. Card. Pius
promitto, voveo, & juro.*

*Ego Decius S. Adriani Diaconus Card. Azzolinus
promitto, voveo, & juro.*

*Ego Franciscus Maria SS. Viti, & Modesti Diaconus
Card. Mancinus promitto, voveo, & juro.*

INNOCENTII XII. CONSTITUTIO MODERATORIA

*Donationum, & Distributionis reddituum Ecclesiasticorum
in Consanguineos, vel Affines Romani Pontificis,
seu eorum loco adlectos, ac præscribens cautelas
servandas circa signaturas earum gratiarum,
quæ aliquando ægotante Romano Ponti-
fice per Concessum fieri dicuntur.*

INNOCENTIUS EPISCOPUS
SERVUS SERVORUM DEI
Ad perpetuam rei memoriam.

Romanum decet Pontificem, tanquam fide-
lem Servum, & prudentem, quem consti-
tuit Dominus super Familiam Suam, in
Ecclesiæ Catholicæ conspectu actum suum
ita ordinare, ut ipse quidem in diebus suis placeat
Deo, & inveniatur justus, fiatque forma gregis ex
Y ani.

animo , & bonus sit Christi odor in omni loco ; Cæteri verò Antistites , & Ecclesiarum Prælati in partem sollicitudinis , cujus ei commissa est plenitudo , vocati , aliique Christifideles , quos curæ suæ divinitus creditos in visceribus Paternæ gerit charitatis ejus exemplo , atque præceptis caduca Mundi hujus despiciere , carnisque , & sanguinis laqueos efugere , ac de bonis , & rebus Ecclesiasticis juxta æquitatis , & justitiæ leges disponere , & Spiritualium remigio alarum ad cœlestia contendere , atque evolare auxiliante Domino condiscant . Hinc ad ea Sacrorum Canonum instituta , quæ Episcopis , ne bonis , & redditibus Ecclesiæ Consanguineos suos augere studeant , interdicut , considerationis nostræ aciem convertentes , eam nobis in suprema B. Petri Apostolorum Principis , cui caro , & sanguis non revelavit , Sede constitutis ab ipso Pontificatus nostri primordio servandam proposuimus , & hætenus Deo adjuvante servare studuimus disciplinam , ut in bonorum , & reddituum ad hanc Sanctam Sedem , & Cameram nostram Apostolicam spectantium distributione Justitiæ , atque prudentiæ leges , & regulas accuratè custodientes , summam meritorum , nullam autem carnis , & sanguinis , aut cujuscunque humani affectus rationem haberemus . Et licet in Dei misericordia speremus , tales nobis successuros Romanos Pontifices , qui non minùs hac in parte , quàm in reliquis munus suum impleant , & Ecclesiam uni-

versam

versam spiritualium aromatum odore perfundant : Nihilominus ea , quæ nobis licere non patimur , aliis indicare , salubremque in Sancta Romana Ecclesia omnium Ecclesiarum Matre , & Magistra circa præmissa normam , & legem constituere , atque stabilire decrevimus .

Habita igitur super his cum Venerabilibus Fratribus nostris Sanctæ Romanæ Ecclesiæ Cardinalibus deliberatione matura , ac de illorum consilio pariter , & assensu ad Omnipotentis Dei gloriam , Apostolicæ Sedis honorem , ac Antistitum , Prælatorum , aliorumque Ecclesiasticorum ædificationem , & bonum exemplum , hac nostra perpetuò valitura Constitutione statuimus , atque decernimus , salutarem hanc de cætero in dicta Sanctæ Romanæ Ecclesiæ servari rationem , atque disciplinam , ut nec à nobis , nec ab ullo Romanorum Pontificum Successorum nostrorum ad favorem nostrorum , sive suorum respectivè Fratrum , Nepotum , aliorumque quorumcunque Consanguineorum , seu Affinium , sive illorum , quos in locum Nepotum , aliorumque Consanguineorum per cooptationem in familiam , aut aliter adlegi , seu adscisci contigerit , de bonis , pecuniis , locis Montium vacabilium , & non vacabilium , officii venalibus , illorumque pretio , creditis , redditibus , rebus , & juribus quibuscunque ad Sedem , & Cameram præfatas quovis modo spectantibus , vel quandocunque spectaturis , etiam ex emolumentis

Dataria, Cancellaria Apostolica, Secretaria Brevium, Spoliorum Ecclesiasticorum, & quarumcunque Palatii Apostolici portionum, seu distributionum provenientibus, liberalitatis, & donationis, aliove quovis gratuito, seu lucrativo titulo directe, vel indirecte etiam servitiorum, & meritorum, quæ tamen talia non sint; ut ex lege justitiæ eam exigant remunerationem, aliove quolibet colore, seu prætextu, sive etiam supra veram ipsorum servitiorum, & meritorum rationem ullo modo in posterum disponatur.

Quod si Fratres, Nepotes, Consanguinei, vel Affines, seu illorum loco adlecti, sive adsciti præfati inopia laboraverint, poterit Romanus Pontifex pro tempore existens pro timorata sua conscientia illorum paupertatem eodem omnino modo sublevare, quo Pauperum extraneorum inopiæ subvenire fas est.

Ne autem, quod directe prohibetur, indirecte permittatur magnorum stipendiorum, seu honorariorum nonnullis Sedis prædictæ officiis, seu muneribus, quæ Consanguineis, vel Affinibus, seu adlectis, vel adscitis præfatis concedi, ut plurimum consueverunt, assignatorum ratione, stipendia, provisiones, sive salaria, & honoraria, & alias quomodolibet nuncupari solita emolumenta quæcunque, quæ antehac per Cameram prædictam in Civitate Avenionensi, & Comitatu Venayssino nostris

in spiritualibus , & temporalibus Vicario Generali, ac in illis , & vicinis quinque Provinciis ejusdem Sedis de Latere Legato præstari , & solvi plerunque solita, & consueta fuerunt : Superintendentis verò Generalis negotiorum Sedis Apostolicæ , nec non totius Militiæ tam Equestris , quàm Pedestris Status nostri Ecclesiastici Gubernatoris , & Capitanei Generalis , itemque Classis , & Triremium Pontificiarum Præfecti , illiusque , & illarum Commissarii , & Locumtenentis Generalis , Arciumque , & Turrium ad littora Maris Adriatici , & Tyrrheni existentium Superintendentis Generalis utriusque Custodiæ Corporis Romani Pontificis , ejusque Locumtenentis Generalis , item Castellani Arcis Sancti Angeli de Urbe Gubernatoris , ut aliàs deputabatur , Civitatis Beneventanæ , cujus tamen Gubernium ad instar aliorum prædicti nostri Status , prout in præsentiarum servatur , remaneat , & Arcis Beneventanæ Præfecti ; item Gubernatoris Oppidi nostri Civitatis Vetulæ , ac demum Perusinæ , Anconitanæ , & novæ Asculanæ respectivè Arcium Præfecti , seu Castellani officia , & munera ipsa cum omnibus , & singulis illorum , & cujuslibet eorum juribus , prærogativis ; stipendiis , salariis , & emolumentis quibuscunque perpetuò supprimimus , & abolemus , illaque deinceps , quomodocunque , & quandocunque renovari prohibemus , nec cuiquam de cætero assignari , & præstari , seu concedi , & conferri respectivè volumus ,

arque

atque decernimus . Quòd si pro rerum qualitate , temporumque contingentia , manifesta , urgensque necessitas munera , seu officia militaria hujusmodi , vel aliqua ex eis de novo institui exegerit , Viros ad illa assumi volumus , & mandamus strenuos , & fideles , eximia virtute præstantes , reique militaris apprime peritos , & in illa diuturno , ac probato usu exercitatos , quibus Romanus Pontifex pro tempore existens secundum datam sibi à Domino sapientiam pro ratione laboris , industriæ , atque periculi competentia , & congruentia stipendia assignabit .

Porro si nostri , Successorumque nostrorum Romanorum Pontificum pro tempore existentium Fratres , Nepotes , & alii quicunque Consanguinei , seu Affines , sive veri , sive , ut præfertur , adlecti , & adsciti , vitam Ecclesiasticam adlegerint , ac Ecclesiarum , & Monasteriorum , aliorumque Beneficiorum , & Officiorum Ecclesiasticorum , ac annuarum pensionum super eorum fructibus consecutionis capaces fuerint , eam in reddituum , & proventuum Ecclesiasticorum distributione eis faciendam servari volumus moderationem , & nonnisi juxta eorum merita , & non ultra , congruam pro gradus , vel dignitatis , quem , vel quam in Ecclesia obtinuerit , nullo ad consanguineitatem , affinitatem , seu adlectionem erga Romanum Pontificem habito respectu , sustentationem , ejusmodi redditus , & proventus

Eccle-

Ecclesiastici eis distribuuntur, quo custodita in omnibus Ecclesiasticæ Disciplinæ, atque Justitiæ distributiivæ regula, nemini relinquatur conquerendi, vel obloquendi occasio, sed Ecclesiastica stipendia ministrantibus in Ecclesia Dei æqua lance pro uniuscujusque merito assignentur.

Quoad illos autem ex Fratribus, Nepotibus, aliisque Consanguineis, seu Affinibus Romanorum Pontificum pro tempore existentium præfatorum, sive veris, sive, ut præfertur, adlectis, & adscitis, quos eximiis eorum ita exigentibus meritis ad sublimem Cardinalatus dignitatem assumi contigerit, eam quoque de cætero servari volumus moderationem, ut Ecclesiæ, Monasteria, Commendæ, aliave cujusvis generis Beneficia, & Officia Ecclesiastica, ac pensiones annuæ super illorum fructibus unicuique eorundem respectivè conferenda, commendanda, & concedenda, ac reservandæ, & assignandæ, verum valorem annuum duodecim millium scutorum monetæ Romanæ, computatis insimul Beneficiorum, & Officiorum quibuscunque fructibus, & pensionum quantitibus, in totum non excedant: In ea tamen taxatione non comprehendantur emolumenta Officiorum ejusdem Apostolicæ Sedis, & Romanæ Curiae Sanctæ Romanæ Ecclesiæ Cardinalibus demandari, seu concedi solitorum, aliorumque munerum, quæ ipsis non ad vitam, vel in perpetuum, sed ad tempus, seu beneplacitum Romani

Pontificis pro tempore existentis demandata, seu concessa fuerint. Declarantes, quod deinceps præfati, qui vitam Ecclesiasticam elegerint, seu ad sublimem Cardinalatus dignitatem fuerint assumpti, quoscunque Titulos fructuum reservationibus gravatos, sive præventivas, vel eventitias pensiones ultra moderationem, ut supra, respectivè præscriptam nullatenus assequi valeant.

Quòd, si forsan (quod absit) modus circa præmissa sic congruenter, salubriterque præscriptus in posterum excedatur, curæ erit Romanis Pontificibus Successoribus, donationes gratuitas, seu lucrativas dispositiones, excessivas subventiones, munerum, & officiorum, seu illorum stipendiorum, & emolumentorum concessiones, ac reddituum, & proventuum ecclesiasticorum distributiones, nec non collationes, commendas, concessiones, reservationes, & assignationes, aliaque præmissa contra, vel ultra modum, ut præfertur, præscriptum factas, seu facta rescindere, & revocare, & in nihilum redigere, ac, ut præfertur, donata, elargita, concessa, collata, commendata, reservata, & assignata à Consanguineis, & Affinibus, sive veris, sive adlectis, & adscitis præfatis, eorumque hæredibus, & successoribus, respectivè etiam manu Regia, & de Apostolicæ potestatis plenitudine vindicare, & auferre, ac Cameræ Apostolicæ applicare, & incorporare, aliisque respectivè conferre, commendare, concedere,

dere, & assignare, ac aliàs desuper opportunè providere, seu disponere.

Quia verò ægrotante Romano Pontifice nunquam contigit, ut Signaturæ gratiarum, quæ per Concessum fieri dicuntur, modum illum excederent, quem ipse Romanus Pontifex, dum bene valebat, servare consueverat; statuimus, atque decernimus, ut ii, quibus ejusmodi Signaturas per Concessum à Romano Pontifice ægrotante, etiam per Chirographum speciale manu ipsius Romani Pontificis subscriptum, vel aliàs quomodocunque committi contigerit, cujuscunque status, gradus, ordinis, & dignitatis fuerint, etiamsi Cardinalatus honore præfulgeant, nullas hujusmodi gratias signare, vel expedire valeant, nisi fuerint ad illas adhibiti duo ejusdem Sanctæ Romanæ Ecclesiæ Cardinales, qui unà cum Signatore præfato coram ipsomet Romano Pontifice eas concedente, ac expediri mandante, earundem gratiarum supplicationibus, sive minutis, aut Chirographis, aliisque concessionum scripturis subscribant, alioquin quidquid secus actum, signatum, gestumve fuerit, nullum, irritum, & invalidum, nulliusque sit roboris, vel momenti, & qui huic saluberrimæ Sanctioni contravenerint, ab ipso Romano Pontifice sanitati restituto, vel ab ejus Successoribus condignis pœnis puniantur.

Ut autem præmissa omnia, & singula perpetuò, & inviolabiliter observentur, volumus, & Apo-

stolica auctoritate decernimus, ut, sicut ejusdem Sanctæ Romanæ Ecclesiæ Cardinales in Romana Curia præsentibus, hanc Constitutionem, quantum in eis erit, observare, illique non contravenire, nec ullis contrafacientibus etiam Romanis Pontificibus consentire, nec absolutionem à juramento præstito petere, nec oblatam, aut concessam acceptare promiserunt, & jurarunt; idem quoque per absentes ab eadem Curia dictæ Sanctæ Romanæ Ecclesiæ Cardinales quodocunque ad eam advenerint, ac per futuros Cardinales in assumptione Pilei promitti, & jurari debeant, promissioque, & juramentum hujusmodi in formula juramenti per eosdem Cardinales præstari soliti, adjungatur, & adscribatur. Occurrente autem quodocunque ejusdem Apostolicæ Sedis vacatione, iidem Cardinales in Conclavi, quando de observandis felicis recordationis Prædecessorum Nostrorum Julii Papæ II. super electione Romani Pontificis, Pii Papæ V. ne Civitates, & Loca Sanctæ Romanæ Ecclesiæ infeudentur, & Sixti Papæ V. de pecuniis in Arce Sancti Angeli positis, inde non amovendis, aliisque nonnullis Constitutionibus Apostolicis juramentum præstare solent, etiam de præsentis Constitutione per quemlibet eorum, qui in Romanum Pontificem electus fuerit, inviolabiliter observanda; & postmodum ipse ad supremi Apostolatus Officium assumptus post assumptionem hujusmodi hoc ipsum promittere, & jurare

debeat, servatis etiam omnibus, & singulis illis, quæ circa juramentum hujusmodi in præfata Sixti Prædecessoris Constitutione anno Incarnationis Dominicæ millesimo quingentesimo octuagesimo sexto, undecimo Kalendas Maji, Pontificatus sui anno primo edita, præscribuntur.

Has quoque nostras literas in libellum redigi, & post prædictas Julii, Pii, & Sixti, quæ in Conclavi legi solent, aliorumque Prædecessorum nostrorum Constitutiones adjungi, & in Quinterno Cancellariæ Apostolicæ unâ cum aliis Constitutionibus Apostolicis adscribi, & ad valvas Ecclesiæ Lateranensis, Basilicæ Principis Apostolorum, dictæque Cancellariæ, & in Acie Campi Floræ de Urbe publicari, ipsarumque præsentium literarum transumptis, seu exemplis etiam impressis, manu alicujus Notarii publici subscriptis, & sigillo personæ in Ecclesiastica Dignitate constitutæ munitis, eandem prorsus fidem, tam in judicio, quàm extra illud, ubique haberi volumus, quæ iisdem præsentibus haberetur, si forent exhibitæ, vel ostensæ.

Nulli ergo omnino hominum liceat hanc paginam nostrarum Constitutionis, suppressionis, abolitionis, taxationis, Statutorum, Decretorum, voluntatum, & mandati infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Bea-

torum Petri, & Pauli Apostolorum ejus, se noverit incurfurum.

Datum Romæ apud Sanctam Mariam Majorem anno Incarnationis Dominicæ millesimo sexcentesimo nonagesimo secundo, decimo Kalendas Julii, Pontificatus nostri anno primo.

*Ego INNOCENTIUS Catholicæ Ecclesiæ
Episcopus promitto, voveo, & juro:*

*Ego Alderanus Episcopus Ostiensis Cardinalis Cybo
promitto, voveo, & juro.*

*Ego Jacobus Episcopus Tusculanus Card. Fransonus
promitto, voveo, & juro.*

*Ego P. Episcopus Prænestinus Card. de Alteriis S. R. E.
Camerarius promitto, voveo, & juro.*

*Ego F. tit. S. Praxedis Presb. Card. Maidalchini
promitto, voveo, & juro.*

*Ego Carolus tit. S. Laurentii in Lucina Presb. Card.
Barberinus promitto, voveo, & juro.*

*Ego Nicolaus tit. S. Calixti Presb. Card. Acciajoli
promitto, voveo, & juro.*

*Ego Gaspar tit. S. Mariæ Trans-Tyberim Presb. Card.
Carpineus promitto, voveo, & juro.*

*Ego Cæsar tit. SS. Trinitatis in Monte Pincio Presb.
Card. d'Estrès promitto, voveo, & juro.*

*Ego Hieronymus tit. S. Silvestri in Capite Card. Ca-
sanate promitto, voveo, & juro.*

Ego

- Ego Franciscus tit. S. Matthæi in Merulana Card.
Nerlius promitto, voveo, & juro.
- Ego Galeatius tit. SS. Quirici, & Julitæ Presb.
Card. Marefcottus promitto, voveo, & juro.
- Ego Fabritius tit. S. Chrysogoni Presb. Card. Spada
promitto, voveo, & juro.
- Ego P. Thomas Howardus tit. S. Mariæ super Mineruam
Presb. Card. de Norfolcia promitto, voveo, & juro.
- Ego Jo. Bapt. tit. S. Cæcilie Presb. Card. Spinula pro-
mitto, voveo, & juro.
- Ego Fr. Laurentius tit. SS. XII. Apostolorum Presb.
Card. de Lauræa promitto, voveo, & juro.
- Ego Jacobus tit. S. Mariæ de Aracali Presb. Card.
de Angelis promitto, voveo, & juro.
- Ego M. Antonius Barbadicus tit. S. Susannæ Presb.
Card. S. Susannæ promitto, voveo, & juro.
- Ego Joannes tit. S. Petri in Monte Auro Presb. Card.
de Goessen promitto, voveo, & juro.
- Ego P. M. tit. S. Marcelli Presb. Card. Petrucius
promitto, voveo, & juro.
- Ego Joseph Saenz tit. S. Balbinæ Presb. Card. de Aguirre
promitto, voveo, & juro.
- Ego Leander tit. SS. Nerei, & Achillei Presb. Card.
Colloredus Major Pœnitentiarius prom. vov. & juro.
- Ego Fortunatus tit. SS. Joannis, & Pauli Presb. Card.
Carafa promitto, voveo, & juro.
- Ego Bandinus tit. S. Pancratii Presb. Card. Pancia-
ticus promitto, voveo, & juro.

Ego

182 CONSTITUTIONES APOSTOLICÆ,

- Ego Ferdinandus tit. S. Clementis Presb. Card. de Abdua*
promitto, voveo, & juro.
Ego Tuffanus tit. S. Agnetis. extra Mœnia Presb. Card.
de Janson Fourbin promitto, voveo, & juro.
Ego Jo. Bapt. tit. S. Laurentii in Pane, & Perna Presb.
Card. Rubinus promitto, voveo, & juro.
Ego J. B. tit. S. Anastasie Presb. Card. Costagutus
promitto, voveo, & juro.
Ego Urbanus S. Mariæ in Vía Lata Diaconus Card.
Sacchetti promitto, voveo, & juro.
Ego Fulvius SS. Cosmæ, & Damiani Diaconus Card.
Astallius promitto, voveo, & juro.
Ego Petrus S. Laurentii in Damaso Diaconus Card.
Ottobonus S. R. E. Vice-Cancellarius prom. vov. & juro.
Ego C. S. Mariæ in Cosmedin. Diaconus Card. Bichius
promitto, voveo, & juro.
Ego Aloysius S. Mariæ in Porticu Diac. Card. Homodeus
promitto, voveo, & juro.
Ego Joannes Franciscus S. Adriani Diac. Card. Albanus
promitto, voveo, & juro.
Ego Franciscus S. Angeli in Foro Piscium Diac. Card.
Barberinus promitto, voveo, & juro.
Ego Laurentius S. Mariæ in Aquiro. Diac. Card. de Al-
terii promitto, voveo, & juro.

Loco ✝ Plumbi.

B. Card. Pro-Datarius J. F. Card. Albanus.

CLE.

C L E M E N S VIII.

*Romæ in Monte Quirinali die Veneris
26. Junii 1592. fuit Consistorium
secretum, in quo*

Sanctissimus Dominus Noster dixit, post editam sanctæ recordationis Pium Papam V. Sanctitatis Suæ Prædecessorem de Fratrum consilio Constitutionem de non alienandis Civitatibus, Terris, Oppidis, & Locis sibi, & Apostolicæ Sedi in temporalibus mediâtè, & immediâtè subjectis, etiam ad illud usque tempus in Feudum, aut quemvis alienationis titulum dari solitis ad Sedem prædictam quomodolibet devolutis, & pro tempore devolvendis, gravissimis impositis pœnis contra personas tractantes, consulentes, aut aliàs verba facientes de hujusmodi Civitatum, Terrarum, Oppidorum, & Locorum infeudationibus, etiam sub prætextu necessitatis, & evidentis utilitatis, sive illas insinuant, & suadentes, prout in ipsa Constitutione sub datum quarto Kalendas Aprilis Pontificatus sui anno secundo, edita sæpius postmodum per Prædecessores suos, ac novissimè per Sanctita-
tem

tem Suam comprobata latiùs continetur , piæ memoriæ Gregorium XIV. itidem Prædecefforem fuum in Confiftorio fecreto Romæ apud Sanctum Marcum die Veneris decimatertia Septembris 1591. habito , Sententiis tamen Sanctæ Romanæ Ecclefie Cardinalium , qui tunc aderant , ac de quorum numero etiam Sanctitas Sua erat , minimè requifitis , quinimo multis eorum exprefse contradicentibus declaraffe , & decreviffe , Pii Prædecefforis Constitutione prædicta non prohiberi Feudum nondum devolutum , quando neceffitas , aut evidens , & vera Ecclefie utilitas poftulaverit iterum infeudari , nec juramentum in ea præftitum fimilem cafum comprehendere , ac neminem licite jurare poffe , quod contra neceffitatem , aut evidentem utilitatem Ecclefie fit ; ficque prædictam Constitutionem intelligendam judicaffe , ac diffiniviffe , itaut nemini poftea de ea aliter , quàm tunc ab ipfo declaratum fuit , loqui , & fcribere liceret , prout in eodem Decreto , & declaratione plenius continetur . Verùm quia re ipfa compertum eft , quod ferè omnes alienationes Terrarum , Civitatum , Oppidorum , & Locorum hujusmodi hætenus factæ , ex quibus magna læfio , & imminutio Patrimonii , & exiftimationis Sanctæ Romanæ Ecclefie fequuta eft , etiam fub prætextu , & colore veræ , & evidenter , vel neceffitatis , vel utilitatis Prædecefforibus Sanctitatis Sux infinuatæ fuerunt , cùm tamen vix ulla neceffitas

excogitari possit , cui ex aliis bonis , aut redditibus , & proventibus , quàm Constitutione prædicta alienari prohibitis subveniri nequeat , vix etiam ulla dari possit utilitas , cui non præponderet recuperatio , & realis reintegratio in Patrimonium Sanctæ Romanæ Ecclesiæ earundem Civitatum , & Locorum hucusque alienatorum . Cùmque huiusmodi casus absolutæ necessitatis , aut veræ , & evidentis utilitatis facilius mente , atque animo concipi , & effingi , quàm usu venire possint , multò magis expedire omnem prorsus alienationem , & Investiturarum prorogationem , & aliarum concessionum quomodocunq̃ , & sub quibuscunq̃ causis , & prætextibus attentandi , viam omnino præcludere , quàm ob rarissimos casus , qui vix unquam contingere possunt , apertam relinquere ; cùmque lucrum in tempore negligere , maximum quandoque sit Ecclesiæ lucrum , utilius esse radices omnes , ex quibus huiusmodi alienationes provenire valeant , penitus evellere , quàm ex eo , quod aliquando possit earum aliqua utilitas esse , occasionem præbere , ut multæ utilitates præjudiciales , & damnosæ fiant , cui absurdum , atque incommodo ipsū Pium Prædecessorem præfatum dicta Constitutione non immerito occurrere voluisse , qui longè plures , & graviores jacturas ex multis perniciosis distractionibus sequi posse censuit , quàm utilitates ex paucissimis , si quæ unquam contingerent , fructuosæ . Proinde San-

ctitas Sua habita super hoc cum Venerabilibus Fratribus Sanctæ Romanæ Ecclesiæ Cardinalibus deliberatione matura, & singulorum auditis sententiis, de eorum consilio, & unanimi assensu Decretum, & declarationem superius memoratam felicitis recordationis Gregorii XIV. tanquam destruens prædictam Pii Constitutionem, alienandique occasionem præbens, ac minimè necessarium, & desuper forsitan confectas literas, quorum omnium tenores haberi voluit pro expressis, ac de verbo ad verbum insertis Auctoritate Apostolica revocavit, abrogavit, cassavit, & annullavit, perinde ac si nunquam emanassent: Declarans dicta Constitutione prohiberi Civitatum, Terrarum, Oppidorum, Feudorum, & Locorum in ea contentorum, tam quæ nunquam antea in Feudum concessa, quàm quæ aliàs etiam sæpius alienata, vel infeudata, ac postmodum devoluta, aut etiam nondum devoluta fuerunt, alienationes, infeudationes, ac prorogationes, & extensiones Investiturarum Feudorum, & concessionum, etiam ex causa necessitatis, aut evidentis, & veræ utilitatis factas, & faciendas juramentum quoque super ejusdem Constitutionis observatione per Sanctitatem Suam, & Successores suos, ac Sanctæ Romanæ Ecclesiæ Cardinales præstitum, & præstandum casum hunc necessitatis etiam absolutæ, & evidentis, & veræ utilitatis omnino comprehendere, nec propterea aliquid illicitum jurari, aut

quid

quid contra necessitatem, vel utilitatem Ecclesiae sit, sed quod rationi consonum, atque e re illius est, ac summo opere conducit, prout eadem auctoritate declaravit, statuit, & decrevit, cum clausulis, & derogationibus opportunis.

URBANI VIII.

*Feria secunda die 12. Maji 1631. in
Palatio Quirinali fuit Consistorium
secretum, in quo*

Sanctissimus Dominus Noster hujusmo-
di sermone Reverendissimos Domi-
nos Cardinales allocutus est:

VENERABILES FRATRES.

COGNITUS est Vobis obitus Francisci Mariæ Fel-
trii de Ruvere Urbini Ducis, & accessus ad
illum statum Thadæi Barberini Principis Præ-
nestinorum, & Ereti Ducis Nostri ex Fratre
germano nepotis, qui Cameræ Apostolicæ nomine, &
nostro acceptavit aperitionem Feudi cum omnibus Urbi-
bus, & Oppidis, de quibus erat dictus quondam Fran-
ciscus Maria à Sede Apostolica investitus, & accepit
summa cum quiete, & plausibus exceptus possessionem.
Instrumenta Possessionis captæ transmissa, & alia
transmittenda cum aliis Scripturis occasione præmisso-

rum confectis, volumus considerari, & recognosci, & propterea ad hunc effectum deputamus, DD. Cardinales Sancti Sixti, Gypsum, Verospium, Virilem, Barberinum, & Ginettum; quibus cum conveniet Thesaurarius, & Commissarius Cameræ Apostolicæ, & nonnulli alii quorum interventus nobis opportunus videbitur.

Igitur cum per obitum dicti Ducis Francisci Mariæ Feltrii de Ruvere omnes; & singulæ Civitates Urbinatensis, Eugubina, Calliensis, Forosempronienfis, necnon aliæ sub nomine Ducatus Urbini, ejusque membrorum, & pertinentiarum comprehensæ, & Pifaurensis, & Senogalliensis, & Civitas Sancti Leonis cum Statu Montis Feltrii, seu Feretrii, & Vicariatus Montis davii cum Castris, & Terris, Fortalitiis, Portibus, Locis, Jurisdictionibus, atque aliis annexis, & connexis, & omnibus etiam aliis Jurisdictionibus quocunque alio vocabulo comprehensis, de quibus à Sede Apostolica, & Prædecessoribus nostris Romanis Pontificibus idem Franciscus Maria, seu veriùs Antecessores investiti fuerunt, seu aliàs quomodolibet illos, & illa à Sede præfata tenuerunt, & habuerunt, ad eandem Sedem, & Cameram ipsius Apostolicam, & Nos tam ex forma Investiturarum, seu aliarum cessionum de eis factarum, tum vigre Constitutionis felicis recordationis Pii V. Prædecessoris Nostri editæ sub datum quarto Kalendas Aprilis anno Incarnationis Dominicæ millesimo quingentesimo sexagesimo sexto anno

Ponti-

Pontificatus ejusdem secundo, & à pluribus Nostriſ Prædeceſſoribus, & à Nobis per literas Apoſtolicas confirmatæ, & præſertim Decretorum Innocentii IX. & Clementis VIII. ſimiliter Prædeceſſorum Noſtrorum reverſi, & reverſa, devoluti, & devoluta exiſtant (de quo gratias agimus Omnipotenti Deo) & utile eorum Dominium cum directo conſolidatum ſit, & abſque alia ulteriori acceptatione, declaratione, & poſſeſſionis apprehenſione, & alia juxta prædictam Conſtitutionem Pii Quinti, & decretorum Innocentii Noni, & Clementis Octavi, ad quam, & ad quæ in omnibus, & per omnia, & in omnibus ejus, & eorum partibus relatio habeatur, atque etiam in executionem tranſactionis, ſeu concordiæ inter Nos, & Cameram Apoſtolicam ex una, & dictum quondam Franciſcum Mariam, & Victoriæ ejus Neptem ex filio, & Ferdinandum Medicem Magnum Ducem nominibus, de quibus in dicta Tranſactione ex altera partibus initæ ſub die 30. Aprilis milleſimo ſexcenteſimo vigefimo quarto, & in Conſiſtorio ſecreto lectæ, & à Sacro Collegio approbatæ; nihilominus Nos pro potiori cautela, & jura juribus addendo, & dictæ Conſtitutioni, & Decretis inbærendo, ſalva dicta Tranſactione, & excepto Caſtro Podii Hibernii, juxta tenorem dictæ Tranſactionis, & in ejusdem executionem denuo dictam devolutionem, & reverſionem præſati Status acceptando, poſſeſſiones per Thadæum Noſtrum ex Fratre Germano Nepotem, & per alios Noſtra auctoritate, & Noſtro,
&c.

Et Cameræ Apostolicæ nomine captas approbamus, reci-
 pimus, Et gratas, Et ratas habemus, necnon jura-
 mentum à subditis, receptiones, Et alios quosunque
 actus, qui sequuti sunt, Nobis, Et Cameræ Apostolicæ
 favorabiles, Et omnes solemnitates, si quæ forsitan de-
 fuerint, omnesque defectus, qui similiter forsitan inter-
 fuerint, supplerentes, atque de vestro consilio pariter,
 Et assensu Ducatum, Statumque prædictum cum omni-
 bus supradictis Civitatibus, Terris, Castris, Fortali-
 tiis, Locis, Membris, Jurisdictionibus, Et aliis an-
 nexis, Et connexis dicti Ducatus, Et omnibus etiam
 aliis Locis, Membris, Et Jurisdictionibus, Et eorum
 annexis quocunque alio modo, seu vocabulo sub Inve-
 stitura, seu Investituris, vel aliis concessionibus quibus-
 cunque prædicta, Et prædictis comprehensis, aut ali-
 ter quomodocunque à dicto Francisco Maria tensis, Et
 possessis, sive aliàs quomodolibet ad Sedem Apostoli-
 cam pertinentibus per obitum prædicti Ducis Franci-
 sci Mariæ, seu aliàs ad hanc Sedem devolutum, Et
 devoluta, Et utile illorum Dominium cum directo con-
 solidatum esse declaramus, Et ejusmodi reversionem,
 devolutionem, Et utilis cum directo Dominio consoli-
 dationem acceptamus, ipsumque Ducatum, Et Statum
 cum omnibus supradictis Sedi, Et Cameræ Apostolicæ
 reversum, unitum, Et incorporatum esse, Et censeri
 decernimus, Et declaramus non solum præmissis, sed
 omni etiam meliori modo, Et quatenus opus sit, eun-
 dem Ducatum, Et Statum cum aliis Civitatibus, Ca-
 stris,

stris, & omnibus Jurisdictionibus supradictis de novo eidem Sedi Apostolicæ unimus, & incorporamus, ac dispositioni Constitutionis prædictæ felicitis recordationis Pii V. & Decretorum Innocentii, & Clementis subjacuisse, & subjacere decernimus, & declaramus, Deoque Omnipotenti, Beatæque Mariæ semper Virgini, ac Sanctis Apostolis Petro, & Paulo perpetuò tribuimus, & dicamus. In nomine Patris, &c.

ALEXANDER VII.

*Feria secunda die 20. Decembris 1660.
Romæ in Palatio Montis Quirinalis
fuit Consistorium secretum, in quo*

Sanctissimus Dominus Noster Venerabiles Fratres Suos S. R. E. Cardinales amantissimis nominibus de more appellatos, primò hortatus est ad opera pietatis, eo maximè tempore exhibenda, quo copiosa facta est apud Deum Redemptio, & mox in hanc Sententiam est allocutus:

P Robè eos nosse Odoardum Farnesium Parmæ Ducem gravi ære alieno Creditoribus Montis Farnesii obstrictum, sæpius à felicis recordationis Urbano Octavo paternè monitum, cùmque monita nihil proficerent; opportunis Juris remediis conventum fuisse, ut eisdem Creditoribus, qui Sedis Apostolicæ fidem secuti fuerant satisfaceret; verùm pro eo, ut tam justæ petitioni obtemperaret, cum armato repente Milite

in Ditionem Ecclesiasticam impetum fecisse ; unde maximæ rerum perturbationes , gravissima scandala , & innumera , tum Sedis Apostolicæ Subditorum , tum publici ærarii incommoda sunt consecuta .

Odoardo verò , ut Deo placuit , è vivis sublato , recolendæ memoriæ Innocentium Decimum Pupillorum , Viduarum , piorumque Locorum , quorum sustentatio ex pecunia Monti Farnesio credita pendebat , frequentibus lacrymis , & querelis permotum , mandasse Congregationi Baronum , ut iis , cæterisque Creditoribus justitiâ pro suo munere administraret .

Quamobrem prædictam Congregationem servatis servandis processisse ad venditionem aliquot Castrorum , & Locorum ejusdem Ducis , Roncilionis scilicet , Valerani , Canepenæ , ac Vici cum Lacu , & Casamala , cum connexis , annexis , & pertinentiis , aliisque bonis , eaque nemine licitante , ipsimet recolendæ memoriæ Innocentio , & Camera Apostolicæ , juxta formam in erectione dictæ Congregationis Baronum à recolendæ memoriæ Clemente Octavo præscriptam , deliberasse , reservata facultate , ea infra triennium redimendi , & prout latius habetur in Actis Bartholomæi Brunori Notarii A.C. die septimæ Octobris 1649 .

Cùm verò contra alia Loca , Terras , & Ducatum Castri cum ei annexis , & aliis bonis , tam Jurisdictionalibus , quàm non Jurisdictionalibus ejusdem

dem

dem Ducis in erectione Montis Farnesii adscriptis; affectis, & hypothecatis iudicium, & executionem prosequi vellet eundem Innocentium Decimum precibus Raynutii tunc, & in præsens Parmæ Ducis, dicti Odoardi Filii, & Successoris nomine porrectis, annuere, & dictorum Creditorum commodis, ac securitati magis, quàm Cameræ Apostolicæ (cui grave, damnosumque futurum id erat) utilitati consulere volentem, Ducatum, & cætera Bona prædicta (illis quoque comprehensis, quæ deliberata jam fuerant) emisse sibi, & Cameræ Apostolicæ, tam ab ipso Duce, quàm à Reverendissimo Thesaurario ejusdem Cameræ, cum facultatibus Congregationis Baronum, & aliis ipsi concessis (cujus Congregationis Constitutionibus, Bullis, & Privilegiis dictum Contractum subjectum, & comprehensum esse voluit, licet earum forma servata non fuisset) pretio, & pactis conventis in instrumento celebrato die decimanona Decembris anno millesimo sexcentesimo quadragésimo nono per Acta Francisci Lucarelli Cameræ Apostolicæ, & Caroli Viperae Capitoli Notariorum, in quo instrumento specialiter reservatum fuit dicto Duci Raynutio, ejusque Successoribus in Ducatu, & non aliis, nec alio modo, jus redimendi dictum Ducatum Castri, & Statum Roncilionis, & cætera Bona, ac Loca vendita infra terminum octo annorum, persolutis tamen actu, & unica solutione Cameræ Apostolicæ

in Depositaria generali decies , & sexies centenis , & viginti novem millibus septingentis quinquaginta Scutis monetæ Romanæ , ita ut , eo termino elapso , & solutione , & redemptione non factis , incontinenti , & in eodem instanti , ipso Jure , atque ipso facto , absque alia declaratione , idem jus , & facultas redimendi censeretur expirasse , illisque dictus Dux ulterius uti non valeret ex ullo capite , etiam purgationis moræ , & restitutionis in integrum , ex quacunque causa , sed dicta Venditio censeretur , & esset libera , pura , & perpetua , perinde ac si dictum Jus nunquam fuisset reservatum cum ampla dicti Juris , & pacti renunciatione , & cassatione .

Hanc rei seriem cum Sanctitas Sua commemorasset , adjecit , elapsum jam fuisse , non solum terminum octo annorum ad redimendum Ducatum , Oppida , Loca , & Bona supra memorata in dicto Instrumento præfixum , die scilicet decima nona Decembris anni millesimi sexcentessimi quinquagesimi septimi , verum etiam alium terminum , die scilicet decima nona Decembris præsentis anni millesimi sexcentessimi sexagesimi , quo triennio durante à die Venditionis computando , cum prædictus Clemens Octavus in Constitutione erectionis Congregationis Baronum septimo Kalendas Julii millesimo quingentesimo nonagesimo sexto , Pontificatus Sui quinto , declaraverit hujusmodi bo-

na Jurisdictionalia, vigore ejusdem Constitutionis emptā, comprehendī non debere in alia præcedenti Pii Quinti recolendæ memoriæ de non alienando, & infeudando Civitates, & Loca Sanctæ Romanæ Ecclesiæ edita quarto Kalendas Aprilis anno millesimo quingentesimo sexagesimo septimo, ejus Pontificatus anno secundo, consequens propterea esse, ut Ducatus, Oppida, Castra, & Bona prædicta unita, & incorporata omnino sint Sedi, & Cameræ Apostolicæ.

Se nihilominus, ut uberius, certiusque ejusdem Sedis, & Cameræ Juribus, & indemnitati pro sui Pastoralis Officii munere consulat, atque Prædecessorum suorum providentiam, & exempla sequatur, ad omnem meliorem finem, & effectum pro potiori cautela Sanctæ Sedis, & Cameræ prædictæ, Jura Juribus addendo eidem Sedi, & Cameræ Apostolicæ unire, & incorporare in præsentī Consistorio statuissē, Ducatum Castri, Statum Roncilionis, ac cætera Castra, & Loca, & cætera Bona prædicta, ac in prædictis Instrumentis Brunori, Lucarelli, & Viperæ comprehensa, illaque prædictæ Constitutioni recolendæ memoriæ Pii Quinti editæ quarto Kalendas Aprilis anni millesimi quingentesimi sexagesimi septimi subjicere, & in ea comprehendere, & unita, incorporata, subiecta, & comprehensa decernere, ac declarare, auditis prius Sententiis eorundem Venerabilium Fratrum suorum S. R. E. Cardinalium.

Qui

Qui cū voce, vel nutu Sanctitatis Suae consilium collaudassent, & assensissent, Sanctitas Sua eisdem præsentibus decrevit, & declaravit, ut infra videlicet:

Auctoritate Omnipotentis Dei, Sanctorum Petri, & Pauli Apostolorum, ac nostra pro potiori cautela, & jura juribus addendo, Sanctæ Sedi, & Camera Apostolicæ unimus, & incorporamus Ducatum Castri, & Statum Roncilionis, cum cæteris Locis, Terris, Castris, Oppidis, & bonis comprehensis in prædictis instrumentis venditionis rogatis per acta Bartholomæi Brunori die septima Octobris anno millesimo sexcentesimo quadragesimo nono, & Francisci Lucarelli Notarii Apostolicæ Camera, & Caroli Viperæ Notarii Capitolini anno millesimo sexcentesimo quadragesimo nono, decima nona Decembris, eaque Constitutioni recolendæ memoriæ Pii Quinti editæ quarto Kalendas Aprilis anno millesimo quingentesimo sexagesimo septimo subjicimus, ac in ea comprehendere volumus, & unita, incorporata, atque subiecta, & comprehensa decernimus, & declaramus omni meliori modo. In nomine Patris, & Filii, & Spiritus Sancti, Amen.

Actum prædictis die, & anno.

His per actum separatim absolutis, & transactis, dixit ea occasione velle se à Prædecessoribus suis providere, sapienterque instituta, quo pluribus vinculis, & munimentis colligentur, insistantque sua quoque auctoritate roborare, ac etiam extendere,

præ-

præsertim verò Pii Quinti Bullam supramemoratam, ne de illius germano sensu contingat imposterum dubitari.

Ac primò quidem velle, se illam confirmare, & approbare, eique subicere, vel potius subjecta declarare, Castra, Oppida, Civitates, Ducatus, Principatus, Dominia, Terras, & Loca à Sancta Sede immediatè possessa non aliàs infeudata, & etiam infeudari solita, verùm etiam, si nunquam antea fuerint infeudata.

Secundò similia imposterum non solum devotionis, sed quovis alio titulo acquirenda; declarando etiam duas Constitutiones in materia confiscationum editas à sanctæ memoriæ Gregorio Decimotertio, quarto Idus Junii millesimo quingentesimo octuagesimo, & à Sixto Quinto Kalendas Julii, quod hujusmodi Loca, & Bona earundem Constitutionum vigore confiscata, non comprehendantur sub præfata Pii Quinti, durantibus tamen Investituris, & salvis pactis in eis contentis.

Tertiò, quod expleto triennio suspensionis indultæ à Clemente Octavo in memorata ejus Constitutione, statim ipso Jure, & ipso facto bona Jurisdictionalia ejus vigore Camera Apostolicæ emptæ, censeantur incorporate, & subjecta prædictæ Bullæ Pii Quinti.

Quartò, quod hujusmodi sua Constitutio cum prædictis declarationibus, & aliis præcedenti Cle-

mentis

mentis Octavi; seu sanctæ memoriæ Innocentiū Noni edita pridie nonas Novembris anni millesimi quingentesimi nonagesimi primi, ejus Pontificatus primo; cum ejusdem Clementis Decreto Consistoriali facto die vigesima sexta Junii, anno millesimo quingentesimo nonagesimo secundo, & cum expressione acquisitionum hætenus factarum post ipsam Pii Quinti Bullam à Successoribus Sanctitatis Suæ, sicut ipsamet faciet, & à Sanctæ Romanæ Ecclesiæ Cardinalibus nunc viventibus, & pro tempore futuris, juramento firmetur, ut ab eodem Pio Quinto in dicta Constitutione sancitum, & ad hanc diem servatum fuit. Id autem animi sui consilium aperire ipsis; & proponere voluisse, ut eorum unusquisque re attentè, diligenterque perpenſa suffragium ea de re suum quamprimum afferat, sive coram, sive ex scripto, quo Sanctitas Sua, quod magis in Domino conduxerit, decernere, atque exequi posset.

Ipsa Pontificis verba.

VENERABILES FRATRES.

JUcunda nobis, vobisque appellatio, ut fraterno nobiscum, & filiali erga Sanctam Sedem affectu, ac zelo præditos vos videamus; atque ad pietatis opera hortemur diebus hisce Sanctis, quibus opud Dominum copiosa facta est Redemptio, ne illa nostra culpa, aut

inert,

*iners, aut manca evadat. Communicabimus vobiscum aliqua, quæ ut certiora sint, legemus ex scripto. Pro-
bè nostis Odoardum olim Parmæ Ducem gravi ære alie-
no Creditoribus Montis, Farnesi nuncupati, obstrictum,
postquam sæpe felicitis recordationis Urbani Papæ Octavi
Prædecessoris nostri hortatu, ac jussu monitus fuisset,
ut iis satisfaceret, atque ad id opportunis tandem Ju-
stitiæ mediis conventum, repente armato Milite Statum
Ecclesiasticum esse aggressum; Unde perturbationes, &
gravissima scandala, ac damna tum Apostolicæ Sedi sub-
ditis, tum publico ærario provenerunt, Odoardo verò,
ut Domino placuit, ab humanis evocato, recolendæ me-
moriæ Innocentium Decimum Prædecessorem nostrum eo-
rundem Creditorum Pupillorum, Viduarum, piorumque
Locorum lacrymis, & querelis frequentibus motum, jus-
sisse per Congregationem Baronum illis justitiam mini-
strari. Quæ servatis servandis ad venditionem aliquo-
rum Castro-
rum, ac Locorum præfati Ducis, Roncilionis
scilicet, Valerani, Canepinæ, ac Vici cum Lacu, & Ca-
samala, aliisque annexis processit, atque ea, deficienti-
bus aliis oblato-
ribus, eidem recolendæ memoriæ Innocen-
tio, & Cameræ Apostolicæ deliberavit, reservata facul-
tate ea redimendi ad triennium, prout est ex Actis Bar-
tholomæi Brunori, die septima Octobris anni millesimi sex-
centesimi quadragesimi noni. Cum verò alia Loca, Terras,
& Ducatum Castri cum ei annexis tam Jurisdictionali-
bus, quàm non Jurisdictionalibus ejusdem Ducis in ere-
ctionibus dictorum Montium adscriptis, affectis, atque*

Hypothecatis, judicium, executionemque prosequi intendebat. Idem Prædecessor noster Innocentius X. precibus dilecti Filii Raynutii moderni Parmæ Ducis, Filii, ac Successoris dicti Odoardi, nomine porrectis, annuere, ac dictorum Creditorum commodo, Statusque tranquillitati magis, quam ipsius Cameræ Apostolicæ utilitati consulere volens, cum ipsi potius esset grave, & damnosum, assensit Ducatum prædictum cum cæteris omnibus bonis præfatis (illis quoque comprehensis, quæ fuerant antea ut diximus deliberata) emere sibi, & Cameræ Apostolicæ, tam ab ipso Duce, quam à Reverendissimo Thesaurario ejusdem Cameræ Apostolicæ cum facultatibus Congregationis Baronum, & aliis ipsi concessis, quibus ejusdem Congregationis Constitutionibus, Bullis, & Privilegiis dictum Contractum subiectum, & comprehensum esse voluit, pretio, & pactis conventis in Instrumento celebrato die 19. Decembris 1649. per Acta Francisci Lucarelli Cameræ Apostolicæ, & Caroli Viperæ Capitolii Notariorum. In quo Instrumento specialiter reservatum fuit dicto Duci Raynutio, ejusque Successoribus in Ducatu, & non aliis, nec alio modo Jus redimendi dictum Ducatum Castri, & Statum Roncilionis, ac cætera Bona, & Loca vendita infra terminum octo annorum, persolutis tamen actu, & unica vice Cameræ Apostolicæ in Depositaria generali scutis decies, & sexies centenis, & viginti novem millibus septingentis quinquaginta monetæ Romanæ, eoque termino elapso, & solutione, ac redemptione non factis incontinenti, & in eodem instanti ipso Jure, ac ipso facto,
& absque

Et absque alia declaratione, idem Jus, Et facultas redimendi censeantur expirasse, illisque dictus Dux ulterius uti non valeat quavis ratione, etiam purgationis moræ, Et restitutionis in integrum ex quacunque causa, sed dicta Venditio censeatur, Et sit libera, pura, Et perpetua, proinde ac si dictum Jus nunquam fuisset reservatum cum ampla dicti Juris, Et pacti renunciatione, Et cassatione. Cum igitur terminus octo annorum ad redimendum Ducatum, Loca, Et Bona prædicta expletus fuerit sub die 19. Decembris 1657. Et præterea transferint alii tres anni die 19. besterna præsentis mensis, quibus à die Venditionis computandis durantibus felic. record. Clemens VIII. Prædecessor noster in Constitutione edita pro instituenda Congregatione Baronum Status Ecclesiastici 7. Kal. Julii anni 1596. ejus Pontificatus quinto, declaravit hujusmodi bona Jurisdictionalia in vim ejusdem Constitutionis emptæ comprehendendi non debere in alia præcedenti Pii V. recol. mem. edita 4. Kal. Aprilis 1567. ejus Pontificatus anno secundo, ac proinde remaneant omnino unita, Et incorporata Sedi, Et Cameræ Apostolicæ. Nihilominus nos volentes (prout ex debito Officii nostri tenemur) ejusdem Sedis, Et Cameræ Apostolicæ Juribus, Et indemnitati consulere, ac Prædecessorum etiam nostrorum proinde instituta, Et exempla in hac materia sequentes ad omnem meliorem finem, Et effectum pro potiori cautela Sanctæ Sedis, Et Jura Juribus addendo, eidem Sedi, Et Cameræ Apostolicæ unire, Et incorporare intendimus Ducatum Castri, Statum Roncilionis, ac cætera Castra, Loca, Et Bona prædicta in prædictis Instrumentis Bruinori, Luca-

relli, & Viperæ celebratis comprehensa, eaque dictæ Constitutioni recolendæ memoriæ Pii V. editæ 4. Kalendas Aprilis anni 1567. subjicere, & comprehendere, & unita, incorporata, atque subiecta, comprehensa decernere, & declarare volumus, idque summopere cupimus unanimi vestrum omnium assensu, de quorum probitate, ac debito erga hanc Sanctam Sedem zelo non solum minimè dubitamus, verum etiam quàm maximè in Domino confidimus. Quid vobis videtur?

Hic omnes Cardinales, aut voce, aut nutu approbarunt.

Auctoritate Omnipotentis Dei Sanctorum Petri, & Pauli Apostolorum, ac nostra pro potiori cautela, & Jura Juribus addendo Sanctæ Sedi, & Cameræ Apostolicæ unimus, & incorporamus Ducatum Castri, & Statum Roncilionis cum eorum Locis in Instrumento emptio- nis comprehensis, eaque Constitutioni recolendæ memoriæ Pii V. edita quarto Kalendas Aprilis anno millesimo quinquagesimo sexagesimo septimo, subjicimus, ac in ea comprehendi volumus, & unita, & incorporata, atque subiecta, & comprehensa decernimus, & declaramus omni meliori modo. In nomine Patris, & Filii, & Spiritus Sancti. Amen.

Occasione ista, ut quæ à Prædecessoribus nostris providè instituta sunt stabiliùs perseverent, ea nostra quoque auctoritate roborare intendimus, & inter hæc præsertim confirmare Pii V. Bullam, ne de ea contingat ampliùs dubitare.

Primò exprimere Civitates, & Costra à Sancta Sede immediatè possessa, etiam si nunquam fuerint infeudata.

Secundò, similia impofterum quovis titulo acquirendo.

Tertiò, quod expirante triennio suspensionis Indultæ à Clemente VIII. statim ipso jure, & facto censeantur incorporata Bullæ Pii V.

Quartò, quod prædicta nostra Constitutio cum declarationibus indicatis, & cum expressione acquisitionum hætenus factarum post ipsum Pii V. Bullam à nobis, & à Successoribus nostris, & à Sanctæ Romanæ Ecclesiæ Cardinalibus juramento firmentur, prout à Pio V. recolendæ memoriæ sancitum, atque in ea servatum fuit. Hanc igitur animi nostri sententiam, quæ salvis omnibus Pontificiis Constitutionibus procedit, vobis ideo proponimus, ut ea maturè considerata, afferentibusque vestra suffragia sive coram, sive scripto. Nos divino juvante auxilio, quod conducibilius in Domino fuerit discernere valeamus.

Quæ in Consistorio hoc agimus sub silentio esse servanda non est, quod in memoriam redigamus. Vestra verò suffragia pro confirmatione Bullæ Pii V. optamus habere intrà hanc septimaniam.

Feria 2. die 24. Januarii 1661. Romæ in Palatio Montis Quirinalis fuit Consistorium secretum, in quo Sanctissimus Dominus Noster post aliquot propositiones Ecclesiarum, & alia nonnulla in hunc ferè sensum est locutus. Decubuisse se ab ultimo Consistorio per mensem ægrum pedibus, sed capite (Deo foret laus) ita sano, & valente, ut meditari, deliberare, consilere, & conceptum Bullæ, quam proposuerat, pro confirmanda, & explicanda altera recolendæ memoriæ Pii V. super bonis Sanctæ Romanæ Ecclesiæ non alienandis perficere, & absolvere potuerit, subjungens se æqui, bonique consuluisse ea, quæ non pauci Patrum prælecto ejusdem Bullæ conceptu annotaverant, nunc se Deo dante eandem Bullam Sacramento firmare, & subscribere decrevisse.

Post lectam Bullam à D. Stephano Ugolino Secretario Brevium, & Utriusque Signaturæ Referendario à prima usque ad ultimam lineam Sanctissimus Dominus Noster stans aperto capite juravit, & tangens ambabus manibus librum Evangeliorum eundem est deosculatus, dicens: *Sic me Deus adjuvet, & hæc Sancta Dei Evangelia*: ac sedens recto capite duobus Cæremoniæ Magistris abacum admonentibus subscripsit.

Ego Alexander Catholicæ Ecclesiæ Episcopus: Providebam Dominum in conspectu meo semper, quoniam à dextris est mihi, ne commovear.

Tunc primus Cæremoniarum Magister attulit librum Evangeliorum, quem unusquisque eorum tan-

gens

gens ambabus manibus osculatus est ordine suo dicens :

Sic me Deus adjuvet, & hæc Sancta Dei Evangelia.
Interim in fine Bullæ unusquisque subscripsit manu sua.

Ego N. N. Card. N. promitto, voveo, & juro.

His peractis Pontifex surgens, & descendens è Solio, dimissa Stola, accedentibus Cardinalibus, Paternam Benedictionem impertitus, familiariter dixit :
Quod felix, faustumque sit ad Sanctæ Sedis, ejusque Bonorum conservationem, gaudens unanimi sensu peractum hoc opus, certi, quod nemo vestrum tremula manu, sed firma, & valida omnes hilariter in Domino subscripserint.
Demum recessit hora 19. & quarta parte vigesimæ postquam ingressus fuisset Consistorium hora 16.

F. I. N. I. S.

I N D E X.

C onstitutio Sancti Pii V. de non alienandis, & infeudandis Civitatibus &c.	Pag. 1
Constitutio Sixti V. de visitandis Sacris Liminibus.	12
Constitutio ejusdem, de decies centenis millibus nummum aureorum in Arce S. Angeli sepositis.	22
Constitutio ejusdem, de alteris decies centenis millibus nummum aureorum ibidem sepositis.	40
Constitutio ejusdem, de tertius decies centenis millibus nummum aureorum ibidem sepositis.	49
Constitutio Innocentii IX. in qua confirmatur, & extenditur Constitutio S. Pii V. de non alienandis, & infeudandis Civitatibus &c.	60
Constitutio Clementis VIII. in qua comprobatur Constitutio S. Pii V. ab Innocentio IX. declarata, de non alienandis, & infeudandis Civitatibus &c.	68
Constitutio Gregorii XV. pro applicatione emolumenti Annuli Cardinalitii favore Sac. Congreg. de Propaganda Fide.	76
Constitutio Urbani VIII. in qua confirmatur Bulla Gregorii XV. de electione Romani Pontificis.	86
Constitutio Innocentii X. super Titulo, & Insignibus S. Romanæ Ecclesiæ Cardinalium.	136
Constitutio Alexandri VII. de bonis Ecclesiæ non alienandis.	145
Constitutio Innocentii XII. moderatoria donationum &c. favore Congregationis sanguineorum Romani Pontificis.	169
Consistorium Clementis VIII. 26. Junii 1592.	183
Consistorium Urbani VIII. 12. Maji 1631.	188
Consistorium Alexandri VII. 20. Decembris 1660.	193

F I N I S.

V A A
1533554



165
5
15

